

重刊全唐詩話序

市舶府舊刊全唐詩話字  
多誤者蓋尚公學詩內館

時所抄

中秘本也公來督舶急欲刊  
播故未致詳耳歲己卯芬





調官于茲公方膺

重命鎮守政務繁劇宜不及  
此矣乃汲汲然以校訂見  
委予以嘗有職於詞翰不  
得辭又以自古中貴人所  
愛多不于文詞其於文士

亦或媚以惡之公獨愛文  
詞若劉伶李白之於酒而  
於文士尤敬而下之畧無  
勢分之拘也可謂能黜俗  
心而全天性之善者雖求  
我大夫士指豈可以多屈



邪然予間關萬里行苦於  
無書印對惟以所嘗記憶  
者與是正之蓋千餘字其  
不能記憶者寧存其誤不  
敢臆斷為也然亦不及十  
數字爾既而公閱之曰是

書其有遇也哉豈命工重  
刊且屬予序夫是書之顛  
末有御史胡公之文在而  
公之行蹟有大宰林公之  
文在序奚益哉惟惜唐人  
以詩為教而一代人文僅



若是耳方太宗玄宗憲宗  
之盛有道之周官以身為  
教而立瞽矇誦詩之官于  
上以鄉三物為教而立太  
師陳詩之官于下則諷詠  
涵濡變化鼓舞杜少陵韓

昌黎可進於雅頌而陳伯  
玉輩亦得以繼風人矣豈  
若是而止邪是則有立教  
之端也予不得不序

正德庚辰夏五月既望

賜進士及第承務郎前翰林



院

國史脩撰進賢舒芬書

全唐詩話目錄

卷上

太宗

高宗

中宗

玄宗

德宗

文宗

宣宗

昭宗

武后

徐賢妃

上官昭容

孔紹安

虞世南

魏徵



李百藥

長孫無忌

王勃

馬周

李義府

杜淹

蘇味道

駱賓王

陳子昂

李日知

李景伯

崔融

李適

徐彥伯

李嶠

蘇頲

沈佺期

李行言

張元一

劉希夷

張敬忠

張說

宋璟

王灣

姚崇

趙仁獎

金昌緒

張九齡

王維

王縉

賀知章

李嘉祐

張均

王諲

孟浩然

陶峴



王昌齡

李清

韓滉

王之渙

劉長卿

章八元

韋應物

朱放

李泌

暢當

皇甫冉

皇甫曾

秦系

顧况

朱絳

楊志堅

劉方

戎昱

柳邪

薛昇

元載

揚郇伯

梁鎰

戴叔倫

于鵠

李益

耿偉

盧綸

韓翃

錢起

司空曙

崔峒

李端

冷朝陽

竇叔向

竇常



竇鞏

常建

李約

陳通方

楊炎

裴度

韓愈

張籍

李道昌

陸暢

李翱

孟郊

劉义

楊巨源

歐陽詹

袁高

閻濟美

裴交

劉竈

元稹


白居易

全唐詩話目錄畢





國家圖書館, NATIONAL CENTRAL LIBRARY, TAIWAN, R.O.C





全唐詩話卷之上

太宗

貞觀六年九月帝幸慶善宮帝生時故宅也  
因與貴臣宴賦詩起居郎請平宮商被之  
管絃命曰功成慶善樂使童子八佾為九  
功之舞大宴會與破陣舞偕奏於庭

帝嘗作宮體詩使虞世南賡和世南曰聖作  
誠不然體非雅正上有所好下必有甚焉  
恐此詩一傳天下風靡不敢奉詔帝曰朕





試卿爾後帝為詩一篇述古興亡既而嘆  
曰鐘子期死伯牙不復鼓琴朕此詩何所  
示邪勅褚遂良即世南靈座焚之

貞觀二十年秋帝幸靈州時破薛延陀回紇  
諸部遣使入貢乞置官司上為詩序其事  
曰雪耻酬百王除凶報千古公卿請勒石  
於靈州從之

### 高宗

太平公主武后所生后愛之傾諸女帝擇薛

紹尚之假萬年絲為婚館門隘不能容翟  
車有司毀垣以入自興安門設燎相屬道  
樾為枯當時群臣劉禕之詩云夢梓光青  
陛穠桃蕩紫宮元萬頃云離元應春夕帝  
子降秋期往奉古云帝子升青陛王姬降  
紫宸郭正一云桂宮初服冕蘭掖早生笄  
皆納妃出降之意也

### 中宗

九月九日幸臨渭亭登高作云九日正乘秋



三杯興已周，泛桂迎樽滿。吹花向酒浮，長  
房更早熟。彭澤菊初收，何藉龍沙上。方得  
恣淹留，時景龍三年也。序云：陶潛盈把既  
浮九醞之歡，畢卓持螯須盡一生之興。人  
題四韻同賦五言，其最後成罰之引滿。

韋安石得枝字云：金風飄菊蕊，玉露泣

更枝。

蘇瓌得暉字云：恩深蒼效淺，留醉奉宸

暉。

李嶠得歡字云：令節三秋晚，重陽九日

歡。

蕭至忠得餘字云：寵極更房遍，恩深菊

酬餘。

竇希珍得明字云：九辰陪聖膳，萬歲奉

承明。

韋嗣立得深字云：願陪歡樂事，長與歲

時深。

李迥秀得風字云：霖雲開曉日，仙藻麗



秋風

趙伯彥得祀字云簪掛丹萸藥杯涵紫  
菊花

楊庶得亭字云遠日瞰秦垌重陽坐灞  
亭

岑羲得淡字云爰豫瞻秦壑昇高臨灞  
淡

盧藏用得開字云萸依飄葉發菊向酒  
邊開

李咸得直字云菊黃迎酒淡松翠凌霜  
直

閻朝隱得筵字云簪紱趨皇極笙歌按  
御筵

沈佺期得長字云臣歡重九慶日月奉  
天長

薛稷得曆字云願陪九九辰長奉千千  
曆

蘇頲得時字云年數登高日延齡命賞



時

李又得濃字云捧篋薰香遍稱鷓鴣氣  
濃

馬懷素得酒字云蘭將葉布席菊用香  
浮酒

陸景初得臣字云登高識漢苑問道待  
軒臣

韋元旦得月字云雲物開千里天行乘  
九月

李適得高字云禁苑秋光入宸遊霽色  
高

鄭南金得日字云風起韻虞絃雲開吐  
堯日

于經野得樽字云桂筵羅玉乳菊醴溢  
芳樽

盧懷慎得還字云鶴似聞琴至人疑宴  
鎬還  
是宴也韋安石蘇瓌詩先成于  
經野盧懷慎最後成罰酒



十月帝誕辰內殿宴群臣潤色鴻業寄賢才  
帝云叨居右弼覩鹽梅李嶠運籌帷幄荷  
特來宗楚客職掌圖書濫蓬萊劉憲兩司  
謬忝謝鍾裴崔異禮樂銜管效塵埃鄭愔  
陳師振旅清九垓趙彥昭忻承顧問侍天  
杯李適銜恩獻壽栢梁臺蘇頲黃縑青簡  
奉康哉盧藏用宗伯秩禮天地開舜殺帝  
歌難續仰昭回宋之間微臣捧日變寒灰  
遠慙班左愧遊陪上官婕妤帝謂侍臣曰

今天下無事朝野多歡欲與卿等詞人時  
賦詩宴樂可識朕意不須惜醉大學士李  
嶠宗楚客等跪奏曰臣等多幸同遇昌期  
謬以不才策名文館思勵駕朽庶禱河嶽  
既陪天歡不敢不醉此後每遊別殿幸離  
宮駐蹕芳苑鳴笳仙禁或感里宸筵王門  
盃席無不畢從

景龍四年正月五日御大明殿會吐蕃騎馬  
之戲因重為拍梁體聯句帝曰大明御宇



臨萬方皇后曰顧慚內政翊陶唐長寧公主曰鸞鳴鳳舞向平陽安樂公主曰秦樓魯館沐恩光太平公主曰無心為子輒求郎溫王重茂曰雄才七步謝陳王昭容上官曰當熊讓輦愧前芳吏部侍郎崔湜曰再司銓管恩何志著作郎鄭愔曰文江學海思濟航考功員外郎武平一曰萬邦考績臣所詳著作郎閻朝隱曰著作不休出中腸時上疑御史大夫竇從一將作大匠

宗晉卿素不屬文未即令續二人固請許之從一曰權豪屏跡肅嚴霜晉卿曰鑄鼎開嶽造明堂此外遺忘時吐蕃舍人明悉獵請令授筆與之曰玉醴由來獻壽觴上大悅賜與衣服

玄宗

左丞相說右丞相璟太子少傅乾曜同上官命宴東堂賜詩云赤帝收三傑黃軒舉二臣由來丞相重分掌國之鈞我有握中璧



雙飛席上珍子房推要道仲子訝風神復  
輟台衡老將為調護人鴻鸞同拜日車騎  
擁行塵樂聚南宮宴觴連北斗醇俾予成  
百揆垂拱問彝倫

開元十六年帝自擇廷臣為諸州刺史計景  
先治號州源光裕鄭州寇泚宋州鄭溫奇  
邠州袁仁恭杭州崔志庶襄州李昇期邢  
州鄭放定州蔣挺湖州裴觀滄州崔成透  
州凡十一人行詔宰相諸王御史以上

道洛濱盛具奏太常樂帛舫水嬉命高力  
士賜詩令題座右帝親書且給筆紙令自  
賦資絹三千遺之

帝詩云眷言思共理鑒寐想惟良猗歟  
此推擇聲績著周行賢能既俟進黎獻  
實佇康視人當如子愛人亦如傷講學  
試誦論阡陌勸耕桑虛譽不可飾清知  
不可忘求名跡易見安直德自彰獄訟  
必以情教民貴有常恤惇且存老撫弱



復綴強勉哉各祗命知予眷萬方

德宗

貞元四年九月賜宴曲江亭帝為詩序曰朕在位僅將十載實賴忠賢左右克致小康是以擇三令節錫茲宴賞俾大夫卿士得同歡洽也夫共其成者同其休有其初者貴其終咨爾群僚順朕不暇樂而能節職思其憂咸若時則庶乎理矣因重陽之會聊示所懷詩云

早衣對庭燎躬化勤意誠特此萬機暇  
適與佳節并曲池潔寒流芳菊舒金英  
乾坤爽氣澄臺殿秋光清朝野慶年豐  
高會多懽聲永懷無荒戒良事同期情  
因詔曰卿等重陽會宴朕想歡洽欣慰  
良多情發于中因製詩序令賜卿等一  
本可中書門下簡定文詞士三五十人  
應制同用清字明日內於延英門進來  
宰臣李泌等雖奉詔簡擇難於取舍由



是百僚皆和上自考其詩以劉太貞及李紱等四人為上等鮑防于邵等四人為次等張濛殷亮等二十三人為下等而李晟馬燧李泌三宰相之詩不加考第

韋綬以內相感心疾罷還第帝九日作黃菊歌顧左右曰安可不示韋綬遣使持往綬遂奉和附使進帝曰為文不已豈願養耶勅曰自今勿復爾

裴度拜中書令以疾未任朝謝上巳曲江賜宴群臣賦詩帝遣中使賜度詩曰注想待元老識君恨不早我家柱石衰憂來學立禱仍賜御札曰朕詩集中欲得見卿唱和詩故今示此卿疾未差可他日進來御札及門而度薨

帝聽政暇博覽群書一日延英顧問宰相詩云呦呦鹿鳴食野之苹莘莘是何草時宰相揚珏揚嗣復陳夷行相顧未對珏曰臣按



爾雅·苹是蘋蕭上曰朕看毛詩疏葉圓而  
花白叢生野中似非蘋蕭

又一日問宰臣古詩云輕衫襍跳脫跳脫是  
何物宰臣未對上曰即今之腕釧也真誥  
言安妃有斷粟金跳脫是臂飾

嘗吟杜甫曲江篇云江頭宮殿瑣千門細柳  
新蒲為誰綠乃知天寶以前樓臺之盛鄭  
注乃命神策軍淘曲江昆明二池許公所  
立亭館兩軍造紫雲樓彩霞亭內出樓額

賜之

宣宗

帝好進士及第每對朝臣問及苟有科名對  
者必大喜便問所試詩賦題目并主司姓  
名或佳人物偶不中第必歎惜移時嘗於  
內白題鄉貢進士李道龍白居易之死帝  
以詩吊之曰綴玉聯珠六十年誰教冥路  
作詩仙浮雲不繫名居易造化無為字樂  
天童子解吟長恨曲胡兒能唱琵琶篇文



章已滿行人耳一度思鄉一愴然帝製秦  
邊陲曲其詞曰海岳咸通及帝垂拱而年  
號咸通焉廢子裴惲進詩賀聖政有大康  
字帝怒曰太康失邦乃以比我戶部韋渙  
奏云晉平吳寇改號太康雖有失邦之言  
乃見歸美之文上曰天子大須博覽不然  
幾錯惲罪

舊制盛春內殿賜宴三日帝妙音律每先裁  
製新曲俾禁中女伶迭相教授至是出宮

女數百分行連袂而歌其曲有曰播皇猷  
者率高冠方履褒衣博帶趨走俯仰皆合  
規矩于于然有唐堯之風焉有曰葱女踰  
歌隊者率言葱嶺之士樂河湟故地歸國  
復為唐民也若霓裳曲者皆執節幡被羽  
服態度凝碧飄飄然有翔雲舞鶴見左右  
如是數十曲流傳民間

出令狐潛  
正陵遺事

### 昭宗

陝府唐昭宗有詩云安得有英雄迎歸大內



中或曰逍遙樓有太宗詩云昔乘匹馬去  
今驅萬乘來志意不侔矣

### 武后

天授二年臘卿相欲詐稱花發請幸上苑有  
所謀也許之尋疑有異圖先遣使宣詔曰  
明朝遊上苑火急報春知花須連夜發莫  
待曉風吹於是凌晨名花布苑群臣咸服  
其異后託術以移唐祚此皆妖妄不足信  
也况太后之詩文皆元萬頃崔融輩為之

萬歲通天元年鑄九鼎成置于東都明堂之  
庭后自製曳鼎歌令曳鼎者唱和開元二  
年太子賓客薛謙光獻東都九鼎銘其祭  
州鼎銘武后所製文曰犧農首出軒昊應  
期唐虞繼踵湯禹乘時天下光宅域內雍  
熙上玄降靈方建隆基紫微令姚崇奏曰  
聖人啓運休兆必彰請宣付史館

此於

明皇御  
名已兆

### 徐賢妃



貞觀二十三年上疏諫太宗息兵罷役其畧  
曰大業者易驕願陛下難之善始者難終  
願陛下易之又曰漆器非延叛之方桀造  
之而人叛玉杯豈招亡之術紂用之而國  
亡侈麗之源不可不遏作法於儉猶恐其  
奢作法於奢何以制後

上官昭容

張說作昭容文集序云古者有女史記功書  
過有女尚書決事官闈昭容兩朝專美一

日萬機顧問不遺應接如響雖漢稱班媛  
晉譽左嬪文章之道不殊輔佐之功則異  
迹秘九天之上身沒重泉之下嘉猷令範  
代罕得聞庶幾後學嗚呼可仰然則大君  
撫四海之圖懸百靈之命喜則九圍被纘  
怒則千里流血靜則黔黎乂安勤則蒼生  
罷弊入耳之語諒其難乎責而勢大者疑  
賤而禮絕者隔近而言輕者忽遠而意忠  
者忤惟窈窕柔曼誘掖善心忘味九德之



衢傾情六藝之圃故登崑巡海之意寢剪  
胡刈越之威息璿臺珍服之態消從禽嗜  
樂之端廢獨使溫柔之教漸於生人風雅  
之聲流於采葉非夫元黃毓粹神明助思  
衆妙扶識群靈挾志誕異人之寶授與王  
之瑞其孰能臻斯懿乎鎮國太平公主道  
高帝妹才重天人昔嘗共游東壁同宴北  
海倏采忽徂物在人亡憫雕瑄之殘言悲  
素扇之空曲上聞天子求椒房之故事爰

命史臣叙蘭臺之新集

中宗正月晦日幸昆明池賦詩群臣應制百  
餘篇帳殿前結綵樓命昭容選一篇為新  
翻御製曲從臣悉集其下須臾紙落如飛  
各認其名而懷之既退惟沈宋二詩不下  
移時一紙飛墜競取而觀乃沈詩也及聞  
其評曰二詩工力悉敵沈詩落句云微臣  
雕朽質羞擬豫章才蓋詞氣已竭宋詩云  
不愁明月盡自有夜珠來猶隄健舉沈乃



中宗三年正月  
晦日幸昆明池

伏不敢復爭。宋之間詩曰：春豫靈池近，滄  
波漲殿開。舟凌石鯨動，槎拂斗牛回。節晦  
奠全落，春遲柳暗催。象溟看浴景，燒劫辯  
沉灰。鑄飲周文樂，汾歌漢武才。不愁明月  
盡，自有夜珠來。昭容名姚兒，西臺侍郎儀  
之孫。父廷芝，與儀死。武后時，母鄭方，姓姜  
，巨人，昇大秤曰：持此秤量天下。昭容生，踰  
月，母戲曰：稱量者，豈汝耶？輒啞然，應之。內  
乘機，政符其夢，不自通天。以乘內掌詔命。

中宗立，進拜昭容。帝引名儒賜宴，賦詩。姚  
兒常代帝及后，長寧安樂二公主。衆篇並  
作，而采麗益新。又差第群臣所賦，賜金幣。  
故朝廷靡然成風。當時屬詞大抵浮靡，然  
皆有可觀。昭容力也。韋后之敗，斬闕下。

紹安太業末，為監察御史。高祖為隋討賊，河  
東紹安監其軍，深見接遇。高祖受禪，紹安  
自洛陽間行來，奔高祖。大悅，拜內史舍人。  
時夏竦端亦嘗為御史，先來歸。紹安授秘



書監因侍宴詠石榴有祗為時來晚開花  
不見春之句武德中令狐德棻欲補正歷  
代史詔各差官主修一代紹安以中書舍  
人與崔善為蕭德言主梁多歷年不能就  
皆罷之紹安在隋時與孫萬壽以文辭稱  
時謂孔孫

虞世南

顏師古隋朝遺事載洛陽獻合帶迎輦花湯  
帝令袁寶兒持之號司花女時詔世南草

征遼指揮德音勅於帝側寶兒注視久之  
帝曰昔傳飛燕可掌上舞今得寶兒方昭  
前事然多愁態今注目於卿卿才人可使  
嘲之世南為絕句曰學畫鴉黃半未成垂  
有解袖太愁生綠愁却得君王惜長把花  
枝傍輦行

魏徵

太宗在洛陽宮幸積翠池宴酣各賦一事帝  
賦尚書曰日昃翫百篇臨燈披五典夏康



既逸豫商辛亦荒。酒恣情昏主多克已明。  
君鮮戒身資累惡成名由積善徵賦西漢。  
曰受降臨軹道爭長趣鴻門驅傳渭橋上。  
觀兵細柳也夜宴經柏谷朝遊出杜原終。  
藉叔孫禮方知皇帝尊帝曰徵言未嘗不。  
約我以禮。

李百藥

百藥七歲能屬文。齊中書舍人陸乂嘗過其  
父德林有說徐陵文者云藉琅邪之稿坐

客並不識其事。百藥進曰傳稱鄙人藉稻。  
注云鄙國在琅邪開陽縣人皆驚喜曰此  
兒即神童百藥幼多病祖母以百藥為名  
名臣之子才行相繼四海名流莫不宗仰。  
藻思沉鬱尤長五言。雖樵童牧子亦皆吟  
諷。及懸車告老怡然自得穿池鑿山文酒  
譚詠以盡平生之志。年八十五先是和太  
宗帝京篇手詔曰卿何身之老而才之壯。  
齒之宿而意之新乎。子安期未徵未遷中



書舍人自德林至安期三代掌制誥孫義  
仲又為中書舍人

長孫無忌

無忌嘲歐陽詢形狀猥陋云聳膊成山字埋  
肩畏出頭誰令麟閣上盡此一獼猴詢應  
聲曰索頭連背屨漫襠畏肚寒祇緣心渾  
渾所以面團團太宗笑曰詢殊不畏皇后  
耶

王勃

太宗嘗謂唐儉酒杯流行發言可喜是時天  
下初定君臣俱欲無為酒杯毒譴理亦有  
之高宗雖不君然亦深察事機當時諸王  
關雞王勃在沛王府戲為文檄英主帝見  
之大怒曰此殆交關之漸即日竄勃以太  
宗之賢杯酒一時之樂何足為後世戒及  
其弊也中宗詔群臣曰天下無事欲與群  
臣共樂於是迴波豔辭妖冶之舞作於文  
宇之臣而綱紀蕩然矣創業之難也一觴



一味是以肇亂况其甚焉者哉

馬周

凌朝浮江旅思詩云太清初上日春水送孤  
舟山遠疑無樹潮平似不流岸花開且落  
江鳥沒還浮羈望傷千里長歌遣四愁

李義府

義府初遇以李大亮劉洎之薦太宗召令詠  
鳥義府曰日裏颺朝彩琴中聞夜啼上林  
如許樹不借一枝棲帝曰與卿全樹何止

一枝

杜淹

杜淹始見袁天綱於洛天綱謂曰蘭臺成就  
學堂廣寬又曰二十年外終恐責黜暫去  
即還武德六年以善隱太子俱配流舊州  
淹至益州見天綱曰洛邑之言何其神也  
天綱曰不久即回至九年六月召入天綱  
曰杜公至京師即得三品要職淹至京拜  
御史大夫檢校吏部尚書贈天綱詩曰伊



呂深可慕松喬定是虛繁風終不得脫屣  
欲安如且珍純素美當與薜蘿疎既逢揚  
得意非復久閑居

蘇味道

趙州蘇味道與里人李嶠號蘇李武后為朝相  
世號模稜賦上元云火樹銀花合星橋鐵  
鎖開暗塵隨馬去明月逐人來游妓皆穠  
李行歌盡落梅金吾不禁夜玉漏莫相催

駱賓王

世稱王楊盧駱楊盈川之為文好以古人姓  
名連用如張平子之略談陸士衡之所記  
潘安仁宜其陋矣仲長統何足知之號為  
點尾簿賓王文好以數對如秦地重關一  
百二漢家離宮三十六號為筭博士帝京  
篇曰倏忽搏風生羽翼須臾失浪委泥沙  
賓王後與徐敬業與兵揚州大敗逃死此  
其識也

陳子昂



集異記載子昂初入京不為人知有賣胡琴者價百萬豪貴傳視無辯者子昂突出顧左右以千緡市之衆驚問荅曰余善此樂皆曰可得聞乎曰明日可集宣陽里如期備徃則酒肴畢具置胡琴於前食畢捧琴語曰蜀人陳子昂有文百軸馳走京轍碌碌塵土不為人知此樂賤工之後豈宜留心舉而碎之以其文軸遍贈會者一日之內聲華溢都時武攸宜為建安王辟為書

記

李日知

鄭州李日知景龍初為相初安樂公主館第成中宗臨幸燕從官賦詩日知卒章曰所願俱知君者樂無使時樛作者勞獨以規戒睿宗他日謂日向時雖朕亦不敢諫非卿亮直何能爾即拜侍郎

李景伯

中宗宰相懷遠之子李景伯景龍初為諫議



大夫中宗宴侍臣酒酣各命為迴波辭景伯獨為箴規帝不悅蕭至忠曰真諫官也迴波辭曰迴波爾時酒危微臣職在箴規侍宴既過三爵喧譁切恐非儀

崔融

久視元年改控鶴府為奉宸府張易之為奉宸令引詞人為供奉佞者奏云昌宗王子晉後身令披羽衣吹簫乘木鶴奏樂於庭融賦詩為絕唱有昔遇浮丘伯今同丁令

威中郎才貌是箴史姓名非之句後與宰相蘇味道相誚云融詩所以不及相公無銀花合蘇有詩云火樹銀花合味道云千詩雖無銀花合還有金銅丁取令威之句也

李適

初中宗景龍二年始於修文館置大學士四員學士八員直學士十二員象四時八節十二月於是李嶠宗楚客趙彥昭韋嗣立



為大學士李適劉憲崔湜鄭愔盧藏用李  
又岑羲劉子玄為學士薛稷馬懷素宋之  
問武平一杜審言沈佺期閻朝隱為直學  
士又召徐堅韋元旦徐彥伯劉允濟等滿  
貲其後被選者不一凡天子饗會游豫惟  
宰相直學士得從春幸梨園並渭水後除  
則賜柳園辟瀛夏宴蒲萄園賜朱櫻秋登  
慈恩浮圖獻菊花酒稱壽冬幸新豐歷白  
鹿觀登驪山賜浴湯池給香粉蘭澤從行

給翔麟馬品官黃衣各一帝有所感即賦  
詩學士皆屬和當時人所欽慕然皆狎猥  
佻佞忘君臣禮法惟以文華取幸若韋元  
且劉允濟沈佺期宋之問閻朝隱等無他  
稱景龍二年七月七夕柳兩儀殿賦詩李  
嶠獻詩云誰言七襄詠流入五絃歌是日  
言唱步九月幸慈恩寺塔上官氏獻詩群  
臣並賦閏九月幸慈持登浮圖李嶠等獻  
詩十月三日幸三會寺十一月十五日中



宗誕辰內殿聯句為柏梁體二十一日安  
樂公主出降武廷秀是月以嬖好上官為  
昭容十二月六日上幸薦福寺鄭愔詩先  
成舊郵三乘宋之問後進駕象法三立春  
侍宴賦詩二十一日幸臨渭亭李嶠等應  
制三十日幸長安故城十二月晦諸學士  
入閣守歲以皇后乳母戲適御史大夫竇  
從一往來其家遂三年元日清暉閣登高  
遇雪宗楚客詩云蓬萊雪作山是也因賜

金縷人勝李嶠等七言詩千鐘聖酒是日  
甚懽上令學士逸起屢舞至沈佺期賦迴  
波有齒錄牙緋之語晦日幸昆明池宋之  
問詩自有夜珠來之句至今傳之二月八  
日送沙門元奘等歸荊州李嶠等賦詩十  
一日幸太平公主南莊七月幸望春宮送  
朔方節度張仁亶赴軍八月三日幸安樂  
公主西莊九月九日幸臨渭亭分韻賦詩  
幸安石十一月一日安樂公主入新宅賦

先感



詩十五日中宗誕辰長寧公主滿月李嶠  
詩神龍見像日仙鳳養雛年是也二十三  
日南郊徐彥伯上南郊賦十二月十二日  
幸溫泉宮勅蒲州刺史徐彥伯入仗同學  
士例因與武平一等五人獻詩上官昭容  
獻七言絕句三首十四日幸韋嗣立莊拜  
嗣立道遙公名其居曰清虛原幽棲谷十  
五日幸白鹿觀十八日遊秦始皇陵四年  
正月朔賜群臣栢樹五日宴蓬萊宮吐蕃

使因為栢梁體

吐蕃人亦賦

七日重宴大明殿

賜綵縷人勝又觀打毬八日立春賜綵花

二十九日晦幸滄水二月一日送金城公

主三日幸司農少卿王光輔莊是夕岑義

設茗飲討論經史武平一論春秋崔日用

請北面日用贈武平一歌曰彼名流兮左

氏癡意玄遠兮冠今昔二十一日張直至

自朔方宴于桃花園賦七言詩明日宴承

慶殿李嶠桃花園詞因號桃行三月一日



清明幸梨園命侍臣為被何之戲三日上  
巳被襖於渭濱賦七言詩賜細柳園八日  
令學士尋勝同宴於禮部尚書竇希琳亭  
賦詩張說為之序十一日宴於昭容之別  
院二十七日李嶠入都附廟徐彥伯等餞  
之賦詩四月一日幸長寧公主莊六月幸  
興慶池觀競渡之戲其日過希琳宅學士  
賦詩二十九日御宴祝欽明為八風舞諸  
學士曰祝公斯舉五經掃地盡矣睿宗時

道士司馬承禎還天台適贈詩詞甚美朝  
士屬和三百餘人徐彥伯編為白雲記

徐彥伯

徐彥伯為文多變易求新以鳳閣為鷓鴣閣龍  
門為虬戶金谷為鏡溪玉山為瓊岳竹馬  
為籊籊月兔為魄兔進士效之謂之溢體

李嶠

皮日休松窓錄云中宗嘗召宰相蘇瓌李嶠  
之子進見時皆同年帝謂曰汝等各以所



通書取宜奏者為吾言之題應曰木從繩則正后從諫則聖嶠之于亡其名亦奏曰斯朝涉之脛剖賢人之心帝曰蘇瓌有子李嶠無後

蘇頲

長安盛春遊頲製詩云飛埃結紅霧遊蓋飄青雲明皇嘉賞以御花親補其中上時榮之

沈佺期

張燕公說嘗謂佺期曰沈三兄詩須還他第一佺期字雲卿相州人除給事中考功郎受賍劾未究會張易之敗遂長流驩州稍遷台州錄事參軍入計召見拜起居郎兼修文直學士侍宴為弄辭悅帝賜牙緋尋為太子詹事開元初卒

向嶺外生歸身名已蒙

佺期迎波爾時佺期流

魏建安後訖江左詩律屢變至沈約庾信以音韻相號附屬對精密及宋之間沈佺期



又加靡麗回忌聲病約句準篇如錦繡成  
文學者宗之號為沈宋語曰蘇李居前沈  
宋比肩謂蘇武李陵也

### 李行言

景龍中中宗引近臣宴集令各獻伎為樂張  
錫為談客娘舞宗晉卿舞渾脫張洽舞黃  
鸞杜元琰誦婆羅門呪行言唱駕車西河  
盧藏用效道士上章國子司業郭山惲請  
誦古詩兩篇誦鹿鳴蟋蟀未畢李嶠以詩

有好樂無荒之語止之行言隴西人兼文  
學幹事函谷關詩為時人所許中宗時為  
給事中能唱步虛歌帝七月七日御兩儀  
殿會宴帝命為之行言於御前長跪作三  
洞道士青詞歌曲貌偉聲暢上頗嘆美

### 張元一

武后朝左司郎中張元一善滑稽時西戎犯  
邊武懿宗統兵禦之至邠畏懦而遜元一  
朝曰長弓短度箭蜀馬臨高驕去賊七百



里隈牆獨自戰忽前逢著賊騎猶向南竄  
則天未曉曰懿宗無馬耶元一日騎猪夾  
豕也則天大笑后嘗問元一外有何事曰  
有三慶旱而雨洛橋成郭洪霸死

洪霸酷吏也

### 劉希夷

劉希夷一名庭之汝州人少有文筆好為宮  
體詩詞旨悲苦不為時人所重善彈琵琶  
嘗為白頭翁詠云今年花落顏色改明年  
花開復誰在既而自悔曰我此詩識與石

崇白首同所歸何異乃更作一聯云年年  
歲歲花相似歲歲年年人不同既而又嘆  
曰此句復仍似向識矣然死生有命豈復  
由此即兩存之詩成未周歲為奸人所殺  
或云宋之問害之後孫翌撰正聲集以希  
夷詩為集中之最由是大為人所稱

或云今載此篇在之問集中

### 張敬忠

先天中王主敬為侍御史自以才望萃妙當



入省臺前行忽除膳部員外郎微有悵  
吏部郎中張敬忠戲詠曰有意憐兵部專  
心望考功誰知脚蹭蹬幾落省牆東蓋膳  
部在省最東北隅也

### 張說

張說謫岳州常鬱鬱不樂時宰相以說機辯  
才畧互相排擯蘇頲方大用說與瓌善說  
因為五君詠致書封其詩以貽頲誠其使  
曰當候忌日近暮送之使者近暮至吊客

多說先公僚舊邈覽詩嗚咽流涕翌日上  
對大陳說忠正蹇諤人望所屬不宜淪滯  
遐方上因降璽書勞問俄遷荊州長史由  
是陸象先韋嗣立張庭珪賈曾皆以譴逐  
歲久因加甄叙邈以父之執友事之甚謹  
王冷然上燕公書云詩曰投我以木瓜報之  
以瓊琚此言雖小可以喻大相公五君詠  
曰淒涼丞相府餘慶在元成蘇公一聞此  
詩移公於荆府積漸至相由蘇得也今蘇



屈居益部公坐廟堂投木報瓊義將安在  
亦可舉蘇以自代然後為朔方之行冷然  
書又曰相公岳陽樓送別詩云誰念三千  
里江湖一老翁今日忘往日之棲遲貪暮  
年之富貴可乎

宋璟

劉禹錫獻權舍人書曰昔宋廣平之沉下僚  
也蘇公味道時為繡衣直指使者廣平殺  
以梅花賦蘇盛稱之自是方列於聞人之

目名遂振嗚呼以廣平之才未為是賦則  
蘇公未暇知其人耶將廣平困於窮阨於  
躓然後為是文耶是知英賢卓犖可外文  
字然猶用片言借說於先達之口席其勢  
而後驥首當時矧碌碌者疇能自異

王灣

王灣登先天進士第開元初為滎陽主簿馬  
懷素欲校正群籍灣在選中各部譏次後  
為洛陽尉商璠云灣詞翰早著為天下所



稱最者不過一二遊吳中江南意云海日  
生殘夜江春入舊年詩人以來無聞此句  
張公居相府手題於政事堂每示能文令  
為楷式又擣衣篇云月華照杵空悲妾風  
響傳砧不見君所有衆製類咸若斯非張  
蔡輩之未見覺顏謝之彌遠乎江南意云  
南國多新意東行伺早天潮平兩岸失風  
正一帆懸海日生殘夜江春入舊年從來  
觀氣象唯向此中偏

姚崇

口箴云君子欲訥吉人寡辭利口作戒長言  
為詩斯言不善千里違之勿謂可復駟馬  
難追惟靜惟默澄神之極去甚去泰居物  
之外多言多失多事多害聲繁則謦音希  
則大室本無暗垣亦齊耳何言者天成蹊  
者李似不能言為世所尊言不出口冠時  
之首無掉爾舌以速爾咎無易爾言亦孔  
之醜欽之謹之可大可久欽之伊何三命



而走謹之伊何三緘其口勉哉夫子行矣  
勉旃書之屋壁以代韋弦

李德裕舌箴序曰余宿于洞庭西夢與中書  
令姚公偶坐如舊相識問余曰君見僕所  
作口箴乎余對曰去歲居守東問於公曾  
孫諫議郤處觀金石之刻遂莞爾而笑曰  
孫子猶能箴之又曰余感姚公之夢乃為  
舌箴云

### 趙仁獎

令乘駟馬去丞脫繡衣來仁獎送上蔡令潘  
好禮拜御史詩也或疑其假手蓋仁獎住  
王戎墓側善歌黃顰景龍中負薪詣闕云  
助國調鼎即除臺官中書令姚崇曰此是  
黃顰耶授以當州一尉惟以黃顰自銜宋  
務光嘲之曰趙仁獎出王戎墓下入朱傳  
臺中捨彼負薪登茲列柏行人不避駟馬  
坐客惟聽黃顰忽一夫負兩束薪曰此合  
拜殿中人問其由曰趙以一束拜監察此



兩東合授殿中

金昌緒

春怨詩云打却黃鸞兒莫教枝上啼幾回驚

妾夢不得到遼西

顧陶取此詩為唐類詩

張九齡

九齡在相位有蹇諤匪躬之誠明皇既在位  
久稍怠庶政每見帝極言得失林甫時方  
同列陰欲中之將加朔方節度僉牛仙客  
實封九齡稱其不可甚不叶帝旨他日林

甫請見屢陳九齡頗懷誹謗于時方秋帝  
命高力士持白羽扇以賜將寄意焉九齡  
惶恐因作賦以獻又為燕詩以貽林甫曰  
海燕何微眇乘春亦暫來豈知泥滓濺只  
見玉堂開繡戶時雙入華軒日幾回無心  
與物競鷹隼莫相猜林甫覽之知其必退  
恚怒稍解

王維

集異記載王維未冠文章得名妙能琵琶春



之一日岐公引至公主第使為伶人進主  
前維進新曲號鬱輪袍并出所作主大奇  
之令宮婢傳教遂召試官至第諭之作解  
頭登第

祿山之亂李龜年奔放江潭曾於湘中採訪  
使筵上唱云紅豆生南國秋來發幾枝贈  
君多採擷此物最相思又秋風明月苦相  
思蕩子從戎十載餘征人去日慙慙囑歸  
鴈來時數附書此皆王維所製而梨園唱

焉

王維年十七時九日憶山東弟兄云獨在異  
鄉為異客每逢佳節倍思親遙知兄弟登  
高處遍插茱萸少一人祿山大會凝碧池  
梨園弟子歛歔泣下樂工雷海清擲樂器  
西向大慟賊支解於試馬殿維時拘於菩  
提寺有詩曰萬戶傷心生野烟百僚何日  
更朝天秋槐落葉深宮裏凝碧池頭奏管  
絃後有罪以此詩獲免寧王憲貴盛寵妓



數十人有賣餅之妻纖白明媚王一見屬  
意因厚遺其夫求之寵愛逾等歲餘因問  
曰汝復憶餅師否使見之其妻注視雙淚  
垂頰若不勝情時王坐客十餘人皆當時  
文士無不悽異王命賦詩維先成云莫以  
今時寵難忘異日恩看花滿眼淚不共楚  
王言坐客無敢繼者王乃歸餅師以終其

志

出本  
事詩

或說維諫終南山詩譏時也詩曰太一近天

都連山接海隅言勢焰盤據朝野也白雲  
回望合青霄入看無言徒有其表也分野  
中峰變晴陰衆壑殊言恩澤偏也故人投  
宿處隔水問樵夫畏禍深也

商璠云維詩辭秀調雅意新理愜在泉為珠  
著壁成繪一字一句皆出常境至如落日  
山水好漾舟信歸風又澗芳襲人衣山月  
映石壁又天寒遠山靜日暮長河急又賤  
日豈殊衆貴來方悟稀又日暮沙漠陲戰



聲煙塵裏詐肯慚於古人也

王縉

王縉九月九日作云莫將邊地比京都八月  
蠶霜草已枯今日登高樽酒裏不知能有  
菊花無

賀知章

賀知章年八十六臥病冥然無知疾損上表  
乞為道士還鄉明皇許之捨宅為觀賜名  
千秋命其男曾子會稽郡司馬賜鑑湖剡

川一曲

元乞官湖一曲為放  
生池因賜剡川一助詔令供帳東

門百僚祖餞御製送詩并序云天寶三年  
太子賓客賀知章鑿止尼之分抗歸老之  
疏解組辭榮志期入道朕以其年在遲暮  
用循掛冠之事俾遂赤松之遊正月五日  
將歸會稽遂餞東路乃命六卿庶尹大夫  
供帳青門寵行邁也豈惟崇德尚齒抑亦  
勸俗勸人無令二疎獨光漢冊乃賦詩贈  
行詩云遺榮期入道辭老竟抽簪豈不惜



賢達其如高尚心。羣中得祕要。方外散幽襟。  
獨有青門餞。群英悵別深。又云。筵開百  
壺餞。詔許二疎歸。仙記題金籙。朝章換羽  
衣。悄然承睿藻。行路滿光輝。

李嘉祐

送王牧往吉州謁王使君云。細草綠汀洲。王  
孫耐薄遊。年華初冠帶。文彩舊弓裘。野渡  
花爭發。春塘水亂流。使君矜小阮。應合倚  
門愁。

仲夏江陰官舍寄裴明府云。萬里邊江次。孤  
城對海安。朝霞晴作雨。濕氣晚生寒。苔色  
侵衣桁。潮痕上井欄。題書招茂宰。思爾欲  
辭官。

高武云。嘉祐袁州人。振藻天朝。大收芳譽。中  
興高流也。與錢郎別為一體。往往涉於齊  
梁。綺美婉麗。蓋吳筠何遜之敵也。至於野  
渡花爭發。春塘水亂流。朝霞晴作雨。濕氣  
晚生寒。文華之冠冕也。又禪心超忍。辱梵



語問多羅設使許詢更生孫綽復出窮思  
極筆未到此境

張均

均丞相說之子也說最鍾愛其情見於岳州  
別均之詩說為丞相知官考均時任中書  
舍人特注之曰父教子忠古之善訓祁奚  
舉午義不務私至於潤色王言彰施帝載  
道參墳典例絕功常恭聞前烈允難其任  
豈以嫌疑敢撓綱紀考上下均能文為大

理卿祿山盜國為偽中書令免死流合浦

王諲

除夜云今歲今宵盡明年明日催寒隨一夜  
去春逐五更來氣色空中改容顏暗裏回  
風光人不覺已着後園梅

孟浩然

皮日休孟亭記云明皇世章句之風大得建  
安體論者推李翰林杜工部為尤介其間  
能不愧者惟吾鄉之孟先生也先生之作



遇景入詠不搜奇扶異令語擬東人口者  
涵涵然有干霄之興若公輸氏當巧而不  
巧者也北齊羨蕭愨芙蓉露下落楊柳月  
中疎先生則微雲澹河漢疎雨滴梧桐樂  
府羨王融日霽沙嶼明風動甘泉濁先生  
則有氣蒸雲夢澤波動岳陽城謝朓之詩  
句精者有露濕寒塘草月映清淮流先生  
則有荷風送香氣竹露滴清響此與古人  
爭勝於毫釐間也

建德江宿云移舟泊煙渚日暮客愁新野曠  
天低樹江清月近人

陶峴

陶峴彭澤之孫也開元末家崑山泛游江湖  
自制三舟與孟彥深孟雲卿焦遂共載吳  
越之士號為水仙嘗親南海獲崑崙奴名  
靡訶善泅水至西塞山下泊舟吉祥佛寺  
見江水深黑謂必有怪物投劍命摩訶下  
取久之支體殊裂浮於水上峴流涕迴棹



賦詩自叙不復遊江湖矣詩云匡廬舊業  
是誰主吳越新居安此生白髮數莖歸未  
得青山一望計還成鴉翻楓葉夕陽動鷺  
立蘆花秋水明從此捨舟何所詣酒旗歌  
扇正相迎

王昌齡

昌齡字少伯江寧人中第補校書郎又中博  
學宏詞科遷汜水尉不護細行世亂還鄉  
里為刺史閭丘曉所殺工詩縝而思清時

謂王江寧

奉帚平明金殿開且將團扇共徘徊玉顏不  
及寒鴉色猶帶昭陽日影來

李清

詠石季倫云金谷繁華石季倫只能謀富不  
謀身當時縱與綠珠去猶有無窮歌舞人  
清登天寶十二年進士第

韓滉

聽樂悵然自述萬事傷心對管絃一身含淚



向春煙黃金用盡教歌舞留與他人樂少年

王之渙

出塞詩云黃沙直上白雲間一片孤城萬仞山羌笛何須怨楊柳春風不過玉門關之渙并州人與兄之咸之賁皆有文天寶間人樂天作滁州刺史鄭昉墓誌云與王昌齡王之渙崔國輔聯唱迭和名動一時

劉長卿

劉長卿字文房至監察御史以檢校祠部員外郎為轉運使判官知淮南鄂岳轉運留後鄂岳觀察使吳仲孺誣奏貶播州南巴尉會有為之辯者除睦州司馬終隨州刺史以詩馳聲上元寶應間皇甫湜云詩未有劉長卿一句已呼宋玉為老兵矣語未有駱賓王一字已罵宋玉為罪人矣其名重如此

高仲武云長卿員外有吏幹而犯上兩度遷



謫皆自取之詩體雖不新奇甚能鍊飾十  
首已上語意稍同於落句尤甚此其短也  
然春風吳草綠古木剡山深明日滄洲路  
歸雲不可尋又沙鷗驚小吏明月上高枝  
又細雨濕衣看不見閑花落地聽無聲截  
長補短蓋玉微之類歟又得罪風霜苦全  
生天地仁傷而不怨亦足以發揮風雅矣  
過張明府別業云寥寥東郭外白首一先生  
考滿孤琴在家移五柳成夕陽臨水釣春

雨向田耕終日空禁下何人識此情

餘干旅舍云搖落暮天迥青楓霜葉稀孤城  
向水閉獨鳥背人飛渡口月初上鄰家漁  
未歸鄉心正欲絕何處擣寒衣

送李中丞之襄州云流落征南將曾驅十萬  
師罷歸無舊業老去戀明時獨立三朝識  
輕生一劍知茫茫江漢上日暮欲何之

送嚴士元云春風倚棹闔閭城水國春寒陰  
復晴細雨濕衣看不見閑花落地聽無聲



日斜江上孤帆影草綠湖南萬里情東道  
若逢相識問青袍今已謾儒生

章八元

八元題慈恩塔云十層突兀在虛空四十門  
開面面風却怪鳥飛平地上自驚人語半  
天中迴梯暗踏如穿洞絕頂初攀似出籠  
落日鳳城佳氣合滿城春樹雨濛濛或云  
元白見其詩曰不謂嚴維出此弟子

高仲武云八元嘗於郵亭偶題數句蓋激元

楚以辭家維大異之遠親指喻數年充賦擢第  
至如雪晴山春見沙洩浪痕交得山水狀貌也  
八元睦州人登大曆進士第。韋應物

李肇國史補云開元後位卑而名著李北海邕  
王江寧昌齡李館陶鄭廣文虔元魯山德秀  
蕭功曹頴士張長史旭獨孤常州及崔比部  
元翰梁補闕肅韋蘇州其一也應物仕宦本  
末似止於蘇案白傳蘇州答劉禹錫詩云敢  
有文章替左司謂應物也官稱亦止此郡齋



雨中與諸文士燕集詩云  
兵衛森畫戟燕寢  
凝清香海上風雨至  
逍遙池閣涼煩疴近消  
散嘉賓復滿堂自慚  
君處崇未覩斯民康  
理會是非遣性達形  
跡忘鮮肥逐時禁蔬  
羣幸見嘗俯飲一杯  
酒仰聆金玉章神歡  
體自輕意欲凌風翔  
吳中盛文史群彥今  
汪洋方知大藩地豈  
曰財賦彊。欲持一瓢  
酒遠寄風雨夕句  
萬籟自生聽太空常  
寂寥還從靜中起却  
向靜中銷諫聲  
山深松子落幽人應  
未眠

句舟泊南池雨簾捲北樓風句

應物寄全旅山中道士云  
今朝郡齋冷忽憶  
山中客澗底拾枯松  
歸來煮白石欲持一  
瓢酒遠寄風雨夕落  
葉遍空山何處尋行  
跡

朱放

放字長通襄州人隱居剡溪嗣曹王臯鎮江  
西辟節度參謀正元中召為左拾遺不就  
送著公歸越云誰能愁此別到越會相逢長  
憶雲門寺門前千萬峯石床堆積雪山路



倒枯松莫學白道者無人知去蹤

李泌

鄴侯家傳云泌賦詩譏揚國忠曰青青東門柳歲晏復憔悴國忠訴于明皇上曰賦柳為譏卿則賦李為譏朕可乎

暢當

當詩平淡多佳句如釣渚亭云花發多遠意  
鳧鴈有閑情遲暉耿不暮平江寂無聲天  
柱隱所云荒徑鏡松子深蘿絕鳥聲陽崖

全帶日寬嶂偶通耕山君云水定鶴翻去  
松欹峯巖如又寒林苞晚菊風絮露垂楊  
湖畔聞漁唱天邊數鴈行皆有遠意

皇甫冉

高仲武云皇甫冉補闕自擢桂禮闈遂為高  
格往以世道艱虞避地江外每文章一到  
朝廷作者變色於詞場為先輩推薦即為  
伯仲誰家勝負或迷鹿中原如果熟任霜  
封籬味從水澗又衰露收新稼迎寒葺舊



廬又燕知杜日辭巢去菊為重陽冒雨開  
可以雄視潘張平揖沈謝又巫山詩終篇  
皆麗自晉宋齊梁周隋以來採掇者無數  
而補闕獲驪珠使前賢失步後輩却立自  
非天假何以迨斯恨長纏未騁而芳蘭早  
凋悲夫

送韓司直云遊吳還適越來任任風波復送王  
孫去其如春草何岸明殘雪在潮滿夕陽  
多季子留遺廟停舟試一過





西陵寄一公云西陵過風處自古是通津終  
日空江上雲山若待人汀洲寒事早魚鳥  
興情新南望山陰路吾心有所親

極文  
集

姚合取  
四詩為

秋日東林之作云閑看秋水心無事坐對寒  
松手自裁廬岳高僧留偈別茅山道士寄  
書來燕知社日辭巢去菊為重陽冒雨開  
淺薄將何稱獻納臨岐終日自遲迴

皇甫曾



張芳見訪郊君云林中雨散早涼生已有迎  
秋促織聲三徑荒蕪羞對客十年衰老愧  
稱兄愁心自惜江籬短世事方看木槿榮  
君若罷官攜手日尋山莫笑白雲程

曾與劉長卿友善曾過長卿碧澗別業詩云  
謝客開山後郊叅出去通江湖十年別衰  
老一樽同返照寒川滿平田暮雪空滄洲  
自有趣不復泣途窮長卿和云荒村帶晚  
照落葉亂紛紛古路無行客寒林獨見君

野橋經雨斷澗水向田分不為憐同病何  
人到白雲曾又寄長卿云南憶新安郡千  
山帶夕陽斷猿知夜久秋草助江長鬢髮  
應成素青松獨見霜愛才稱漢主題賦待  
田郎長卿和云離別江南北汀洲葉再黃  
路遙雲共水砧迥月如霜歲儉依仁政姑臧  
相國初臨郡年衰憶故鄉佇看宣室召漢法倚

張綱

秦系



系呈韋蘇州云久臥雲間已息機青袍忽著  
狎鷗飛詩興到來無一事郡中今有謝元  
暉

系字公緒會稽人隱泉州南安九日山張建  
封聞系不可致就加校書郎自號東海釣  
客與劉長卿善權德輿曰長卿自以為五  
言長城系用偏師攻之矣韋荅系云知掩  
山扉三十秋魚鬚翠碧滿床頭莫道謝公  
方在郡五言今日為君休蓋以五言得名

久矣年八十餘歲卒南安人號其峯為高  
士峯

山中贈張評事時授右衛佐云終年常避喧  
自注五千言流水閑過院春風與開門山  
茶邀上客桂實落前軒何事教予起微官  
不足論

系家剡山向盈一紀大曆五年人或以其文  
聞於留守薛公無何奏系右衛率府倉曹  
叅軍意所不欲以疾辭免因將命者獻詩



云由來那敢議輕肥散髮行歌自採薇逋  
客未能忘野興辟書今遣脫荷衣家中匹  
婦空相笑池上群鷗盡欲飛更乞大賢容  
小隱益看愚谷有光輝

顧况

况字逋翁姑蘇人至德進士性詼諧與柳渾  
李泌為方外交德宗時渾輔政以秘書郎  
召及泌相自謂當得達官久之遷著作郎  
况坐詩語調譎貶饒州司戶居於茅山以

壽終皇甫湜為况文集序云偏於逸歌長  
句駿發蹕厲往往若穿天心出月脇意外  
驚人語非常人所能及最為快也其為人  
類其章句云

山中作云野人愛向山中宿况在葛洪丹井  
西庭前有箇長松樹半夜子規來上啼又  
汀洲渺渺江籬短疑是疑非兩斷腸句巫  
峽朝雲暮不歸洞庭春水晴空滿句顏垣  
化為陂陸地堪乘舟句大姑山盡小姑出



月照洞庭行客舫

句

朱絳

春女怨云獨坐紗窓刺繡遲紫荊枝上轉黃

鸚欲知無限傷春意盡在停針不語時

取此詩  
為顏選

楊志堅

顏魯公為臨川內史邑有楊志堅者嗜學而  
貧妻厭之一日告鄰志堅以詩送之曰平  
生志業在琴詩頭上如今有二絲漁父尚

知谿谷暗山妻不信出身遲荆釵任意擦  
新鬢明鏡從他別畫眉今日便同行路客  
相逢即是下山時妻持詩詣州請公牒求  
別醮顏公案其妻曰王歡之廩既虛豈遵  
黃卷朱叟之妻必去寧見錦衣污辱鄉閭  
傷風俗若無褒貶僥倖者多遂蠶之後  
無棄其夫者

劉方平

秋夜泛舟云林塘夜泛舟蟲響荻颼颼萬影



皆因月千聲各為秋歲華空復晚鄉思不堪愁西北浮雲外伊川何處流

方平春怨云紗窓日落漸黃昏金屋無人見淡痕寂寞庭春今又晚梨花滿地不開門

### 戎昱

憲宗朝北狄頻寇邊大臣奏議古者和親有五利而無千金之費帝曰聞有士子能為詩而姓名稍僻是誰宰相對以包子虛冷朝陽皆非也帝遂吟曰山上青松陌上塵

雲泥豈合得相親世路盡嫌良馬瘦唯君不棄臥龍貧千金未必能移性一諾從來許殺身莫道書生無感激寸心還是報恩人侍臣對曰此是戎昱詩也京兆尹李鑿擬以女嫁昱令其改姓昱辭焉帝悅曰朕又記得詠史一篇云漢家青史內計拙是和親社稷因明主安危託婦人豈能將玉貌便欲靜胡塵地下千年骨誰為輔佐臣帝笑曰魏絳之功何其懦也大臣遂息和



戎之論矣

柳柳

柳與李端盧綸友善有賊平後送客還鄉詩云他鄉生白髮舊國有青山最有思致

薛昇

勅贈康尚書美人云天開喜氣曉氛盪聖主臨軒召冠軍欲令從此行霖雨先賜巫山一片雲康尚書日知也德宗時斬李惟岳以功擢為深趙節度遷奉誠軍陟晉絳昇

德宗時河東詩人也

元載

王忠嗣鎮北京以女韞秀歸元載歲久見輕韞秀勸之遊學元乃遊秦為詩別韞秀曰年來誰不厭龍鐘雖在侯門似不容看取海山寒翠樹若遭霜霰到秦封妻請偕行日路掃飢寒跡天衰志氣人休零別離淚携手入西秦

元到京屢陳時務深符上旨肅宗擢拜中書



寄諸姨妹詩曰相聞已隨麟閣貴家風第  
一右丞詩笄年解笑鳴機婦耻見蘇秦富  
貴時元肅代兩朝宰相貴盛無比復為一  
篇以喻之曰楚竹燕歌動畫梁春蘭重接  
衆衣裳公孫開館招佳客知道浮雲不久  
長

元貪悞被誅上令王氏入宮嘆曰二十年太  
原節度使女十六年宰相妻誰能為長信  
昭陽之事死亦幸矣京兆管數

楊郇伯

妓人出家云盡出花鈿與四鄰雲鬟剪落厭  
殘春暫驚風燭難留世便是蓮花不染身  
貝葉欲翻迷錦字梵聲初學誤梁塵從今  
艷色歸空後湘浦應無解佩人

梁鍾

詠木老人云刻木牽絲作老翁鷄皮鶴髮與  
真同須臾弄罷寂無事還似人生一夢中

明皇還西內  
詩



戴叔倫

戴叔倫字幼公潤州人師事蕭穎士為門人  
冠劉晏管鹽鐵表主管湖南至雲安揚子  
琳反馳客劫之曰歸我金幣可緩死叔倫  
曰身可殺財不可得乃捨之累遷至容管  
經畧德宗嘗賦中和節詩遣使者寵賜代  
還卒

吳明府自遠來留宿云出門逢故友衣服滿  
塵埃歲月不可問山川何處來倚城容弊

宅散職寄靈臺自此留君醉相歡得幾回  
除夜宿石頭驛云旅館誰相問寒燈獨可親  
一年將盡夜萬里未歸人寥落悲前事支  
離笑此身愁顏與衰鬢明日又逢春

送友人東歸云萬里楊柳色出關逢故人輕  
烟拂流水落日照紅塵積夢江湖闊憶家  
兄弟貧徘徊灞亭上不語自傷春

姚合取  
為極玄  
集

于鵠



鵝大曆正元間詩人也為諸府從事居江湖  
間有卜居漢陽及荆南陪樊尚書賞花詩  
自述曰三十無名客空山獨臥秋豈以詩  
窮者耶老大看花猶未足沿江正遇一枝  
紅日斜入散東風急吹向誰家明月中  
襄陽  
座上送死多於生幾人得終老  
句  
鵝送客遊邊云若到并州北誰人不憶家寒  
深無去伴路盡有平沙磧冷唯逢鴈天春  
不見花莫隨邊將意垂老事輕車

江南曲云偶向江邊採白蘋  
隨女伴賽江神  
衆中不敢分明語  
暗擲金錢卜遠人  
韋莊

取為又  
玄集

### 李益

益姑臧人字君虞大曆四年登第其受降城  
聞笛詩教坊樂人取為聲樂度曲又有寫  
征人歌早行詩為圖畫者迴樂峰前沙似  
雪之詩是也益有心疾不見用及為幽州  
劉濟營田副使獻詩有感恩知有地不上



望京樓之句左遷右廢子年且老門人趙  
宗儒自宰相罷免年七十餘益曰此吾為  
東府所選進士也聞者憐益之困後遷禮  
部尚書致仕卒  
閑庭草色能留馬當  
路楊花不避人  
句 笳簫漢恩繁旌旗邊色  
故  
句 馬汗凍成霜 句

耿偉

許州書情寄韓張二舍人云謫宦軍城老更  
悲近來頻夢到丹墀乍燃乍滅心中火惟

鐻惟多鬢上絲繞院綠苔聞鴈處滿庭黃  
葉閉門時故人高步雲衢上肯念前程杳  
未期

贈朗公云來自西天竺持經奉紫微年深梵  
語變行苦俗人歸月上安禪久苔生出院  
稀梁間有馴鴿不去為無機

秋日云返照入閭巷憂來與誰語古道無人  
行秋風動禾黍

書情逢故人云因君知此事流恨已忘機客



又多人識年高衆病歸連雲潮色遠度雪  
鴈聲稀又說家林盡悽傷淚滿衣

贈張將軍云寥落邊城暮重門返照聞鼓鼙  
驚雨暗士馬過秋閒慣守臨邊郡曾營近  
海山關西舊業在夜夜夢中還

醜暢當云同遊滌沮後已是十年餘幾度曾  
相夢何時定得書月高城影盡霜重柳條  
疎且對樽中酒一般想未如

為極  
玄集

書情逢故人  
以下姚合取

左拾遺詩有家貧僮僕  
不口齒友朋疎世多傳之

盧綸

長安春望云東風吹雨過青山却望千門草  
色閑家在夢中何日到春來江上幾人還  
川原繚繞浮雲外宮闕參差落照間誰念  
為儒多失意獨將衰鬢客秦關

綸德宗時為戶部郎中舅韋渠牟表其才召  
見禁中帝有所作輒為賡和異日間渠牟



盧綸李益何在答曰綸從渾瑊在河中驛  
召之會卒文宗尤愛其詩問宰相盧綸文  
章幾何亦有子否李德裕對綸四子皆擢  
進士第在臺閣帝遣人悉索家箴得詩五  
百篇以聞

得嶺南故人書云瘴海寄雙魚中宵達我居  
兩行燈下淚一紙嶺南書地說炎蒸極人  
處寄余殷勤祝賈誼莫共酒盃踈

寺窓樓白鶴似與鏡湖鄰

花邊幾代人岸沙音有路苔  
無聲願得客依止僧中老此身

送李端云故園衰草遍離別自堪悲路出寒  
雲外人歸暮雪時少孤為客慣多難識君  
遲掩淚空相向風塵何所期

寄嶺南故人  
以下姚合取

為極  
文集

韓翃

侯希逸鎮淄青翃為從事罷府閑居十年李  
勉鎮夷門辟為幕屬時已遲暮不得意多



家居一日夜將半客叩門急賀曰負外除  
駕部郎中知制誥栩愕然曰誤矣客曰郎  
報制誥闕人中書兩進名不佞久請之曰  
與韓栩時有同姓名者為江淮刺史又具  
二人同進御批曰春城無處不飛花寒食  
東風御柳斜日暮漢宮傳蠟燭青煙散入  
五侯家又批曰與此韓栩客曰此負外詩  
也栩曰是也是不誤時建中初也  
新書云曰平公主宅即席李端檀場送

相之幽筮檀場送劉相巡江淮錢起  
檀場

德宗西幸有神智驄如意騮二馬謂之功臣  
一日有進瑞鞭者上曰朕有二駿今得此  
可為三絕因吟栩觀調馬詩云鶩鶩楮目  
齒新齊曉日花間放碧蹄玉勒乍迴初噴  
沫金鞭欲下不成嘶高仲武云韓負外意  
放經史興致繁富一篇一詠朝野珍之多  
士之選也至如星河秋一鴈砧杵夜千家



又客衣筒布細山舍荔枝繁又踈簾看雪  
捲深戶映花關方之前載則芙蓉出水未  
足多也其比興深於劉貞外筋節減於皇  
甫冉也

題薦福衡岳禪師房云春城乞食還高論此  
中閑僧臘堦前樹禪心江上山疎簾看雪  
捲深戶映花關晚送門人去鐘聲杳靄間  
世傳翊有寵姬柳氏翊成名後辟淄青置之  
都下數歲寄詩曰章臺柳顏色青青今在

否縱使長條似鶯垂也應攀折他人手柳  
荅曰楊柳枝芳菲節可恨年年贈離別一  
葉隨風忽報秋縱使君來豈堪折後果為  
番將沙叱利所劫翊會入中書道逢之謂  
永訣矣是日臨淄大校置酒疑翊不樂具  
告之有虞侯將許俊以義烈自許即詐取  
得之以授韓希逸聞之曰似我往日所為  
也俊復能之翊後為夷門幕府後生共目  
為惡詩輕之



錢起

高仲武云詩格清竒理致沖澹粵從登第挺  
冠詞林文宗右丞許以高格右丞沒後負  
外為雄革齊宋之浮游削梁陳之靡曼迥  
然獨立莫之與京且如鳥道過疎雨人家  
殘夕陽又牛羊上山少煙火隔林深又長  
樂鍾聲花外盡龍池柳色雨中深皆特出  
意表標準古今又窮達戀明主耕桑亦近  
郊則禮義克全忠孝兼著是以弘長名流

為後措式

送僧歸日東云上國隨緣去東途若夢行浮  
天滄海遠去世法舟輕水月通禪觀魚龍  
聽梵聲唯憐慧燈影萬里眼中明

送僧自吳遊蜀云隨緣忽西去何日返東林  
世路無期別空門不住心人煙一飯少山  
雪獨行深天外猿聲夜誰聞清梵音

送征鴈云秋空萬里靜嘹唳獨南征風急翻  
霜冷雲開見月驚塞長憐去翼影滅有餘



聲悵望遙天外鄉愁滿目生

裴迪書齋望月云夜來詩酒興月上謝公樓  
影閉重關靜寒生獨樹秋鵲驚隨葉散螢  
遠入煙流今夕逢天末清暉幾處愁

送彈琴李長史赴洪州云抱琴為傲吏孤棹  
復南行幾度秋江水皆添白雪聲佳期來  
客夢幽興緩王程佐牧無勞問心平政自

平

以上四章姚合  
取為極玄集

贈闕下裴舍人云二月黃鶯飛上林春城紫

禁曉陰陰長樂鍾聲花外盡龍池柳色雨  
中深陽和不改窮途恨霄漢常懷捧日心  
獻賦十年猶未遇羞將白髮對華簪

題王山村叟壁云谷口好泉石君人能陸沉  
牛羊上山少煙火隔林深一徑入溪色數  
家連竹陰葺虹辭晚雨鷺隼落殘禽涉趣  
皆流目將歸必在林却思黃綬事辜負紫  
芝心

司空曙



酬張芬有赦後見贈云紫鳳朝銜五色書陽  
春忽報網羅除已將心變寒灰後豈料光  
生腐草餘建水風煙收客淚杜陵花竹夢  
郊居勞君故有詩相贈欲報瓊瑤恨不如  
經廢寶光寺云黃葉前朝寺無僧寒殿開池  
晴龜出曝松暝鶴飛迴古砌碑橫草陰廊  
盡雜苔禪宮亦消歇塵世轉堪哀

喜外弟盧綸凡宿云靜夜四無鄰荒居舊業  
貧雨中黃葉樹燈下白頭人似我獨沉久

愧君相見頻平生自有分况是蔡家親

崔峒

江上書懷云骨肉天涯別江山日落時淚流  
襟上血髮白鏡中絲胡越書難到存亡夢  
豈知登山迴首罷形影自相隨

喜逢妻弟鄭損因送入京詩云亂後自孤征  
相逢喜復驚為經多載別欲問小時名對  
酒悲前事論文畏後生遙知盈卷軸紙貴  
在江城



高仲武云峒詩文彩煥發意思雅淡如清磬  
度山翠閑雲來竹房又流水聲中視公事  
寒山影裡見人家此亦披沙鍊金時時見  
寶也

峒登進士第為拾遺入為集賢學士後終州  
刺史或云終元武令文藝傳云終右補闕  
峒寄李明府云松堂寂寂對煙霞五柳門  
前集晚鴉流水聲中視公事寒山影裡見  
人家觀風共羨新為政計日還應更觸邪  
可惜陶潛無限酒不逢籬菊正開花

李端

贈郭駙馬詩云

郭令公子駿尚昇平  
公主此詩席上成

青春都

尉最風流二十功成便拜侯金距關鷄過  
上苑玉鞭騎馬出長秋薰香荀令偏憐少  
傅粉何郎不解愁日暮吹簫楊柳陌路人  
遙指鳳凰樓

又云方塘似鏡草芊芊初月如鉤未上弦新  
開金埒看調馬舊賜銅山許鑄錢楊柳入



樓吹玉笛芙蓉出水妖花鈿今朝都尉如  
相許願脫長裾學少年

蜀路有飛泉亭中詩板百餘篇後薛能佐李  
福於蜀道過此題云賈掾曾空去題詩豈  
易哉悉去諸板惟留端巫山高一篇而已  
端賦巫山高云巫山十二峰皆在碧虛中回  
合雲藏日霏微雨帶風猿聲寒過水樹色  
暮連空愁向高唐望秋風見楚宮

茂陵山行陪韋金部云宿雨朝來歇空山天  
氣清盤雲雙鶴下隔水一蟬鳴古道黃花  
落平蕪赤草生茂陵雖有病猶得伴君行  
蕪城懷古云風吹城上樹草沒邊城路城裏  
月明時精靈自去來

冷朝陽

潞州節度薛嵩有青衣善彈阮咸琴手紋隱  
起如紅線因以名之一日辭去朝陽為詞  
曰採菱歌怨木蘭舟送客魂銷百尺樓還  
似洛妃乘霧去碧天無際水東流



賞叔向

叔向字遺直京兆人代宗時常袞為相用為左拾遺內供奉及貶亦出為溧水令四子登第群以處士隱毗陵常夏卿薦之朝德宗擢為左拾遺代武元衡為中丞薦呂溫羊士諤為御史李吉甫以二人躁險持不下羣怨吉甫伺吉甫陰事幾為憲宗所誅羣與兄弟牟常澤鞏皆為郎工詞章為聯珠集傳於時義取昆弟若五星然

叔向寒食賜恩火云恩光及小臣華燭忽驚春電影隨中使星輝拂路人幸因榆柳煖一照草茅貧

端午日恩賜百索云仙官長命縷端午降殊私事盛蛟龍見恩深犬馬知餘生儻可續終冀蒼明時

賞常

常任武陵寒食日次松滋渡先寄劉負外云杏花榆莢曉風前雲際離離上峽船江轉



數程淹驛騎楚魯三戶少入煙看春又遇  
清明節筭老重經癸巳年幸得住山當郡  
舍在朝常詠卜居篇常乃出向之子

竇鞏

代隣叟云年來七十罷耕桑就煖支羸強下  
床滿眼兒孫身外事閑梳白髮對殘陽  
寄南遊弟兄云書來未報幾時還知在三湘  
五嶺間獨立衡門秋水濶寒鴉飛去日銜  
山

常建

清晨入古寺初日朗高林竹徑通幽處禪房  
花木深山光悅鳥性潭影空人心萬籟此  
都寂但餘鍾磬音題破山後禪院  
歐陽永叔云吾嘗愛建竹徑通幽處禪房花  
木深欲效其語作一聯竟不可得始知造  
意者難為工也  
丹陽殷璠撰河岳英靈集首列建詩愛其山  
光悅鳥性潭影空人心



殷璠云高才而無貴位誠哉是言也曩劉禎  
死於文學左思終於記室鮑昭卒於參軍  
今常建亦滿於一尉悲夫建詩似初發通  
莊却尋野逕百里之外方歸大道所以其  
旨遠其興僻佳句輒來惟論意表正如松  
際露明月清光猶為君又山光悅鳥性潭  
影空人心此例數十句並可稱為警策一  
篇盡善者戰餘落日黃軍敗鼓聲死今與  
山鬼隣殘兵哭遼水思既邈苦詞又警絕

潘岳雖云能叙悲怨未見如此章句也  
弔王將軍墓云嫖姚征伐時深入疆千里戰  
餘落日黃軍敗鼓聲死常聞漢飛將可奪  
單于壘今與山鬼隣殘兵哭遼水

李約

汧公勉之子也為兵部外郎與主客外郎張  
諗同官每單床靜言達旦不寐贈韋徵君  
況詩曰我有心中事不向韋三說秋夜洛  
陽城明月照張八



觀祈雨云桑條無葉土生煙蕭管迎龍水廟  
前朱門幾處耽歌舞猶恐春陰咽管絃  
從軍行云看圖閑教陣畫地靜論邊烏壘天  
西成鷹窠塞上川路長唯筭月書遠每題  
年無復生還望飜思未別前又候火起鷗  
城塵沙擁戰聲游軍截虜懺降騎說蕃情  
霜落漉池淺秋深太白明嫖姚方虎視不  
覺說添兵

約雅度簡遠有山林之致在潤州得古鐵一

片擊之清越又養一猿名山公月夜泛江  
登金山鼓琴猿必嘯和曾佐度人李錡幕  
至金陵屢讚招隱寺標致一日度人宴寺  
中明日謂曰子嘗稱招隱標致昨日遊宴  
何殊州中約曰某所賞者踈野耳若遠山  
將翠幕遮古松用絳物裹羶腥澆鹿跑泉  
音樂亂山鳥聲此則實不如在叔父大廳  
也性又嗜茶能自煎曰茶須緩火炙活火  
煎活火炭有焰者曾奉使行陝州峽石縣



東愛渠水清流旬日忘發梁武造寺令蕭  
子雲飛白大書一蕭字約自江淮竭產致  
歸洛中扁於小亭號曰蕭齋

### 陳通方

通方登正元進士第與王播同年辛播年五十  
六通方甚少因期集撫播背曰王老奉贈  
一第言其日暮途遠及第同贈官也播恨  
之後通方丁家難辛苦萬狀播捷三科為  
正郎判鹽鐵通方窮悴求助不甚給之時  
李虛中為副使通方以詩求為汲引云應  
念路傍憔悴翼昔年喬木幸同遷播不得  
已薦為江西院官

### 楊炎

元載末年納薛瑤英為姬處以金絲帳却塵  
褥衣以龍銷衣載以瑤英體輕不勝重衣  
於異國求此服也惟賈至與炎雅與載善  
往往時見其歌舞至贈詩曰舞怯銖衣重  
笑疑桃臉開方知漢成帝空築避風臺炎



亦贈歌云雪面淡眉天上女鳳簫鸞翅欲  
飛去玉容翹翠步無塵楚腰如柳不勝春  
炎字公南常袞長於除書炎善德音自開元  
後言制詔者稱常楊元載與炎同尋炎又  
元出也故擢炎禮部侍郎德宗時位宰相

裴度

公赴敵淮西題名華嶽廟之關門大順中戶  
部侍郎司空圖以一絕紀之曰嶽前大隊  
赴淮西從此中原息戰鼙石關莫教苔蘚

上分明認取晉公題

樂天求馬裴贈以馬因戲云君若有心求逸  
足我還留意在明珠引妾換馬之事樂天  
答曰安石風流無柰何欲將赤驥換青娥  
不辭便送東山去臨老何人與唱歌

中書即事云有意效承平無功益聖明灰心  
緣忍事霜鬢為論兵道直身還在恩深命  
轉輕鹽梅非擬議葵藿是平生白日長懸  
照蒼蠅謾發聲嵩陽舊田地終使謝歸耕



韓愈

喚起窓全曙催歸日未西無心花裏鳥更與  
盡情啼乃二禽名也喚起聲如絡繹間轉  
清亮偏鳴於春曉江南謂之春喚催歸子  
規也

元和十二年裴度宣慰淮西奏公行軍司馬  
有從軍洎途中諸篇其間次潼關寄張十  
二使君詩云荆山已去華山來日照潼關  
四扇開刺史莫辭迎候遠相公新破蔡州

迴又次潼關上都統相公云暫辭堂印執  
兵權盡管諸軍破賊年冠蓋相望催入相  
待將功德格皇天又桃林夜賀晉公云西  
來騎火照山紅夜宿桃林臘月中手把命  
珪兼相印一時重疊賞元功數篇皆有與  
旨元濟平遷刑部侍郎

十四年正月表乞燒棄佛骨疏入貶潮陽刺  
史有次藍關示姚孫湘詩云一封朝奏九  
重天夕貶潮陽路八千欲為聖明除弊事



豈將衰朽計殘年。雲橫秦嶺家何在。雪擁  
藍關馬不前。知汝遠來應有意。好收吾骨  
瘴江邊。是歲十月。量移袁州。刺史酬張韶  
州詩云。明時遠逐事何如。遇赦移官罪未  
除。北望詎令隨塞鴈。南遷總免葬江魚。將  
經貴郡須留客。先惠高文謝起予。暫欲繫  
舟韶石下。上賓虞舜整冠裾。

又留別張使君云。來往再逢梅柳新。別離一  
醉綺羅春。夕欽紅綵文才妙。自嘆虞翻骨

相屯。鳴笛急吹催落日。清歌緩送感行人。  
已知奏課當徵拜。那復淹留詠白蘋。

張籍

籍宿江上詩云。楚驛南渡口。夜深來客稀。月  
明見潮上。江靜覺鷗飛。旅次今已遠。此行  
殊未歸。離家久無信。又聽搗寒衣。或云劉  
長卿餘干旅舍云。搖落暮天迥。丹楓霜葉  
稀。孤城向水閉。獨鳥背人飛。渡口月初上。  
鄰家漁未歸。鄉心正欲絕。何處搗征衣。槩



相類也籍字文昌和州人歷水部外郎終  
主客郎中

蕃漢斷消息死生長別離句常於送人處憶  
得別家時句流光暫出還入地使我年少  
不須臾

送裴相公鎮太原云盛德雄名遠近知功高  
先乞守藩籬銜恩暫遣分龍節署勅還同  
在鳳池天子親臨樓上送朝官盡出道邊  
辭明年塞北諸蕃落應起生祠請立碑

白樂天讀籍詩集云張公何為者業文三十  
春尤攻樂府詞舉代少其人姚合讀籍詩  
有詩云妙絕江南曲淒涼怨女詩古風無  
敵手新語足人知

李道昌

道昌唐大曆十三年為蘇州觀察使一日郡  
城外虎丘山有鬼題詩二首隱于石壁之  
上云青松多悲風蕭蕭聲且哀南山接幽  
隴幽隴空崔嵬白日徒昭昭不照長夜臺



誰知生者樂魂鬼安能迴况復念所親慟  
哭心肝摧慟哭更何言哀哉復哀哉又曰  
神仙不可學形化空遊魂白日非我朝青  
松為我門雖復隔幽顯猶知念子孫何以  
遣悲惋萬物歸其根寄語世上人莫厭臨  
芳樽莊生問枯骨主樂成虛言道昌異其  
事遂具奏聞准勅令致祭道昌為其文曰  
嗚呼萬古丘陵化無再出君若何人能行  
詩筆何代而亡誰人子姪曾作何官是誰

仙室寂寞夜臺悲乎白日不向紙上石中  
隱出桃源三月深草垂楊黃鶯百轉猿聲  
斷腸不題姓字寧辯賢良嗚呼哀哉嘆昔  
青松嶺上嵯峨碧山大唐王業已記詩言  
痛復痛兮何處寘悲復悲兮萬古墳能作  
詩兮動天地聲悲怨兮淚霑巾感我皇兮  
列清酌願當生兮事明君是時祭後經數  
日再有詩一絕于石云幽冥雖異路平昔  
忝攻文欲知潛昧處山北兩孤墳後於寺



山之北果有二墳極高大荆榛聚茂詢諸  
耆老竟不知姓氏至今猶存皮日休和云  
念爾風雅魂幽咽能攻文空令傷魂鳥啼  
破山邊墳陸龜蒙和云靈氣猶不死尚能  
成綺文如何孤窆裡猶自讀三墳

陸暢

暢字達夫吳郡人韋臯雅所厚禮天寶時李  
白為蜀道難以斥嚴武暢更為蜀道易以

姜臯

又經崔諫議林亭云蟬噪入雲樹風開無主  
花初為江西王仲舒從事拂衣去後遇雲  
陽公主下降百僚舉暢為儂相詩皆頃刻  
而成詠簾日勞將素手捲蝦鬚瓊室流光  
更綴珠玉漏報來過夜半可堪潘岳立  
踟躕詠行帳日碧玉為竿丁字成鴛鴦繡帶  
短長馨強遶天上花顏色不隔雲中笑語  
聲



詔作催粧五言曰雲陽公主貴出嫁五侯家  
天母親調粉日兄憐賜花催鋪百子帳待  
障七香車借問粧成未東方欲曉霞內人  
以其吳音捷才以詩嘲之云十二層樓倚  
翠空鳳鸞相對立梧桐變成走報監門衛  
莫使吳飲入漢宮或曰宋若蘭姊妹作陸酬曰粉面  
仙郎選尚朝偶逢秦女學吹簫須教翡翠  
聞王母不柰烏鳶噪鵲橋六宮大哈別賜  
宮錦楞伽餅唾盂各一

暢謁韋臯作蜀道易詩云蜀道易易於履平  
地臯大喜臯薨朝廷欲繩其既往之事復  
閱先進兵器上皆刻定秦二字不相與者  
皆造成罪名暢上疏理之曰臣在蜀日見  
所造兵器定秦者匠名也由此得釋段成  
式曰暢江東人語多差誤人以為劇語初  
娶董溪女每旦婢進澡豆暢輒沃水服之  
或曰君為貴門女壻幾多樂事陸暢曰貴  
門苦禮法俾予食辣麩殆不可過



李翱

翱在潭州席上有舞柘枝者顏色憂悴殷堯  
藩侍御當筵贈詩曰姑蘇太守青娥女流  
落長沙舞柘枝滿座繡衣皆不識可憐紅  
臉淚雙垂翱詰其事乃姑蘇臺常中丞愛  
姬所生之女夏卿之裔曰妾以昆弟夭折  
委身樂部恥辱先人言訖涕咽情不能堪  
亞相為之吁嘆且曰吾韋族姻舊速命更  
其舞衣飾以桂襦迺與韓夫人相見夫人吏部

之顧其言語清楚宛有冠蓋風儀遂於賓  
榻中選士而嫁之舒元興侍郎聞之自京  
馳詩曰湘江舞罷忽成悲便脫蠻靴出絳  
幃誰是蔡邕琴酒客魏公懷舊嫁文姬  
李翱薦孟郊於張建封云茲有平昌孟郊正  
士也伏聞執事舊知之郊為五言詩自前  
漢李都尉蘇屬國及建安諸子南朝二謝  
郊能兼其體而有之李觀薦郊於梁肅補  
關書曰郊之五言詩其有高處在古無上



其有平處下顧兩謝韓送郊詩曰作詩三百首杳默咸池音彼三子皆知言也豈欺天下之人哉郊窮餓不得安養其親周天下無所遇作詩曰食齋腸亦苦強歌聲無權出門即有礙誰謂天地寬其窮也甚矣允聖人竒士自以所負不苟合於世是以雖見之難得而知也見而不能知其賢如勿見而已矣知其賢而不能如勿知其賢而已矣用而不能盡其才如勿用而已

矣盡其才而容讒人之所間者如勿盡才而已矣故見賢而能知知而能用用而能盡其才而不容讒人之所間者天下一人而已矣郊下第詩曰棄置復棄置情如刀劒傷又再下第詩曰一夕九起嗟夢知不到家兩度長安陌空將淚見花而後及第有詩曰昔日齷齪不足嗟今朝曠蕩恩無涯青春得意馬蹄疾一日看盡長安花一日之間花即看盡何速也果不達



劉又

劉又節士也。少放肆為俠首，因酒殺人亡命。會赦出，更折節讀書，能為歌詩。然恃故時所負，不能俛仰貴人。聞韓愈接天下士，步謁之作，冰柱雪車二詩出，盧孟右、樊宗師見為獨拜。後以爭語，不能下賓客，因持愈金數斤去，曰：「此諛幕中人得耳，不若與劉君為壽，愈不能止歸齊魯，不知所終。」

楊巨源

楊巨源以三刀夢益州，一箭取遼城，得名。故樂天詩云：「早聞一箭取遼城，相識雖新有故情。」清句三朝誰是敵，白鬚四海半為兄。貧家雜草時時入，瘦馬尋花處處行。不用更教詩過好，折君官職是虛名。巨源後拜省郎，樂天復以詩賀云：「文昌新入有光輝，紫界宮墻白粉闌。曉日鷄人傳漏箭，春風侍女護朝衣。雪飄歌句高難和，鶴拂雲霄老慣飛。官職聲名俱到手，近來詩客似君。」



稀巨源字景山大中時為河中少尹  
何事慰朝夕不踰詩酒情山河空道路蕃漢  
共刀兵禮樂新朝市園林舊弟兄向風一  
點淚寒晚暮江平

歐陽詹

歐陽詹字行周泉州人初見技於常袞後見  
知於退之元賓終於四門助教李貽孫李  
其文曰君之文周詳切於情故叙事重復  
宜其掌代文柄以變風雅一命而卒天其

絕乎子賈早死孫澣

途中寄太原所思詩曰鷗鳧漸覺遠迴頭長  
路塵高城已不見況復城中人去意自未  
并居情諒猶辛萬里東北晉千里西南秦  
一履不出門一車無停輪流萍與匏繫早  
晚期相親或曰詹遊太原悅一妓將別約  
至都相迎故有早晚期相親之句妓思之  
不已得疾且甚乃刃其髻藏之謂女弟曰  
歐陽生至可以為信曰自從別後城容光



半是思即半恨即欲識舊來雲髻樣為奴  
開取縷金箱絕筆而逝及詹至如其言示  
之詹啓函一動而卒孟簡賦詩哭之序云  
穆玄道訪予常嘆俱事玄道頗惜之

袁高

禹貢通遠俗所圖在安人后王失其本職吏  
不敢陳亦有奸佞者因茲欲求身動生十  
金費日使萬姓貧我來顧渚源得與茶事  
親毗輟耕農來採採實苦辛一夫且當役

畫室皆同臻捫葛上敬壁蓬頭入荒榛終  
朝不盈掬手足皆鮮皴悲嗟遍空山草木  
為不春陰嶺牙未吐使者牒已頰心爭造  
化力先走銀臺筠選納無晝夜搗聲昏繼  
晨衆工何枯槁俯視彌傷神皇帝尚巡狩  
東郊路多堙周迴遶天涯所獻愈艱勤况  
值兵革困重茲困疲民未知供御餘誰合  
分此珍碩省忝邦守文慚復因循茫茫滄  
海間丹憤何由伸右高所賦茶山詩也案



唐制湖州造貢茶窠多謂之顧渚貢焙歲造一萬八千四百斤大曆後始有進奉建中二年高刺史進三千六百串并詩此一章刻石在貢焙故杜鴻漸與楊祭酒書云顧渚中山紫笋茶两片此物但恨帝未得嘗實所嘆息一片上太夫人一片克昆弟同歡開成三年以貢不如法停刺史裴克官

閻濟美

濟美大曆九年春下第將出關獻座主張謂詩六韻曰蹇諤王臣直文明雅量全望爐金自躍應物鏡何偏南國幽沉盡東堂禮樂宣轉令游藝士更惜至公年芳樹歡新景青雲泣暮天唯愁鳳池拜孤賤更誰憐謂覽之問失第之因具以實告謂深有遺才之歎乃曰所投六韻必展後效明年濟美自江東繼薦就試東都謂後主文雜文已文已過繼欲帖經濟美辭以不能謂曰



禮闈故事亦許作詩續帖遂命天津橋望  
洛城殘雪題濟美曰新霽洛城端千家積  
雪寒未收清禁色偏向上陽殘既而日勢  
已晚詩未就謂曰據見在將來一覽稱賞  
遂唱過盧景莊謂曰前足下試蜡日祈天  
宗賦以魯丘對衛賜則子貢也乃作駟字  
誤矣方悔之明日謂曰天寒急景諸君文  
卷不成未可以呈宰相請重送納既而索  
舊卷則駟字上朱點在焉易卷之意蓋有

在也到闕謂揖濟美曰前日春間遺才所  
投六韻不敢暫忘幸副素懷矣濟美紀其  
事曰前朝公相許與定分一面不忘美哉

裴交泰

長門怨云自閉長門經幾秋羅衣濕盡淚還  
流一種蛾眉明月夜南宮歌吹北宮愁范  
攄曰近日舉場詩尤新章孝標對月云長  
安一夜千家月幾處笙歌幾處愁有類乎  
裴交泰裴正元間詩人



劉竈

韋莊載竈長門怨云淚滴長門秋夜長愁心  
和雨到昭陽淚痕不學君恩斷拭却千行  
更萬行

元稹

稹聞西蜀薛濤有辭辯及為監察使蜀以御  
吏推鞠難得見焉嚴司空潛知其意每遣  
薛往泊登翰林以詩寄曰錦江滑膩蛾眉  
秀幻出文君與薛濤言語巧偷鸚鵡舌文

章分得鳳凰毛紛紛辭客多停筆箇箇公  
侯欲夢刀別後相思隔烟水菖蒲花發五  
雲高後蔗問浙東乃有劉採春自淮甸而  
來容華莫比元贈詩曰新粧巧樣畫雙蛾  
謾裹常州透額羅正面偷睛光滑笏緩行  
輕踏皺紋波言辭雅措風流足舉止低迴  
秀媚多更有惱人腸斷處選詞能唱望夫  
歌即羅噴之曲也元云在湔河七年因醉  
題東武其詩曰役役行人事紛紛碎簿書



功夫兩衙盡留滯七年餘病痛梅天發親  
情海岸疎因循未歸得不是憶鱸魚為好鏡湖  
郎簡求戲曰丞相雖不為鱸魚為好鏡湖  
春色耳謂秣春也

公先娶京兆韋氏字蕙叢韋逝為詩悼之曰  
曾經滄海難為水除却巫山不是雲

出本  
事傳

樂天在洛大和中積拜左丞相自越過洛以  
二詩別樂天云君應恠我留連久我欲與  
君辭別難白頭徒侶漸稀少明日恐君無

此歡又云自識君來三度別這回白盡老  
鬚鬚戀君不去君須會知得後回相見無  
未幾死于鄂樂天哭之曰始以詩交終以  
詩訣絃筆相絕其今日乎

屈指正元舊朝士幾人同見大和春

感興  
句兒

歌楊柳葉妾拂石留花  
句遠路事無限相  
逢唯一言月色照榮辱長安千萬門

逢白  
公句

白居易

張為以居易為廣大教化主取其讀史詩云



含沙射人影雖病人不知巧言誣人罪至  
死人不疑撥蜂殺愛子掩鼻戮寵姬弘恭  
陷蕭望趙高謀李斯陰德既必報陽禍豈  
虛施人事雖可罔天道終難欺明即有刑  
辟幽即有神祇苟免勿私喜鬼得而誅之  
又取得意減別恨半酣還遠程之句文人更  
留不得直入故山雲之句文長生不似無  
生理休向青山學煉丹之句文白髮鑷不  
盡根在愁腸中之句又與薛濤云峨眉山

勢接雲霓欲逐劉郎此路迷若似剡中容

易到春風猶隔武陵溪

樂天不為李贊皇公所喜每寄文章李緘之一

篋未嘗開劉夢得或請之曰見詞則迴吾  
心矣樂天未冠以文謁顧况况觀姓名熟  
視曰長安米貴居大不易乃捲卷讀其芳  
草詩至野火燒不盡春風吹又生嘆曰吾  
謂斯文遂絕今復得子矣前言戲之耳  
樂天賦性曠達其詩曰無事日月長不羈天



地濶此曠達之詞也孟郊賦性褊狹其詩  
曰出門即有礙誰謂天地寬此褊狹之詞  
也然則天地又何礙郊郊自礙耳

樊素善歌小蠻善舞樂天賦詩有曰櫻桃樊  
素口楊柳小蠻腰至於高年文賦詩曰失  
盡白頭伴長成紅粉娃因為楊柳詞以託  
意云一樹春風萬萬枝嫩於金色軟於絲  
永豐東角荒園裏盡日無人屬阿誰及宣  
宗朝國樂唱是詞帝問永豐在何處左右

具以對遂因命取永豐柳兩枝植於禁中  
自感上知又為詩云一樹衰殘委泥土雙  
枝移植天庭定知此後天文裏柳宿光  
中見兩暈洛下文士無不繼作韞常侍琮  
時為留守亦有詩和云折柳歌中得翠條  
遠移金殿種青霄上陽宮女吞聲送不分  
先歸舞細腰盧貞和一樹依依在永豐兩  
枝飛去杳無蹤玉皇曾採人間曲應逐歌  
聲入九重示意也



上唐詩話卷之上

國家圖書館, NATIONAL CENTRAL LIBRARY, TAIWAN, R.O.C.





全唐詩話目錄

卷中

牛僧孺

李紳

劉禹錫

陳潤

賈島

李正封

崔護

張又新

柳公權

陸鴻漸

章孝標

施有吾

孟簡

張肅遠



許康佐

張南史

徐凝

令狐楚

張仲素

郎士元

于良史

舒元興

李賀

柳宗元

邵真

李宣遠

王建

朱灣

蘇郁

韋丹

王播

周匡物

劉言史

劉猛

李餘

李涉

劉昭禹

孫昌胤

嚴休復

朱慶餘

楊虞卿

楊汝士

張志和

嚴維

李播

李德裕

鄭還古

裴休

薛平僚

元老會胡杲



古皎

劉真

鄭掇

盧真

張渾

白居易  
再見

項斯

滕邁

裴思謙

廖有方

姚合

朱雍

段文昌

劉郁伯

陳彥博

郭良驥

崔嘏

唐球

白敏中

魏扶

馬植

崔鉉

裴夷直

楊敬之

喻鳧

楊衡

王彥威

繁知一

雍裕之

張祐

李商隱

劉得仁

王智興

馬戴

李顥

李群玉



江庭筠

王起

丁稜

姚鵠

蒯希逸

黃頰

鄭畋

李彙征

劉威

崔郊

來鵬

杜牧

許渾

雍陶

李遠

趙嘏

韋承貽

段成式

韋鑿

李敬方

李邕

李洞

長孫翺

崔櫓



全唐詩話卷之中

牛僧孺

樂天夢得有除夜詩僧孺和云惜歲歲今盡  
少年應未知淒涼數流輩歡喜見孫兒暗  
減一身力潛添滿鬢絲莫愁花笑老花自  
幾多時

元和三年宣政殿試賢良方正能直言極諫  
科一十人登科其後僧孺李宗閔王起賈  
孟山人皆相父拜相先是白居易在翰林

NATIONAL CENTRAL LIBRARY, TAIWAN, R.O.C.



為考校官後僧孺罷相出鎮揚州居易在洛中有詩云北闕至東京風光十六程坐移丞相閣春入廣陵城紅旆擁雙節白鬚無一莖萬人開路看百吏立班迎闔外君彌重罇前我亦榮何須身自得將相是門生

公始至京置琴書灑澆間先以所業謁韓文公皇甫負外二公披卷卷首有說樂一章未閱其詞遽曰且以拍板為什麼對曰樂

句二公相顧大喜曰斯高文必矣公因謀所居二公良久曰可於客戶方稅一廟院公如所教二公復誨之曰某日可遊青龍寺薄暮而歸二公其日聯鑣至彼因大書其門曰韓愈皇甫湜同謁幾官先輩不遇翌日輦轂名士咸往觀焉奇章之名由是赫然矣或云僧孺登第與同輩登政事堂宰相曰掃廳奉候

樂氏求爭於維揚僧孺先有詩曰但愁封寄



去唐物或驚禪樂天云會教魔女弄不動  
是禪心樂天云思黯自誇前後服鍾乳三  
千兩而歌舞之妓甚多乃譁予衰老故答  
思黯詩云鍾乳三千兩金釵十二行妬他  
心似火欺我鬢如霜憊老資歌笑銷愁仰  
涓漿眼者狂不得狂得且須狂竒章又有  
詩云不是道公狂不得恨公逢我不教狂

李紳

紳初以古風求知於呂溫溫見齊煦誦憫農

詩曰春種一粒粟秋收萬顆子四海無閒  
田農夫猶餓死鋤禾日當午汗滴禾下土  
誰知盤中飧粒粒皆辛苦又曰此人必為  
卿相果如其言

紳字公垂中書令敬玄孫號短李穆宗召為  
翰林學士與李德裕元稹同時號三俊武  
宗時為相居位四年出鎮淮南卒

憶夜直金鑿奉詔承旨詩云月當銀漢玉繩  
低澗聽簫韶碧落齊門壓紫垣高綺樹閣



連青瑣近丹梯墨宣外溼催飛詔草定新  
忌促換題明日獨歸花路近可憐人世隔  
雲泥

劉禹錫

長慶中元微之夢得韋楚客同會樂天舍論  
南朝興廢各賦金陵懷古詩劉滿飲一盃  
飲已即成曰王濬樓船下益州金陵王氣  
黯然收千尋鐵鎖沉江底一片降幡出石  
頭人世幾回傷往事山形依舊枕寒流而

今四海為家日故壘蕭蕭蘆荻秋白公覽  
詩曰四人探驪龍子先獲珠所餘鱗爪何  
用耶於是罷唱

元和十年自朗州召至京戲贈看花君子云  
紫陌紅塵拂面來無人不道看花回玄都  
觀裏桃千樹盡是劉郎去後栽

再遊玄都觀絕句并序云余正元二十一年  
為屯田郎時此觀未有花是歲出牧連州  
貶朗州司馬居十年召至京師人人皆言



士手植仙桃滿觀如紅霞遂有前篇  
以志一時之事旋又出牧今十有四年復  
為主客郎中重遊玄都蕩然無復一樹惟  
兔葵燕麥動搖春風耳因再題二十八字  
以俟後遊時大和二年三月也詩云百畝  
庭中半是苔桃花淨盡菜花開種桃道士  
歸何處前度劉郎今又來

禹錫嘗對賓友每吟張博士籍詩云新酒欲  
開期好客衣冠暫脫見閑身對花木則吟

王右丞詩云興闌鳴鳥換坐久落花多白  
二十二好余秋水詠云東屯滄海閣南濱  
洞庭寬余自知不及韋蘇州春潮帶雨晚  
來急野渡無人舟自橫嘗過洞庭雖為一  
篇思杜負外落句云年去年來洞庭上白  
蘋愁殺白頭人鄙夫之言有愧於杜公也  
楊茂卿校書過華山詩曰河勢崑崙遠山  
形齒蕩秋此實為佳句

白居易任杭州刺史勢數妓還洛陽後却還



錢塘故禹錫戲荅云其那錢塘蘇小小憶  
君淚點石榴裙沈存中曰禹錫霓裳羽衣  
曲云三郎陌上望仙山歸作霓裳羽衣曲  
又王建詩云聽風聽雨作霓裳樂天詩注  
云開元中西涼府節度使楊敬述造鄭愚  
津陽門詩注云葉法善嘗引上入月宮聞  
仙樂及上歸但記其半遂於笛中寫之會  
西涼府都督楊敬述進婆羅門曲與其聲  
調相符遂以月中新聞為散序用敬述所  
進為其腔而名霓裳羽衣曲說各不同今  
蒲州道遙樓額上有唐人橫書類梵字相  
傳是霓裳譜字訓不通莫知是非或謂今  
燕部有獻仙音曲乃其遺聲然霓裳本謂  
之道調法曲今獻仙音乃小石調耳未知  
孰是

山園故國周遭在潮打空城寂寞迴淮水東  
邊舊時月夜深還過女牆來樂天棹頭苦  
吟黃真良久曰石頭詩云潮打空城寂寞



馮吾知後之詩人不復措辭矣

高錫金陵五題自序云

禹錫字夢得附叔文擢度支員外郎人不敢  
斥其名號二王劉柳憲宗立禹錫貶連州  
未至斥期州司馬作竹枝詞武元衡初不  
為宗元所喜自中丞下除右庶子及是執  
政禹錫久落魄乃作問大鈞謫九年等賦  
又叙張九齡事為詩欲感諷久之召還宰  
相欲任南省郎乃作玄都觀看花君子詩  
當路不喜出為播州易連州徙夔州由知

州刺史入為主客郎中後作遊玄都觀詩  
有兔葵燕麥之語聞者益薄其行俄分司  
東都裴度薦為集賢學士度罷出刺蘇州  
徙汝同二州會昌朝檢校禮部尚書卒

故國思如此若為天外心

寄白公句

湖上收宿雨

句故人日已遠窓下塵滿琴坐對一樽酒

恨多無力斟暮踈螢色迥露重月華深萬  
堯與群籟此時情豈任

無題

禪思何妨在玉

琴真傳不見聽時心秋堂境寂夜方半雲



才登梧湘水深

聽琴

夢得曰柳八駁韓十八平淮西碑云左殮右  
粥何如我平淮西雅云仰父俯子韓碑蓋  
有帽子使我為之便說用兵伐叛美夢得  
曰韓碑柳雅余為詩云賊中晨雞嗷嗷鳴  
滅上鼓角聲和平美勳之入蔡城也須臾  
之間賊無覺者又落句云始於元和十二  
載重見天寶昇平時以見平淮之年

陳潤

送路徵君云野人膺辟命溪上掩柴扉黃卷  
猶將去青山豈更歸馬留苔蘚迹人脫薜  
蘿衣他日相思處天邊望少微

潤大層間人終坊州郿城縣令樂天之外祖  
也丈夫不感恩感恩寧有決心頭感恩血  
一滴染天地

賈島

島字浪仙范陽人初為浮屠名無本能詩獨  
奇入僻以矯艷於元白來洛陽韓愈教



為文去浮屠舉進士終普州司戶喪久不  
第吟病蟬之句以刺公卿或奏島與平曾  
等為十惡逐之詩曰病蟬飛不得向我掌  
中行折翼猶能薄酸吟尚極清露華疑在  
腹塵點誤侵晴黃雀并烏鳥俱懷害爾情  
大中末授遂州長江簿初之任局東川守  
者厚禮之島獻感恩詩曰匏革奏終非獨  
樂軍城未曉啓重門何時却入三台貴此  
日空知八座尊羅綺舞間收雨點貌貅闌

外卷雲根遂遷屬吏隨賓列撥掉扁舟不  
忘恩自長江遷普州司倉方干自鏡湖寄  
詩曰亂山重復疊何路訪先生豈料多才  
者空垂不第名閑曹猶得醉薄俸亦勝耕  
莫問吟詩苦年年芳草平島至老無子因  
啖牛肉得疾終于傳舍

島詩有警句韓退之喜之其渡桑乾詩曰客  
舍并州已十霜歸心日夜憶咸陽無端更  
渡桑乾水却望并州是故鄉



江道中詩曰策杖馳山驛逢人問梓  
州長江何日到行客替生愁晉公度初立  
第於街西興化里鑿池種竹起臺榭島方  
下第或以為執政惡之故不在選怨憤題  
詩曰破却千家作一池不栽桃李種薔薇  
薔薇花落秋風起荆棘滿庭君始知背惡  
其不遜島為僧時洛陽令不許僧午後出  
寺島有詩云不知牛與羊猶得日暮歸韓  
愈惜其才仲反俗應舉貽其詩云孟郊死

葬北邙山日月星辰頓覺開天恐文章中  
斷絕再生賈島在人間由是振名或曰非  
退之詩

題杜司戶亭子云牀頭枕是溪邊石井底泉  
通竹下池宿客未眠過夜半獨聞山雨到  
來時

題李欵幽居云閑居少鄰並草徑入荒村鳥  
宿池中樹僧敲月下門過橋分野色移石  
到雲根暫去還來此幽期不負言

云身死聲名在多應萬古傳寡妻無



心破宅帶林泉塚近登山道詩隨過海

船故人相弔處斜日下寒天

夜半長安雨燈前越客吟船吳嘉長嶼夏雲

起汀洲芳草深句秋風吹渭水落葉滿長

安句山鍾夜渡空江水汀月寒生古石樓

句舊國別多日故人無少年句

### 李正封

唐文皇好詩大和中賞牡丹上謂程脩巳曰

今京邑人傳牡丹詩誰為首脩巳對曰中

書舍人李正封詩天香夜染衣國色朝酣

酒時楊妃侍上曰粧臺前宜飲以一紫金

盞酒則正封之詩見矣

退之正封從軍有晚秋壓城聯句詩正封云

從軍古云樂談笑青油幕燈明夜觀暮月

暗秋城柝遂為警策正封字中護終監察

御史

### 崔護

護字勣功正元十二年登第終嶺南節度使



沈存中云唐人以詩主人物故雖小詩莫不極工而後已所謂句鍛月鍊者信非虛言小說護題城南詩其始曰去年今日此門中人面桃花相映紅人面不知何處去桃花依舊笑春風後以其意未全語未工改第三句曰人面祇今何處去至今所傳有此兩本惟本事詩作祇今何處在唐人作詩大率如此雖有兩今字不恤也取語意為主耳後人以其有兩今字故多行前

篇

筆談

張又新

又新字孔昭薦之子附逢吉罷貶汀州刺史又附李訓訓死復坐貶終左司郎中時號又新張三頭謂進士狀頭宏詞勅頭京兆解頭又新嘗作廣陵從事有佐酒妓每致情焉後二十年罷江南郡舟道廣陵適李紳鎮淮南又新方懼其讐已而又遇風漂沒二子紳憫然復書曰端溪不讓之詞愚



周懷怨荆浦沈淪之事鄙實憫然宴遇殊  
厚前所謂酒妓者猶在席又新以指染酒  
即席為詞曰雲雨分飛二十年當時求夢  
不曾眠今來頭白重相見選上襄陽玳瑁  
筵李即命妓歌以送酒

柳公權

公權武宗朝在內庭上嘗怒一宮嬪久之既  
而復召謂公權曰朕恠此人若得學士一  
篇當釋然矣自御前蜀牋數十幅授之公

權畧不佇思而成一絕曰不分前時恠主  
恩已甘寂寞守長門今朝却得君王顧重  
入椒房拭淚痕上大說令宮人上前拜謝  
之

文宗時充翰林學士從幸永安宮苑中駐蹕  
謂公權曰我有一喜事邊上衣賜久不及  
時今年二月給春衣訖公權前奉賀上曰  
可賀我以詩宮人迫其口進公權應聲曰  
去歲雖無戰今年未得歸皇恩何以報春



日得春衣上悅激賞之。

文宗夏日與諸學士聯句曰入皆苦炎熱我  
愛夏日長公權續曰薰風自南來殿閣生  
微涼諸學士屬和帝獨諷公權兩句辭清  
意足不可多得乃令公權題於壁上字方  
圓五寸帝觀之嘆曰鍾王復生無以加矣  
公權字誠懸卒於太子太保

陸鴻漸

太子文學陸鴻漸名羽其先不知何許人景

陵龍蓋寺僧姓陸於堤上得初生兒收育  
之遂以陸為氏及長聰俊多聞學瞻詞逸  
詆諧辯捷性嗜茶始創煎茶法至今鬻茶  
之家陶為其像置於湯器之間云宜茶足  
利至大和中復州有一老僧云是陸僧弟  
子常諷其歌云不羨黃金罍不羨白玉杯  
不羨朝入省不羨暮入臺唯羨兩江水長  
向金陵城下來鴻漸又撰茶經三卷行於  
代今為鴻漸形因目為茶神有售則祭之



無則以釜湯沃之

章孝標

孝標元和十三年下第時輩多為詩以刺主  
司獨孝標為歸燕詩留獻侍郎庾承宣得  
詩展轉吟諷庾重典禮曹孝標未年登第  
詩云舊壘危巢泥已落今年故向社前歸  
連雲大厦無棲處更向誰家門戶飛孝標  
及第除正字東歸題杭州樟亭驛云樟亭  
驛上題詩客一半尋為山下塵世事日隨

流水去紅花還似白頭人初成落句云紅  
花真笑白頭人及為還似且曰我將老成  
名似我芳艷詎能久乎及還鄉而逝或曰  
前有八元後有孝標皆桐廬人復同姓而  
皆不達

李紳鎮揚州請孝標賦春雪詩命題於臺盤  
上孝標唯然索筆一揮云六出花飛處處  
飄點窓拂砌上寒條朱門到晚難盈尺盡  
是三軍喜氣銷



長安秋日云田家無五行水旱卜蛙聲牛犢  
乘春放兒孫候暖耕池塘煙未起桑柘雨  
初晴歲晚香醪熟村村自送迎

右二詩幸並  
又去集水六

施肩吾

看吾洪州人元和十年登第以洪州西山羽  
化之地慕其真風高蹈於此為詩奇麗著  
百韻山居詩才情富瞻如荷翻紫蓋搖波  
面蒲瑩青刀插水湄文煙粘薜荔龍鬚軟  
雨壓芭蕉鳳翅垂

隋曲有疎勒塩唐曲有突厥塩阿鵲塩或云  
關中人謂好為塩故有吾詩云顛狂楚客  
歌成雪媚嫵吳娘笑是塩盖當時語也今  
杖鼓譜中尚有塩杖聲

孟簡

元和中簡將試諸日者卜之曰近東門坐即  
得之矣既入即坐西廊迫晚忽得疾隣坐  
請與終篇見其姓即東門也乃擢上第  
簡字幾道德州人元和中為戶部侍郎以賊



賤後以太子賓客分司卒尤工詩尚節義

張肅遠

觀燈云十萬人家火燭光門門開處見紅粧  
歌鐘喧夜更漏暗羅綺滿街塵土香星宿  
別從天畔出蓮花不向水中芳寶釵驟馬  
多遺落依舊明朝在路傍肅遠元和進士  
登第與舒元興聲價俱美按席  
秦雲寂寂僧還定盡日無人麝繞床句日暮  
風吹官渡柳白鷗飛出石塢頭句雙雙

白燕入祠堂

北石洞王女祠句

許康佐

元稹酬許五康佐詩云猿啼三峽雨蟬報兩  
京秋珠玉慙新贈芝蘭忝舊遊他年問狂  
客須向老農求

康佐以中書舍人為翰林侍講學士與王起  
皆為文宗寵禮帝讀春秋至閹殺吳子餘  
祭問閹何人邪康佐以衆人方強不敢對  
帝嬉笑後問李訓訓曰國君不近刑人以



為輕死之道帝曰朕近刑人多矣得不慮  
哉訓曰列聖知而不能遠惡而不能去陛  
下念之宗廟福也於是衆謀剪除矣康佐  
終禮部尚書

張南史

陸贄宅秋雨中探韻云同人求日自相將深  
竹閑園偶辟強已被秋風交憶鱸更聞寒  
雨勸飛觴歸心莫問三江水旅服徒沾九  
月霜醉裏欲尋騎馬路蕭條幾處有垂楊  
南史字季直幽州人以試參軍避亂居揚  
州再召未赴而卒

徐凝

范攄言樂天為杭州刺史令訪牡丹獨開元  
寺僧惠澄近於京師得之植於庭時春景  
方深惠澄設油幕覆其上會凝自富春來  
未識白先題詩曰此花南地知難種慚愧  
僧閑用意栽海燕解憐頻睥睨胡蜂未識  
更徘徊虛生芍藥徒勞妬羞殺玫瑰不敢



開惟有數苞紅萼在。含芳只待舍人來。白  
尋到寺看花。乃命徐同醉而歸。時張祐榜  
舟而至。二生各希首薦。白曰。二君論文若  
蕪蘭之鬪鼠穴。勝負在於一戰也。遂試長  
劍倚天外。賦餘霞散成綺。詩試訖。解送。疑  
為元祐次耳。祐曰。祐詩有地勢。遙尊岳。何  
流側讓關。又題金山寺詩曰。樹影中流見  
鐘聲兩岸聞。雖碁母潛云。塔影掛青漢。鐘  
聲和白雲。此句未為佳也。疑曰。美則美矣。

爭如老夫。今古長如白練飛。一條界破青  
山色。遂擅場。祐嘆曰。榮辱糾紛。亦何常也。  
遂行歌而邁。凝亦鼓柁而歸。自是二生不  
隨鄉賦矣。白又以祐宮詞四句。皆數對。未  
足奇也。後杜牧守秋浦。與祐為詩酒友。酷  
吟祐宮詞。以白有非祐之論。常不平之。乃  
為詩以高之。曰。睫在眼前人不見。道於身  
外更何求。誰人得似張公子。千首詩輕萬  
戶侯。又曰。如何故國三千里。虛唱歌詞滿



六宮杜盛言其美者欲以苟異於白而曲  
成於張也故牧又著論言近有元白者喜  
為淫言媒語鼓扇浮囂吾恨方在下位未  
能以法治之斯亦敷佐於祐耳潘若冲郡  
閣雅談云凝官至侍郎多吟絕句曾吟廬  
山瀑布膾炙人口又題處州縉雲山黃帝  
上昇之所昂湖蓋黃帝鑄鼎處也有池在  
山頂詩云黃帝旌旗去不回空餘片石碧  
崔嵬有時風捲昂湖浪散作晴天雨點來

自後無敢題者凝送馬向遊蜀云遊子去  
咸京巴山萬里程白雲連鳥道青壁遮猿  
聲雨露經泥坂煙花帶錦城工文人共許  
應記蜀中行

青山舊路在白首醉還鄉

別白  
公句

試到第三橋

便入千頃花

句

宿冽上人房云浮生不定若蓬飄林下真僧  
偶見招覺後始知身是夢更聞寒雨滴芭  
蕉



令狐楚

楚自翰林學士拜相子綯自湖州召入翰林  
為學士間歲拜相渭南尉趙嘏獻詩曰鷓  
在卿雲冰在壺代天才業奉訐謀榮同伊  
陟傅朱戶秀比玉商入畫圖昨夜星辰回  
劍履前年風月滿江湖不知機務時多暇  
猶許詩家屬和無

張仲素

桂魄初生秋露微輕羅已薄未更衣銀箏夜

久殷勤弄心怯空房不忍歸

送春辭云日日人空老年年春更歸相歡在  
樽酒不用惜花飛

閨人思云愁見遊空百丈絲春風惹斷更傷  
離閑花落遍蒼苔地盡日無人誰得知

仲素字繪之建封之子憲宗以仲素段文昌  
為翰林學士韋貫之曰學士所以備顧問  
不宜專取辭藝罷之後終中書舍人

郎士元



送張南史云雨餘深巷靜獨酌送殘春車馬  
雖嫌僻鶯花不棄貧虫聲粘戶網鼠跡印  
床塵借問山陽會如今有幾人

士元字君胄中山人寶應中選畿縣官詔試  
中書補渭南尉歷拾遺郢州刺史高仲武  
云士元負外河岳英奇人倫秀異自家刑  
國遂擁大名右丞已後與錢卽于長自丞  
相以下出使作牧二公無詩祖錢時論鄙  
之兩公詞體大約欲同就中卽公稍更閑

雅近於康樂如荒城背流水遠鴈入寒雲  
又去鳥不知倦遠帆生暮愁又蕭條夜靜  
邊風吹獨倚營門望秋月可齊衡古人掩  
映時輩又暮蟬不可聽落葉豈堪聞古人  
謂謝朓工於發端比之於今有慚沮矣  
送彭將軍云雙旌漢飛將萬里授橫戈春色  
臨關盡黃雲出塞多鼓鞞悲絕漠烽火隔  
長河莫斷陰山路天驕已請和

于良史



春山夜月云春來多勝事賞翫夜忘歸  
淘水月在手弄花香滿衣興來無遠近  
欲去惜芳菲南望鍾鳴處樓臺深翠微

冬日寄李贊府云地險朝陽滿天邊宿霧收  
風蕪殘雪起河帶斷水流北關馳心極南  
圖尚旅遊登岸思不已何處得銷憂

閑居寄薛據云隱几讀黃老閑齋耳目清僻  
居人事少多病道心生雨洗山林濕鷓鳴  
池館晴晚來因廢卷行樂至西城

高仲武云良史工於清雅工於形似如風蕪  
殘雪起河帶斷水流吟文未終較然在目

舒元興

太和九年誅王涯等仇士良愈專恣文宗惡  
之雖登臨遊幸未嘗為樂或瞠目獨語左  
右莫敢進問因題詩曰輦路生春草上林  
花滿枝憑高何限意無復侍臣知一日看  
牡丹或吟曰拆者如語含者如咽俯者如  
愁仰者如悅吟罷方省元興詞不覺嘆息



泣下沾衣

李賀

杜牧之序其文集云賀字長吉元和中韓吏部亦頗道其歌詩雲煙綿聯不足為其態也水之迢迢不足為其情也春之盎盎不足為其和也秋之明潔不足為其格也風搖陣馬不足為其勇也瓦棺篆鼎不足為其古也時花美女不足為其色也荒國陵殿梗莽立隴不足為其恨怨悲愁也鯨味

鼉擲牛鬼蛇神不足為其虛荒幻誕也蓋騷之裔理雖不及辭或過之騷有感怨刺懟言及君臣理亂時有以激發人意而賀所為無得於是賀能採尋前事所以深嘆恨今古未嘗經道者如金銅仙人辭漢歌補梁庾有吾宮體謠求取情狀離絕遠去筆墨畦逕間亦殊不能知之賀生二十七年死矣世皆曰使賀且未死必加以理奴僕命騷可也



柳宗元

雪詩云千山鳥飛絕萬徑人蹤滅孤舟蓑笠

翁獨釣寒江雪

視鄭谷亂飄僧舍之句  
不作矣東坡居士云

子厚死三年愚溪無復曩時矣劉夢得聞之  
賦三絕云溪水悠悠春自來草堂無主燕  
飛迴隔簾惟見中庭草一樹山榴依舊開  
草聖數行留壞壁木奴千樹屬隣家惟見  
里門通德勝殘陽寂寞出樵車柳門竹巷  
依依在野草青苔日日多縱有鄰人解吹

筍山陽舊侶更誰過

邵真

尋人偶題云日昃不復午落花難歸樹人生  
能幾何莫厭相逢遇

真為李寶臣成德軍掌書記寶臣死其子惟  
岳與田悅李正己拒命真諫之惟岳審使  
真作奏復為將吏所沮德宗詔張孝忠朱  
滔合兵討惟岳大敗其衆惟岳召真議歸  
順悅遣扈歲來責惟岳且欲斬真惟岳懼



斬真以謝焉其後王武俊表其忠贈戶部尚書

李宣遠

宣遠正元進士登第并州路作云秋日并州路黃榆落照間孤城吹角罷數騎射鵬還帳幙遙臨水牛羊自下山征人正垂淚烽火起雲間

王建

千牛仗下放朝初玉案旁邊立起居每日請

來金鳳然殺頭無事不教書延英引對

碧衣即江硯宣毫各別床天子下簾親考

試宮人手裏過茶湯少年天子愛邊功

親到凌煙畫閣中為見勲臣寫圖本長教

殿裏作屏風新調白馬怕鞭聲供奉騎

來繞殿行為報諸王侵早起隔門催進打

毬名羅衫葉葉綉重重金鳳銀鷲各一

叢每遍舞頭分兩向太平萬歲字當中

魚藻宮中鎖翠娥先皇行處不曾過如今



池底休鋪錦菱角雞頭積漸多 射生宮  
女宿紅粧請得新弓各自張臨上馬時齊  
賜酒男兒跪拜謝君王 宮人早起笑相  
呼不識堦前掃地夫乞與金錢爭借問外  
頭還似此間無 日高殿裏有香煙萬歲  
聲來動九天妃子院中初降誕內人爭乞  
洗兒錢 銀燭秋光冷畫屏輕羅小扇撲  
流螢天階夜色涼如水卧看牽牛織女星  
樹頭樹底覓殘紅一片西飛一片東自

是桃花貪結子錯教人恨五更風 淡盡  
羅巾夢不成夜深前殿按歌聲紅顏未老  
恩先斷斜倚熏籠坐到明 鴛鴦瓦上忽  
然聲晝寢宮娥夢裏驚元是吾皇金彈子  
海棠花下打流鶯

建初為渭南尉值王樞密者盡宗人之分然  
彼我不均復懷輕謗之色忽過飲樞密深  
憾其讖乃曰吾弟所作宮詞天下皆誦於  
口禁掖深邃何以知之建不能對後為詩



次贈之乃脫其禍建詩曰先朝行坐鎮相  
隨今上春宮見長時脫下御衣偏得着進  
來龍馬每教騎常承密旨還家少獨對邊  
情出殿遲不是當家頗向說九重爭建外  
人知

### 李灣

高仲武云李灣率履正素放情江湖郡國交  
辟潛耀不起有唐高人也詩體幽遠興思  
洪深因詞寫意窮理盡性於詠物尤工如

受氣何曾異開花獨自遲所謂哀而不傷  
國風之深者也

灣為李勉永平從事灣秋夜燕王郎中宅賦  
得露中菊云衆芳春競發寒菊露偏滋受  
氣何曾異開花獨自遲晚成猶有分欲採  
未過時忍棄東籬下看隨秋草衰

長安喜雪云千門萬戶雪花浮點點無聲落  
毛溝全似玉塵消更積半成冰片結還流  
光含曉色清天苑輕逐微風透御樓平地



已霑盈尺潤年豐須賀富民侯

蘇郁

鸚鵡詞云莫把金籠閉鸚鵡箇箇分明解人語忽然更向君前語三十六宮愁幾許和戎詩云關月夜懸青塚鏡塞雲秋薄漢宮羅君王莫信和親策生得胡鷄轉更多郁正元元和間詩人十二樓藏玉堞中鳳凰雙宿碧芙蓉流霞淺酌誰同醉今夜笙歌第幾重按一盛詞吟倚雨殘澗月收山下村

韋卅

丹字公明京兆人幼孤從外祖顏真卿元和中帥江西有政績與東林靈澈上人為忘形之契丹嘗為思歸絕句以寄澈云王事紛紛無暇日浮生冉冉只如雲已為平子歸休計五老巖前必共聞澈奉酬詩曰年老身閑無外事麻衣草坐亦容身相逢盡道休官去林下何曾見一人

王播



王播少孤貧嘗客揚州惠照寺木蘭院隨僧齋殮僧厭怠乃齋罷而後擊鐘後二紀播自重位出鎮是邦因訪舊遊向之題者皆以碧紗幕其詩播繼以二絕句曰三十年前此院遊木蘭花發院新修如今再到經行處樹老無花僧白頭又上堂已了各西東慚愧闍黎飯後鐘三十年來塵撲面于今始得碧紗籠

出梅言

### 周匡物

匡物字幾本潭州人元和十一年李逢吉下進士及第時以歌詩著名家貧徒步應舉至錢塘乏僦船之資久不得濟乃題詩公館云萬里茫茫天塹遙秦皇底事不安橋錢塘江口無錢過又阻西陵兩信潮郡牧見之乃罪津吏

### 劉言史

皮日休劉棗強碑文云歌詩之風蕩來久矣大抵喪于南朝壞于陳叔寶然今之業是



者苟不能求古於建安即江左矣苟不能  
求麗於江左即南朝矣或過為艷傷麗病  
者即南朝之罪人也吾唐宋來有是業者言  
出天地外思出鬼神表讀之則神馳八極  
測之則心懷四溟磊磊落落真非世間語  
也自李太白百歲有是業者雕金篆玉牢  
竒籠怪百鍛為字千鍊成句雖不追躡太  
白亦後來之佳作也其與李賀同時有劉  
棗強焉先生姓劉氏名言史不詳其鄉里

所有歌詩千首其美惡恢膽自賀外世莫  
得比王武俊之節制鎮冀也先生造之武  
俊雄健頗好詞藝一見先生遂加異敬將  
署之賓位先生辭免武俊善騎射載先生  
以貳乘逞其藝於野武俊先騎驚雙鴨起  
於蒲稗間武俊控弦不再發雙鴨聯蹙於  
地武俊歎甚命先生曰某之伎如是先生  
之詞如是可謂文武之會矣何不一言以  
讚邪先生由是馬上草射鴨歌以示武俊



議者以為禰正平鸚鵡之類也。武俊益重先生。由是奏請官先生。詔授棗強令。先生辭疾不就。世重之曰：劉棗強亦如范滂無之類焉。故相國隴西公夷簡之節度漢南也。少與先生遊。且思相見。命列將以襄之。豫器千事。賂武俊。以請先生。武俊許之。先生由是為漢南相府賓。冠隴西公。日與之為飲。宴具獻酬之儀。歌詩大播于當時。為隴西公從事。或曰：以某下走之才。誠不足

污辱重地。劉棗強至重。必以賓劉於幕吏之上。何抑之如是。公曰：愚非惜幕間一足地。不容劉也。然視其狀。有不足稱者。諸公視某與劉分。豈有間哉。然反為之惜其壽耳。後不得已。問先生所欲為。先生曰：司功掾甚閑。或可承闕相國。由是掾之。雖居官曹。宴見與從事儀等。後從事又曰：劉棗強縱不容在賓署。承乏於掾曹。誣矣。奚不疏整其秩。相國不得已。而表奏焉。詔下之日。



先生不恙而卒相國哀之慟曰果然止掾  
曹然吾愛客葬之有加等墳去襄陽郭五  
里曰柳子關後先生數十歲日休始以鄙  
文稱於襄陽襄陽邑人劉求高士也嘗述  
先生之道業嘗誅先生之歌詩且嘆曰襄  
之人只知有浩然墓不知有先生墓恐百  
歲之後湮滅而無聞與荆棘凡骨溷吾子  
之文吾當刊焉日休幸存既披實錄之何  
愧嗚呼先生之官卑不稱其德宜加私謚

然棗強之號世已美矣故不加焉是為劉  
棗強碑

劉猛

月生十五前日望光彩圓月滿十五後日畏  
光彩瘦不見夜光色一罇成暗酒匣中女  
背鏡光短不照空不惜補明月慙無此良  
工月生自念數年間兩手中藏鈎於心且  
無恨他日為我羞古老傳童歌連淫亦兵  
象夜夢戈甲鳴苦不願年長苦雨朝梳一



把白衣淚千滴雨可耻垂拱時老作在家

女白晚

元微之酬劉猛見送詩如云神劍土不蝕異  
布火不燒其推重如此

李餘

長安東門別立馬生白髮白霰後新蓋繁南

山瑞烟發白嘗聞車馬繁土薄憂水聲白

餘發長慶三年進士第蜀人也張籍送餘歸  
蜀詩云十年人諫好詩章今日成名出舉

場歸去唯將新諾牒後來爭取舊衣裳山  
橋曉上蕉花暗水店晴看芋葉北鄉里親  
情相見日一時携酒上高堂

又賈島送餘往湖南云昔去候溫涼秋山滿  
蜀鄉今來從辟命春物變潯陽岳石掛海  
雪野楓堆渚橋若尋吾祖宅寂寞在瀟湘

李涉

題鶴林寺僧室云終日昏昏醉夢間忽聞春  
盡強登山因過竹院逢僧話又得浮生半



日聞

晚泊潤州聞角云孤城吹角水茫茫曲引邊  
聲怨思長驚起暮天沙上鴈海門斜去兩  
三行

但將鍾鼓悅私愛肯以犬羊為國羞白尼父  
未適魯僕僕倦迷津徒懷教化心紆轡不  
能伸一遇知己言萬方始喧喧至今百王  
則孰不挹其源白

劉昭禹

昭禹字休明婺州人也少師林寬為詩刻苦  
風雪詩云句向夜深得心從天外歸  
嘗與人論詩曰五言如四十箇賢人著一字  
如屠沽不得覓句者若搥得玉合子底必  
有蓋但精心求之必獲其寶在湖南累為  
宰後署天策府學士嚴州刺史卒于桂州  
幕中有詩三百首

孫昌胤

和司空曙劉慎虛九日送人云京邑嘆離群



江樓喜遇君開筵當九日泛菊外浮雲朔  
詠山川霽酣歌物色曛君看酒中意未肯  
喪斯文

柳子厚與韋中立書云古者重冠禮將以責  
成人之道是聖人所尤用心者也數百年  
來人不復行近有孫昌胤者獨發憤行之  
既成禮明日造朝至外庭薦笏言於鄉士  
某子冠畢應之者咸憮然京兆尹鄭叔則  
佛然曳笏却立曰何預我邪廷中皆大笑  
天下不以非鄭尹而怪孫子何哉獨為所  
不為也昌胤登天寶進士第

嚴休復

揚州唐昌觀玉藥花拆有仙人遊悵然成二  
絕云終日齋心禱玉宸魂銷目斷未逢真  
不如滿樹瓊瑤藥笑對藏花洞裏人又羽  
車潛下玉龜山塵世何由覩舜顏唯有無  
情枝上雪好風吹綴綠雲鬟

元和中見一女子從以二女冠三小僕直造



花所佇立良久命小童折花數枝謂黃冠者曰曩有玉峰之期自是可以行矣行百步許遂不復見休復有詩元微之和云弄玉潛過玉樹時不教青鳥出花枝的應未有諸人覺只恐嚴郎卜得知

樂天詩云羸女輸乘鳳下時洞中潛歌弄花枝不綠啼鳥春饒舌青瑣仙郎可得知

朱慶餘

夢餘遇水部郎中張籍知音索慶餘新舊篇

擇留二十六章置之懷袖而推贊之時人以籍重名皆繕錄諷詠遂登科慶餘作閨意一篇以獻曰洞房昨夜停紅燭待曉堂前拜舅姑粧罷低聲問夫婿畫眉深淺入時無籍酬之曰越女新粧出鏡心自知名豔更沉吟齊紈未足時人貴一曲菱歌敵萬金由是朱之詩名流於海內矣

又題王侯廢宅云古巷戟門誰舊宅早曾聞說屬官家更無新燕來巢屋唯有閑人去



看花空廐欲摧塵滿櫪小池初涸草侵沙  
繁華事歇皆如此立馬踟躕到日斜

張籍送慶餘歸越云東隣歸路遠幾日到鄉  
中有寺山皆遍無家水不通湖聲蓮葉雨  
野氣稻苗風州縣知名久爭邀與客同

楊虞卿

過小妓英英墓云凌晨騎馬出皇都聞說埋  
花在路隅別我已為泉下土思君猶似掌  
中珠四絃品柱聲初絕三尺孤墳草已枯

蘭質蕙心何所在焉知過者是狂夫樂天  
夢得皆有和章

樂天云人間有夢何曾入泉下無家豈是歸  
墳上少啼留取淚明年寒食更霑衣

夢得云但見好花皆易落從來尤物不長生  
鸞臺夜直衣衾冷雲雨無因入禁城

虞卿字師臯虢州人佞柔善諧麗宗閔僧孺  
相穆宗引為右司郎中宗閔倚之時號黨  
魁為京兆尹以罪貶虔州司戶叅軍死



揚汝士

唐名族重京官而輕外任汝士建節後詩云  
拋却弓刀上坳臺上方樓殿宰雲開山僧  
見我衣裳窄知道新從戰地來又云而今  
老大駢官馬羞向關西道姓揚寶曆中揚  
於陵僕射入覲其子嗣復率兩榜門生迎  
於潼關宴新昌里第嗣復領諸生翼兩序  
元白俱在賦詩席上汝士詩後成元白覽  
之失色詩曰隔座應須賜御屏盡將仙翰

入高宴文章舊價留鸞掖桃李新陰覆鯉  
庭再歲生徒陳賀宴一時良史盡傳馨當  
時疏廣雖云盛詎有茲筵醉醪醢其日大

醉歸謂其子弟曰吾今日壓倒元白

為刑侍

裴令公居守東洛夜宴半酣公索句元白有  
德色時公為破題次至汝士曰昔日蘭亭  
無豔質此時金谷有高人白知不能加遽  
裂之曰笙歌鼎沸勿作冷澹生活元顧曰  
樂天所謂能全其名者也



張志和

漁父歌云西塞山前白鷺飛桃花流水鱖魚肥青翦笠綠蓑衣斜風細雨不須歸又云釣臺漁父褐為裘兩兩三三舴艋舟能縱棹慣乘流長江白浪不曾憂又云雪溪灣裏釣魚翁舴艋為家西復東江上雪浦邊風笑着荷衣不嘆窮又云松缸鱸舍主人觀菰飯尊羹亦共食楓葉落荻花乾醉宿漁舟不覺寒又云青草湖中月正圓巴陵

漁父棹歌連釣車子搥頭船樂在風波不用仙

嚴維

維字正文越州人與劉長卿善長卿對酒寄維云陋巷喜陽和衰顏對酒歌懶從華髮亂閑住白雲多郡簡容垂釣家貧學弄梭門前七里瀨早晚子陵過維荅云蘇耽佐郡時近出白雲司藥補清羸疾窓吟絕妙詞柳塘春水漫花塢夕陽遲欲識懷君意



朝朝訪檝師

時劉為駐州司馬

### 李播

播以郎中典蘄州有李生攜詩謁之播曰此吾未第時行卷也李曰頃於京師書肆百錢得此游江淮間二十餘年欲幸見惠播遂與之因問何往曰江陵謁盧尚書播曰公又錯也盧是某親表李慚悚失次進曰誠若郎中之言與荆南表文一時乞取拜拜而出

### 李德裕

元和十一年歲在丙申李逢吉下三十三人皆取寒素時有詩曰元和天子丙申年三十三人同得仙袍似爛銀文似錦相將白日上青天德裕頗為寒素開路及謫官南去或有詩曰八百孤寒齊下淚一時回首望崖州

出機言

### 鄭還古

還古閑居東都將入京赴選擲當將軍者錢



之酒酣以一詩贈柳氏之妓曰冶豔出神  
仙清聲勝管絃詞輕白紵曲歌過碧雲天  
未擬主裴秀何如乞鄭玄不堪金谷水橫  
過墜樓前柳喜甚曰專俟榮命以此為賀  
未幾還古除國子博士柳見除目即遣入  
京又嘉祥驛而還古物故乃放妓他適逸  
史載還古初娶柳氏女嘉會之初夢娶房  
氏後柳卒再娶東都李氏屬房直溫為東  
洛少尹李之舅也禮宴皆房主之始知舊

夢之前定也還古登元和進士第

裴休

贈黃蘗山僧希運詩曰自從大士傳心印額  
上圓珠七尺身拄錫十年棲蜀水浮盃今  
日渡江濱一十龍象隨高步萬里香華結  
勝因擬欲事師為弟子不知將法付何人  
休會昌中官于鍾陵請還至郡以所解一  
篇示之師不顧曰若形於紙墨何有吾宗  
休問其故曰上乘之印唯是一心更無別



法心體一空萬緣俱寂如大日輪升於虛  
空其中照耀靜無纖埃證之者無新舊無  
淺深說之者不立義辭不開戶牖直下便  
是動念即乖其後休錄之為傳心法要云  
休字公羨孟州人大中六年為相能文章  
為人醞籍進止雍閑宣宗曰休真儒者

薛宜僚

宜僚以左廢子克新羅冊贈使至青州悅一  
妓段東美賦詩曰阿母桃花方似錦王孫

草色正如煙不須更向滄溟望惆悵歡情  
又一年到外國謂判官苗甲曰東美何故  
頻見夢中數日而卒觀至青段莫之一慟  
而卒

九老會胡杲

九老會賦詩云閑居同會在三春大抵愚年  
最出群霜鬢不嫌盃酒興白頭仍愛玉爐  
薰徘徊玩柳心猶健老大看花意却勤鑿  
落滿斟拚酩酊香囊高挂任氤氳搜神得



句題紅紙望景長吟對白雲今日交情何  
不替齊年同事聖明君

果年八十九  
懷州司馬

吉皎

休官罷任已閑居林苑園亭興有餘對酒最  
宜花藻發邀歡不厭拆條初低腰醉舞垂  
緋袖擊筍謳歌任褐裾寧用管絃來會雜  
自親松竹且清虛飛觥酒到須先酌賦詠  
詩成不住書借問商山賢四皓不知此後

更何如

皎  
年八十八





劉真

垂絲今日幸同筵，未紫居身是大年。賞景尚  
知心未退吟詩，猶覺力完全。閑庭飲酒當  
三月，在席揮毫象七賢。山茗煮時秋霧碧，  
玉盃斟處彩霞鮮。臨階花笑如歌妓，傍竹  
松聲當管絃。雖未學窮生死訣，人間豈不  
是神仙。

真前雖刑制  
史年八十七

鄭據

東洛幽閒日暮春，邀歡多是白頭賓。官班朱





紫多相似年紀高低次第勻  
聯句每言松竹意停盃多說古今人  
更無外事來心肺空有清虛入  
思神醉舞兩迴迎勸酒狂歌一曲  
會閑身今朝何事偏情重同作明時  
列任臣

據前龍武軍長史年八十五

### 盧貞

三春已盡洛陽宮天氣初晴景象中  
千朵嫩桃迎曉日萬株垂柳逐和風  
非論官位皆相似及至年高亦共同  
對酒歌聲猶覺妙

玩花詩思豈能窮先時共作三朝貴  
今日猶逢七老翁但願醪醕常滿酌  
煙霞萬里

會應通

貞前侍御史內供奉官年八十三

### 張渾

幽亭春盡共為歡印綬君身是大官  
迹豈勞登遠岫垂絲何必坐溪磻  
詩聯六韻猶應易酒飲三盃未覺難  
每况襟懷同宴會共將心事比波瀾  
風吹野柳懸羅帶日照庭花落綺紈  
此席不須鋪錦帳斯筵堪作



畫圖看

薄前未州刺  
史年七十七

白居易

七人五百八十四拖紫紆朱垂白鬢囊裏無  
金莫嗟嘆樽中有酒且歡娛吟成六韻神  
還壯飲到三杯氣尚奮崑崙我狂歌教婢拍  
婆娑醉舞遺絲扶天年高邁二疎傳人數  
多於四皓圖除却三山五天竺人間此會  
且應無君易刑部尚書  
致仕年七十四  
樂天退居洛中作尚齒九老之會其序曰胡

吉劉鄭盧張等六賢皆多壽余亦次焉於  
東都弊居獲道坊為尚齒之會七老相顧  
既醉且靜而思之此會希有因各賦七言  
六韻詩一章以記之或傳諸好事者時會  
昌五年三月二十四日樂天云其年夏又  
有二老年貌絕倫同歸故鄉亦來斯會續  
命書姓名年齒寫其形貌附于圖右與前  
七老題為九老圖仍以一絕贈之云雪作  
鬚眉雲作衣遼東華表暮雙歸當時一鶴



猶希有何况今逢兩令威

洛中遺老李元

六禪僧如滿

年九十五歲又云時秘書狄兼謨河南尹

盧貞以年未及七十雖與會而不及列

### 項斯

斯字子遷江東人始未為聞人因以卷謁楊敬之揚苦愛之贈詩云幾度見詩詩盡好及觀標格過於詩平生不解藏人善到處逢人說項斯未幾詩達長安明年擢上第蒼梧雲氣詩云何年畫作愁漠漠便難收

數點山能遠平鋪水不流濕連湘竹暮濃  
蓋舜墳秋亦有思鄉客看來盡白頭

### 滕邁

湖州崔芻言即中初為越副戎宴席中有周德華者劉採春女善歌楊柳枝詞所唱七八篇皆名流之詠滕邁即中一首云三條陌上拂金羈萬里橋邊映酒旗此日令人腸欲斷不堪將入笛中吹

雲溪子曰杜牧舍人云巫娥廟裏低含雨宋



玉堂前斜帶風滕郎中又云陶令門前骨  
接籬亞夫營裏拂旌旗但不言楊柳二字  
最為妙也是以姚合郎中吟道傍亭子詩  
云南陌遊人迴首去東林過者杖藜歸不  
稱亭而意見矣邁登元和進士第

裴思謙

思謙及第後作紅牋名紙十數詣平康里因  
宿於里中詰旦賦詩曰銀缸斜背解鳴璫  
小語偷聲賀玉郎從此不知蘭麝貴夜來

新染桂枝香思謙開成三年登上第

廖有方

有方元和十年失意遊蜀至寶雞西界筵旅  
遊者書版記之曰余元和乙未歲落第西  
征此聞呻吟之聲潛聽而微憫也 問其  
疾苦住止對曰辛勤數舉未遇知音眊眊  
叩頭久而復語唯以殘骸相託餘不能言  
俄而逝余乃鬻所乘馬於村豪備棺瘞之  
恨不知其姓字臨岐悽斷復為詩曰嗟君



沒世委空囊。幾度勞心翰墨場。半面為君  
申一慟。不知何處是家鄉。明年李逢吉。擢  
有方及第。唐之義士也。交州人。柳子厚以  
亭送之。

姚合

張籍寄合詩云。病來辭赤縣。按上有丹經。為  
客燒茶竈。教兒掃竹亭。詩成添舊卷。酒盡  
卧空瓶。闕下今遺逸。誰占隱士星。

武功縣開君云。將去京城遠。為官與隱齊。馬

隨山鹿。放雞雜野禽。棲連舍。惟藤架。侵堦  
是藥畦。更師嵇叔夜。不擬作書題。

又云。簿書多不會。簿俸亦難消。醉卧慵開眼。  
閑行懶繫腰。移花兼蝶至。買石得雲饒。耳  
目心中樂。從他笑寂寥。

方干哭姚監云。入室幾人成弟子。為儒是處  
哭先生。

宋雍

范攄云。宋雍初無令譽。及嬰瞽疾。其詩名始



彰盧負外綸作擬僧之詩僧清江作七夕  
之詠劉隨州有眼作無眼之句宋雍無眼  
作有眼之詩詩流以為四背或云四倒然  
辭意悉為佳致盧公詩云願得遠公知姓  
字焚香洗鉢過餘生清江詩曰唯愁更漏  
促離別在明朝劉隨州曰細雨濕衣看不  
見閑花落地聽無聲雍詩曰黃鳥不堪愁  
裏聽綠楊宜向雨中看

段文昌

文昌父鐔為江陵尉文昌自渚宮客遊成都  
韋南康與奏釋褐為賓從後劉闢逐在外  
邑高崇文牧蜀召復舊職指其擗曰此猶  
不足與君坐文昌遽請歸闕至與元西鵠  
鳴驛有僧倚巴山者有前知謂文昌曰去  
日既逢梅蘂綻來時應見杏花開至京屢  
升擢自相位拜劍南節度回至鵠鳴僧已  
物故杏花方盛

文昌鎮蜀有題武侯寺西臺詩云秋天如鏡



空樓閣盡玲瓏水暗餘霞外山明落照中  
鳥行看漸遠松韻聽難窮今日登臨意多  
歡語笑同

劉郇伯

郇伯與范鄴郎中為詩友范曾得一句云歲  
盡天涯雨久而莫屬郇伯曰何不曰人生  
分外愁范甚賞之

出北夢  
瑣言

陳考博

息賜魏文正公諸孫舊第以尊忠臣云阿衡

隨逝水池館主他人天意能醜德雲孫喜  
庇身生前由直道歿後振芳塵雨露新恩  
日芝蘭故里春勲曆流十代光彩映諸鄰  
共喜升平際從茲得諫臣

白居易為翰林學士奏云今日奏宣令撰李  
師道請收贖魏徵宅還其子孫甚合朕心  
允依來奏臣伏以魏徵太宗宰相盡心輔  
佐以致太平在其子孫宜加優卹事關激  
勸合出朝廷師道何人輒掠此美伏願明



勅有司特以官錢收贖使還後嗣以勸忠  
臣則事出皇恩美歸聖德憲宗深然之其  
後有司以為詩題試進士

郭良驥

自蘇州至望亭驛有作云南浦菰蒲遠白蘋  
東吳黎庶逐黃巾野棠自發空流水江鷺  
初歸不見人遠岫依依如送客平田渺渺  
獨傷春淮中迴首長洲苑烽火年年報虜  
塵觀詩所載疑李錡叛時事也

崔嘏

施有吾與之同年不睦嘏舊失一目以珠代  
之施嘲之曰二十九人及第五十七眼看  
花元和十五年也

唐球

球有詩名如臨池洗硯云恰似有龍深處臥  
彼人驚起黑雲生又有漸寒沙上路欲暖  
水邊村亦佳句也球居蜀之味江山方外  
之士也為詩撚藁為圓納之大瓢中後卧



病投瓢於江曰斯文苟不沉沒得者方知  
吾苦心爾至新渠有識者曰唐山人瓢也  
接得之十纔二三其題鄭處士隱居云不  
信最清曠及來愁已空數點水泉雨一溪  
霜葉風業在有山處道成無事中酌盡一  
樽酒老夫顏亦紅贈行如上人云不知名  
利苦念佛老岷峨衲補雲千片香焚篆一  
窠戀山人事少憐客道心多日日齋鍾罷  
高懸瀘水羅題青城觀云數里緣山不厭

難為尋真訣問黃冠苔鋪點翠山橋滑松  
織香梢古道寒晝傍綠畦嬌嫩玉夜開紅  
竈煉新丹孤鍾已斷泉聲在風動瑤花月  
滿壇

白敏中

敏中詩云一詔皇城四海頒醜戎無數束身  
還戍樓吹笛人休戰牧野嘶風馬自閑河  
水九盤收數曲天山千里鎖諸關西邊北  
塞今無事為報東南夷與蠻魏扶詩云蕭



關新復舊山川古戍秦原景象鮮戎虜乞  
降歸惠化皇威漸被懾腥膻穹廬遠戍煙  
塵滅神武光楊竹帛傳左衽盡知譚帝澤  
從茲不更備三邊崔鉉詩云邊堠萬里注  
息波宇宙羣方洽凱歌右地名王爭解辦  
遠方戎壘盡投戈烟塵永息三秋戍端歲  
遙清九折河共遇聖明千載運更觀俗阜  
與時和王起長慶中再主文柄意欲以第  
一人處敏中恨其與賀拔基為交基有文

而落魄因密令親知述意俾與基絕敏中  
欣然曰如斯教旣而基造門左右給以敏  
中他適基遲留不言而去俄頃敏中躍出  
見基於是悉以實告乃曰一第何門不致  
柰輕負至交相與歡醉或語於起起曰我  
比不得敏中今當更取基矣遂以第一人  
處基而敏中居三焉

魏扶

扶登大和四年進士第大中初知禮闈入貢



院題詩云梧桐葉落滿庭陰鎖閉朱門試  
院深曾是當年辛苦地不將今日負初心  
榜出無名子削為五言詩以譏之

馬植

同華解最利元和中令狐楚鎮三峯時及秋  
賦榜云特加試五場莫有至者唯盧洪正  
請試已試兩場而植不解植將家子從事  
竊笑曰此未可知已而試登山採玉賦略  
曰文豹且異於驪龍採斯踈矣白石又殊

於珉蚌剖果得之公大服其精遂奪解元  
後洪正自丞郎將判驪俄為植所擿復以  
手札戲植曰昔日華元已遭毒手今來驪  
務又中老秦植罷安南都護及除黔南殊  
不得意維舟峽中古寺寺前有長堤夜月  
明甚見白衣緩步堤上吟曰截竹為筒作  
笛吹鳳凰池上鳳凰飛勞君更向黔南去  
即是陶鑄萬類時邀問則失之矣後自黔  
南召入為大理遷刑部判鹽鐵拜相植字



存之為李德裕所抑頗怨望宣宗立白敏  
中當國凡德裕所不善悉不次用之故植  
遂相

崔鉉

魏公鉉元略之子也為兒時隨父訪韓晉公  
澆澆指架上鷹令詠焉吟曰天邊心膽架  
邊身欲擬飛騰未有因萬里碧霄終一去  
不知誰是解條人澆曰此兒可謂前程萬  
里也寶曆三年登第久居廊廟三擢節麾

宣宗嘗謂侍臣曰崔鉉真貴人裴休真措  
大初李石鎮江陵辟為戎倅一旦告去既  
入京華俄升翰苑造朝凡三歲石未離荆  
渚崔既秉鈞衡石馳牋賀之曰石早拜光  
塵叨承眷與深蒙異分屢接清言幸曾辱  
於厚恩俯見循於末契去載分麾南楚拜  
節西秦思賢方詠於嘉魚棲止實慙於威  
鳳賓筵初啓曾陪樽俎之歡將幕永移已  
在陶鎔之下先生鄰部喜溢轅門豈惟九



士獲安斯亦一方多幸乃掌記李膺之詞也鉉子台碩相武宗與李德裕不叶罷復相宣宗除楊州大都督府長史封魏國公宣宗於太液亭賦詩宴餞有七載秉鈞調四序之句識者榮之

### 裴夷直

夷直字禮卿文宗時為右拾遺張克勤以五品官權與其甥夷直時為禮部員外郎劾曰是開後日賣爵之端詔聽遂著于令為

中書舍人武宗立視冊牒不肯書出刺杭州斥驩州司戶參軍宣宗初復拜江華等州刺史終散騎常侍夷直戲唐仁烈詩云自知年紀偏應少先祀屠蘇不讓春儻更數年逢此日還應惆悵羨他人

### 楊敬之

敬之字茂孝文宗命為祭酒兼太常少卿是日一子戎載登科時號楊家三喜敬之華山賦最為韓愈李德裕所稱士林一時傳



布霜樹鳥棲夜空街雀報明白碧山相倚  
暮歸鴈一行斜句

喻鳧

鳧毗陵人開成進士也卒於烏程令顏涓明  
鏡覺思苦白雲知句滄洲迷釣隱紫閣負  
僧期句酬難塵鬢皓坐久壁燈青句滄洲  
未歸迹華髮受恩心

楊衡

初隱廬山有盜其文登第者衡因詣闕亦登

第見其人盛怒曰一一鶴聲飛上天在否  
荅曰此句知兄最惜不敢偷衡笑曰猶可  
恕也

隨伴步入青雲谷青牛道士留我宿可憐夜  
久月明中惟有壇邊一枝竹宿青  
牛谷

都無看花意偶到樹邊來可憐枝上色一一

為愁開題花  
樹

哭李象云白鷄黃犬不將去寂寞空餘葬時  
路草死花開更幾年後人知是何人墓憶



君思君獨不眠夜寒月照青楓樹

王彥威

長安舊俗以不歷臺省出領廉車節鎮者率呼為寵官大率重內而輕外今東京皇城乾元門舊宣武軍鼓角樓也節度使王彥威有詩刻石在其上曰天兵十萬勇如貔正是酬恩報國時汴水波瀾喧鼓角隋堤楊柳拂旌旗前驅紅旆關西將坐間青娥趙國姬寄與長安舊冠蓋寵官到底是男

兒彥威自太常博士出辟使府至茲鎮故有是句後梁氏建國其石不知所在薛能亦有謝寄答詩云寵官寄與真抛却賴有詩情合得嘗洪文館舊不置學士文宗特置一員以待彥威為戶部侍郎邊兵訴所賜不時嫌皆敝惡貶衛尉卿俄為忠武節度徙宣武卒

繫知一

樂天除蘇州刺史自峽泐流赴郡時梯歸縣



繁知一聞居易將過巫山先於神女祠粉  
壁大言之曰忠州刺史今才子行到巫山  
必有詩為報高唐神女道速排雲雨候清  
詞居易覩之悵然邀知一至曰歷陽劉郎  
中禹錫王年理白帝欲作一詩而不能罷  
郡經過悉去千餘詩但留四詩而已沈佺  
期詩曰巫山高不極合沓竒狀新閭谷疑  
風雨幽崖若鬼神月明三峽曙潮滿九江  
春為問陽臺客應如入夢人王無競詩曰

神女向高堂巫山下夕陽徘徊作行雨婉  
變夢荆王電影江前落雷聲峽外長朝雲  
無處所臺館曉蒼蒼皇甫冉詩曰巫峽見  
巴東迢迢出半空雲藏神女館雨到楚王  
宮朝暮泉聲落寒暄樹色同清音不可聽  
偏在九秋中李端詩曰巫山十二重皆在  
碧空中迴合雲藏日霏微雨帶風猿聲寒  
度水樹色暮連空悲向高唐去千秋見楚  
宮居易吟四篇與繁生同濟卒不賦詩



雍裕之

野酌亂無巡送君兼送春明年春色至莫作

未歸人

秦晦送客

裕之正元後詩人也

張祐

題金山寺云一宿金山寺微茫水國分僧歸  
夜舩月龍出曉堂雲樹影中流見鐘聲兩  
岸聞因悲在城市終日醉醺醺

入潼關云都城三百里雄險此迴還地勢遙  
尊嶽河流側讓關秦皇曾虎視漢祖昔龍

顏何處象兇犇干戈自不閑

故國三千里深宮二十年一聲河滿子雙淚  
落君前自倚能歌曲先皇掌上憐新聲何  
處唱腸斷李延年二章祐所作宮詞也傳  
入宮禁武宗疾篤目孟才人曰吾即不諱  
爾何為哉才人指筵囊泣曰請以此就縊  
上惻然復曰妾嘗藝歌請對上歌一曲以  
泄其憤上許乃歌一聲河滿子氣亟立殞  
上令醫候之曰脉尚溫而腸已絕帝崩柩



重不可舉或曰非俟才人乎爰命其櫛櫛  
至乃舉祐為孟才人嘆序曰才人以誠死  
上以誠命雖古之義激無以過也歌曰偶  
因歌態詠嬌嚙傳唱宮中二十春却為一  
聲河滿子下泉須弔舊才人

寧哥來云日映宮城霧半開太真簾下畏人  
猜黃幡綽指向西樹不信寧哥迴馬來

感王將軍拓枝妓歿云寂寞春風舊拓枝舞  
人休唱曲休吹鴛鴦鈿帶拋何處孔雀羅

衫向阿誰畫鼓不聞招節拍錦靴空想挫  
腰肢今來坐上偏惆悵曾是堂前教徹時  
祐長慶中深為令狐楚所知楚鎮天平自草  
薦表令以詩三百篇隨狀表進祐至京屬  
元稹在內庭上問之稹曰祐雕虫小巧壯  
夫不為或獎激之恐變陛下風教上頷之  
由是失意東歸有孟浩然身更不疑之句

李商隱

楊大年云義山詩陳怨酷愛一絕云珠箔輕



明覆玉墀披香新殿闕腰肢不須看盡魚  
龍戲綵遣君王恣偃師嘆曰古人措辭寓  
意如此深妙令人感慨不已大年又曰鄧  
帥錢若水舉賈誼兩句云可憐半夜虛前  
席不問蒼生問鬼神錢云措意如此後人  
何以企及鹿門先生唐彥謙為詩纂慕王  
溪得其清峭感愴蓋其一體也然警絕之  
句亦多有

義山少遊投宿逆旅主人會客召與坐不知  
其為義山也酒酣席客賦木蘭花詩義山  
後就曰洞庭波冷曉侵雲日日征帆送遠  
人幾度木蘭舟上望不知元是此花身坐  
客覽之大驚詢之乃義山也

劉得仁

題邵公禪院云無事門多掩陰壑竹掃苔勁  
風吹雪聚渴鳥啄冰開樹向寒山得人從  
瀑布來終朝天目老携錫逐雲回  
悲老宮人云白髮宮娃不解悲蒲頭猶自挿



花枝曾緣玉貌君王愛，準擬人看似舊時。  
得仁貴主之子，自開成至大中三朝，昆弟皆  
歷貴仕而得仁苦於詩，出入舉場三十年，  
卒無成。常自述曰：外家雖是帝當路，且無  
親。又云：外族帝王是中朝親故，稀翻令浮  
議者不許九霄飛。既終詩人競為詩，吊之  
吟苦曉燈暗，露深秋草疎。舊山多夢到，流水  
送愁餘。句風定一池星。

宿宣義里池亭云：暮色遠桐亭，南山幽竹青。

夜深斜舫月風定，一池星島嶼無人跡。菰  
蒲有鶴翎，此中休便得。何必泛滄溟。

長信宮云：簟秋涼氣初，長信恨何如。拂黛月  
生指，解鬟雲滿梳。一從悲盡扇，幾度泣前  
魚。坐聽南宮樂，清風搖翠裾。

王智興

智興為徐州節度，一日從事於使院，會飲賦  
詩。智興召護軍俱至，從事屏去翰墨。智興  
曰：適聞作詩，何獨見智興而罷？復以殘陳



席上小吏亦置戔於智與前於是引毫立  
成曰三十年前老健兒劉被郎官遣作詩  
江南花柳從君詠塞北煙塵獨我知四座  
驚嗟監軍謂張祐曰觀茲盛事豈得無言  
祐乃獻詩曰十年受命鎮方隅孝節忠規  
兩有餘誰信將壇嘉政外李陵章句右軍  
書左右曰書生諂辭耳智與叱曰有人道  
我惡汝輩又肯否張生海內名士篇什豈  
易得天下人聞且以為王智與樂善矣

馬戴

送客南遊云擬卜河山隱高秋指岳陽葦乾  
雲夢色橘熟洞庭香疎雨殘虹影回雲背  
鴈行靈均如可問一為哭清湘

許崇文困名場咸通末戴佐大同軍幕崇往  
謁之一見如舊相識留連數月但詩酒而  
已未嘗問所欲一旦大會賓友命使者以  
崇家書授之崇驚愕莫知其來啓緘即知  
戴潛遣一介郵其家矣與姚合善合有



詩云天府鹿鳴客。幽山秋未歸。我知方甚  
善。衆說以為非。隔石聞泉細。和風見鶴飛。  
新詩此處得。清峭比應稀。又有送戴下第  
客遊詩云。昨夜送君處。亦是九衢中。此日  
慙慙別。前時寂寞同。鳥啼寒食雨。花落暮  
春風。向晚離人別。送收樽未空。戴酬姚合  
中字韻詩云。歧路非人見。尚得起心中。日  
憶瀟湘渚。春生蘭桂叢。鳥啼花半落。客散  
爵方空。所贈誠難答。冷然一榻風。

鄭顥

顥宰相綱之孫。登甲科。以起居郎尚主。有器  
識。宣宗時。恩寵無比。嘗夢中得句云。石門  
霧露白玉殿。莓苔青績成長韻。此一聯。杜  
甫集中詩也。大中十年。顥放榜後。謁假觀  
省於洛。生徒餞。長樂驛。俄有紀於屋壁云。  
三十驂騮一吐塵。來時不鎖杏園春。揚花  
滿地如飛雪。應有偷遊曲水人。舊史云。顥  
綱之子。尚宣宗女萬壽公主。因壽昌節上



壽回夢一官殿與十數人納涼聯句既悟  
省石門之句十字惟其不祥不數日宣宗  
弓劍上僊方悟其事乃續爲十韻云間歲  
流虹節歸軒出禁扃奔波流長景蕭洒夢  
殊度境象非曾到崇巖昔未經日斜烏斂  
翼風動鶴踈翎異苑人爭集涼臺筆不停  
石門霧露白玉殿莓苔青若匪灾先兆何  
緣思入冥御燼虛仗馬華蓋負云亭白日  
成千古金縢閱九齡小臣衰絕筆湖上泣

青萍

御燼或作丹輝

未幾題亦卒

李羣玉

羣玉好吹笙善急就章喜食鵝及授校書郎  
東歸盧肇送詩云妙吹應諧鳳立書定得  
纒杜丞相棕筵中贈美人云裙拖六幅瀟  
湘水鬢聳巫山十朵雲貌態祇應天上有  
歌聲豈合世間聞曾前瑞雪燈斜照眼底  
桃花酒半醺不是相如憐賦客肯教容易  
見文君群玉解天祿之任而歸岑陽經二



妃廟題云小孤洲北浦雲邊二女明粧玉  
儼然野廟向江春寂寂古碑無字草芊芊  
風迴日暮吹芳芷月落山深哭杜鵑猶似  
含顰望巡狩九疑凝黛隔湘川又曰黃陵  
廟前春已空子規啼血滴松風不知精爽  
落何處疑是行雲秋色中群玉疑春空遂  
至秋色欲易之恍若有物告以二年之兆  
時潯陽太守段成式志其事二年後果死  
於洪井段以詩哭之曰曾話黃陵事今為

白日催老無男女累誰哭到泉臺群玉字  
文山澧州人裴休觀察湖南厚延致之及  
為相以詩論薦授校書郎

溫庭筠

庭筠才思豔麗工於小賦每入試押官韻作  
賦凡八义手而八韻成特號温八吟多為  
鄰鋪假手率日救數人已而士行玷缺縉  
紳薄之李義山謂曰近得一聯句云遠比  
趙公二十六年宰輔未得偶句温曰何不



云近同郭令二十四考中 宣宗嘗賦詩  
上句有金步搖未能對造求進士對之庭  
筠乃以玉條脫續也宣宗賞焉又藥名有  
白頭翁溫以蒼耳子為對他皆類此宣皇  
愛唱菩薩蠻詞丞相令狐綯假其脩撰密  
進之戒令勿洩而遽言於人由是疎之溫  
亦有言云中書堂內坐將軍譏相國無學  
也宣皇好微行過於逆旅溫不識龍顏傲  
然而詰之曰公非長史司馬之流帝曰非

也又曰得非六參簿尉之類帝曰非也謫  
為方城尉其制詞曰孔門以德行為先文  
章為末耳既德行無取文章何以稱焉徒  
負不羈之才罕有適時之用竟流落而死  
杜棕自西川除淮海庭筠詣韋曲杜氏林  
亭留詩云卓氏鑪前金線柳隋家堤畔錦  
帆風貪為兩地行霖雨不見池蓮照水紅  
邠公聞之遺綰千疋曾於江淮為親表辱  
之由是改名



工起

和周侍郎見寄云貢院離來二十霜誰知更  
黍主文場揚葉縱能穿舊的桂枝何必愛  
新香九重每憶同僊禁六義初吟得夜光  
莫道相知不相見嵩峯之下欲徵黃

起字舉之元和末為中書舍人穆宗時錢徽  
坐貢舉失實貶詔起復核起建言以所試  
送宰相閱可否然後付有司議者謂起失  
職李訓為相起門生也引與共政文宗尚

文好古學時鄭覃以經術進起以該博顯  
武宗時自東都召為尚書判太常卿帝患  
選士不得才特命起典貢舉凡四舉士皆  
知名者人服其鑒慈恩寺題名云進士題  
名自神龍之後過關宴後率皆期集於慈  
恩塔下題名故貞元中劉太真侍郎試慈  
恩寺望杏園花發詩會昌三年贊皇公為  
上相其年十一月十九日勅諫議大夫陳  
商守本官權知貢舉後因對不稱旨十



二月十七日宰臣遂奏依命左僕射兼太常卿王起主文二十二日中書覆奏奉宣旨不欲令及第進士呼有司為座主趨附其門兼題名局席等條疏進來者伏以國家設文學之科求真正之士所宜行崇風俗義本君親然後升於朝廷必為國器豈可懷賞拔之私惠忘教化之根源自謂門生遂成膠固所以時風寢壞臣節何施樹黨背公靡不由此臣等商量今日已後

進士及第任一度叅見有司向後不得聚集叅謁有司宅置宴其曲江大會朝官及題名局席並望勒停緣初獲美名實皆少雋既遇春節難阻良遊三五人自為宴樂並無所禁唯不得聚集同年進士廣為宴會仍委御史臺察訪聞奏謹具如前奉勅宜依於是向之題名各盡削去蓋贊皇公不由科第故設法以排之洎公失意悉復舊態



稜

公心獨立副天心三轄春闈冠古今蘭署門  
生皆入室蓮峯太守別知音同時人皆有  
繼和希逸字大隱

希逸詩蟾蜍醉裏破蛺蝶夢中殘牛相在揚  
州嘗稱之

黃頰

頰為失第後又方第據言曰黃頰以洪奧文  
章蹉跎者一十三載劉纂以平漫子弟而

折丹桂由斯言之可謂命能通性豈曰性  
能通命哉韓愈自潮州量移宜春郡頰學  
愈為文亦振大名頰嘗觀盧肇為碑版  
則唾之而去頰宜春入與肇同鄉頰富而  
肇貧同日遵路赴舉郡收餞頰離亭肇駐  
蹇十里以俟明年肇以第一名還表因競  
渡即席賦詩云向道是龍剛不信果然奪  
得錦標歸頰字無頰

鄭畋



馬嵬上 具縊所題詩 多悽感 鄭畋為鳳翔  
從事 日題云 玄宗回馬楊妃死 雲雨雖亡  
日月新 終是聖朝天子事 景陽宮井又何  
人觀者 以為有宰輔之器

懿宗朝 韋保衡路巖忌宰相 劉瞻誣以罪黜  
為荆南節度 畋為制詞云 早以文學 壘中  
殊科 風稜甚高 恭謹無玷 又云 安數畝之  
居 仍非已有 却西方之賄 惟恐人知 韋路  
大怒 貶畋為梧州刺史 責鑿 驩州司戶 命

舍人李庚為詞 深文痛詆 必欲加害 屬懿  
宗厭代 僖宗立 蕭倣輔政 舉瞻自代 召歸  
朝廷 至湖南 庚與是郡 出迎江次 牌亭致  
酒 瞻唱竹枝詞 送庚酒 命庚酬和 庚曰 不  
閑音律 瞻曰 君應只解為制詞也 是夕 庚  
飲鴆而卒 畋字台文 相僖宗 昭宗 為人仁  
恐姿采如峙玉

李彙征

彙征客 適閩 越至循州 冒雨求宿 或指韋氏



莊居韋氏杖履迎賓年八十餘自稱曰野  
人韋思明每與李生談論或詩或史淹留  
累夕彙征善談而不能屈也論數十家之  
作次第至李涉詩主人酷稱善彙征遂吟  
曰遠別秦城萬里遊亂山高下出商州關  
門不鎖寒溪水一夜溝浚送客愁華表千  
年一鶴歸丹砂為頂雪為衣冷冷仙語人  
聽盡却向五雲翻翅飛思明復吟二篇曰  
因韓為趙兩遊秦十月冰霜變孟津縱使

鷄鳴見關吏不知余也是何人又曰滕王  
閣上唱伊州一十年前向此遊半是半非  
君莫問西山長在水長流韋叟愀然變色  
曰老身弱齡不肖浪遊江湖交結奸徒為  
不平事後遇李涉博士蒙簡一詩因而絕  
跡李公待愚擬陸士衡之薦戴若思中心  
藏焉遂隱羅浮經于一紀李既云亡不復  
再遊秦楚追惋今昔或謂然乃舉觴持酌  
反袂而歌云春雨瀟瀟江上村綠林豪客



夜知聞相逢不用相迴避世上如今半是  
君乾符辛丑歲范摠客于雲川值彙征細  
述其事云於韋叟之居觀李博士手翰云  
彙征後登進士第按李涉嘗過九江至皖  
口遇盜問何人從者曰李博士也其豪者  
曰若是李涉博士不用剽奪久聞詩名願  
題一篇足矣涉贈一絕云云

劉威

遊東湖處士園林詩云偶向東湖更向東

數聲鷄犬翠微中遙知拂柳是門處似隔  
芙蓉無路通樵客出來山帶雨漁舟過去  
水生風物情多與閑相稱所恨求安計不  
同威會昌時詩人也

崔郊

郊寓居漢上有婢端麗善音律既貧鬻婢於  
連帥給錢四十一萬寵賜弥深郊思慕無  
已其婢因寒食來從事家值郊立於柳陰  
馬上遊泣誓若山河崔生贈之以詩曰公



子王孫逐後塵綠珠垂淚滴羅巾侯門一  
入深如海從此蕭郎是路人或有嫉郊者  
寫詩於座公觀詩令召崔生左右莫之測  
也及見郊握手曰侯門一入深如海從此  
蕭郎是路人便是公作耶遂命婢同歸至  
於幃幌奩匣悉為增飾之

來鵬

清明日與友人遊玉粒塘莊詩云幾宿春山  
逐陸郎清明時節好煙光歸穿細荇船頭

滑醉踏殘花屐齒香風急嶺雲翻迫野雨  
餘田水落方塘不堪吟罷東回首滿耳蛙  
聲正夕陽

寒食山館書情云獨把一盃山館中每經時  
節恨飄蓬侵堦草色連朝雨滿地梨花昨  
夜風蜀魄哭來春寂寞楚囚吟後月朦朧  
分明寄得還家夢徐孺宅前湖水東

鄂渚除夜書懷云鸚鵡洲頭夜泊船此時形  
影共淒然難歸故國干戈後欲告何人雨



雪天筋撥冷灰書悶字枕陪寒席帶愁眠  
自嗟落魄無成事明日春風又一年

杜牧

牧為御史分務洛陽時李司徒愿罷鎮關居  
聲妓豪侈洛中名士咸謁之李高會朝客  
以杜持憲不敢邀致杜遣座客達意願預  
斯會李不得已邀之杜獨坐南行瞪目注  
視引滿三卮問李云聞有紫雲者孰是李  
指之杜凝睇良久曰名不虛得宜以見惠

李俯而笑諸妓亦回首破顏杜又自飲二  
爵朗吟而起曰華堂今日綺筵開誰喚  
司御史來忽發狂言驚滿座兩行紅粉一  
時迴氣意閑逸旁若無人牧不拘細行故  
詩有十年一覺揚州夢贏得青樓薄倖名  
吳武陵以阿房宮賦薦於崔鄴遂登第鄴  
東都放榜西都過堂牧詩曰東都放榜未  
花開三十三人走馬回秦地少年多釀酒  
即將春色入關來



青山隱隱水迢迢，秋盡江南草木凋。二十四

橋明月夜，玉人何處學吹簫。

寄揚州韓  
緯判官

許渾

金陵懷古云：玉樹歌殘，王氣終景陽。兵合戍樓空，松楸遠近，千官塚未黍。高低六代宮，石燕拂雲晴，亦雨江鮑。吹浪夜還風，英雄一去，豪華盡。惟有青山似洛中。

登故洛陽城云：未黍離離，半野蒿。昔人城此，豈知勞水聲東去。市朝變，山勢北來，宮殿

高鴉噪暮雲歸。古堞鴈迷，寒雨下空壕。可憐緱嶺登仙子，猶自吹笙醉碧桃。

又初春雨中舟次，和橫江裴使君見迎李趙二秀才同來，因書四韻。芳草渡頭微雨時，萬株楊柳拂波垂。蒲根水煖鴈初下，梅暎香寒蜂未知。辭客倚風吹暗淡，使君迴馬濕旌旗。江南仲蔚多情調，悵望春陰幾首詩。渾睦州人字用晦，園詩之後。大中三年，任監察御史，以疾乞東歸。終郢睦二州刺。



史

水聲東去市朝變山勢北來宮殿高句何郎  
翠鳳雙飛去三十六宮聞玉簫句經年未  
葬佳人散昨日因齋故吏來句垂釣有深  
意望山多遠情

雍陶

詠雙白鷺云雙鷺應憐水滿池風飄不動頂  
絲垂立當青草人先見行傍白蓮魚未知  
一足獨拳寒雨裏數聲相叫早秋時林塘

得爾須增價况與詩家物色宜

陶蜀川上第後稍薄親黨其舅雲安劉敬之  
羅舉歸三峽賁陶不寄書曰山近衡陽雖  
少鴈水連巴字豈無魚陶得詩恠赧乃有  
狐首之思後為簡州牧自比謝宣城柳吳  
興賓至則折之閣者亦怠投贄者稀得見  
有馮道明下第請謁云與負外故舊閣者  
以道明言啓之及引進陶詢曰與公昧平  
生何云相識道明云調負外之詩仰負外



之德詩集中日得相見何隔平生也遂吟  
曰立當青草人先見行傍白蓮魚未知又  
曰江聲秋入寺雨氣夜侵樓又曰閉門客  
到常疑病滿院花開不似貧陶聞吟次狎  
待道明如曩昔之友君子以雍君矜誇而  
好媚馮子匪藝而求知陶字國鈞大中八  
年自國子毛詩博士出刺簡州

天津橋春望云天津橋春水浸紅霞煙柳風絲  
拂岸斜翠輦不來宮殿閉金鶯啣出上林

花

李遠

失鶴詩云秋風吹却九臯禽一片閑雲萬里  
心碧落有情空悵望青天無路可追尋來  
時白雪翎猶短去日丹砂頂漸深華表柱  
頭番語後更無消息到如今

贈寫御容李長史云玉座塵消硯水清龍髯  
不動彩毫輕初分隆準山河秀乍點重瞳  
日月明宮女捲簾皆暗認侍臣開鏡盡遙



驚三朝供奉無人敵始覺僧繇浪得名遠  
字求古大中時為建州刺史

趙嘏

長安秋望云雲物淒涼拂曙流漢家宮闕動  
高秋殘星幾點鴈橫塞長笛一聲人倚樓  
紫豔半開籬菊靜紅衣落盡渚蓮愁鱸魚  
正美不歸去空戴南冠學楚囚

嘏曾有詩曰早晚粗酬身事了水邊歸去一  
閑人果卒於渭南尉嘏嘗家于浙西有美

姬惑之洎計偕會中元鶴林之遊浙帥窺  
其姬遂奄有之明年嘏及第因以一絕箴  
之曰寂寞堂前日又曛陽臺去作不歸雲  
當時聞說沙吒利今日青娥屬使君浙帥  
不自安遣一介歸之嘏方出關逢於橫水  
驛姬抱嘏慟哭而卒葬於橫水之陽嘏字  
承祐

千里色中秋月十萬軍聲半夜潮

錢謙

韋承貽



承胎字胎之咸通八年登第省試夜潛紀長  
句於都堂西南隅云褒衣博帶滿塵埃獨  
向都堂納卷回蓬巷幾時聞吉語棘籬何  
日免重来三條燭盡鐘初動九轉丹成鼎  
未開殘月漸低人擾擾不知誰是謫仙才  
又云白蓮千朶照廊明一片昇平雅頌聲  
報道第三條燭盡南宮風月寫難成

段成式

成式紀云武宗癸亥三年夏予與張君希復

善繼同官祕立鄭君符夢復連職仙署會  
假日遊大興善寺因問兩京雜記及遊目  
記多所遺略乃約一旬尋兩寺以街東興  
善為首二紀所不具到則別錄之遊及慈  
恩初知官將併寺僧衆草草乃泛問一二  
上人及記塔下畫跡遊於此遂絕後三年  
予職于京洛及刺安成至大中七年歸京  
在外一甲周所留書籍揃壞居半於故簡  
中觀與二亡友遊寺瀝血淚交當時造適



樂事邈不可追後方刊整纜足續穿蠹然  
十七五六矣

靖恭坊大興善寺東廊之南素和尚院庭有  
紫桐四株素之手植元和中鄉相遊此院  
桐至夏有汗汚人衣如軸脂不可浣相國  
東門鄭相嘗與丞相數人避暑惡其汗謂  
素曰弟子為和尚伐此木各植一松也及  
暮素戲祝曰木我種汝二十餘年汝以汗  
為人所惡來歲若復有汗我必薪汝自是

無汗寶曆末子見說已十五六年無汗矣  
素公不出院轉法華經三萬七千部夜常  
有貉子聽經齋時烏鵲就掌取食長慶初  
庭前牡丹一朵合歡有僧玄幽題此院詩  
警句三萬蓮經三十春半生不踏院門塵  
長樂坊安國寺紅樓睿宗在藩時無榭東禪  
院亦曰木塔院院門西北廊五壁吳道子  
弟子釋思道畫釋梵人部不施彩色尚有

典刑



常樂坊趙景公寺隋開皇二年置本曰弘善  
寺十八年改焉南中三門裏東壁上吳道  
玄白畫地獄變筆力勁怒變狀陰恠觀之  
不覺毛戰具畫中得意處三階院西廊下  
范長壽畫四方變及十六觀寶池尤妙絕  
諦視之覺水入浮壁院門上白畫樹石頗  
似閻立德予携立德行天祠粉本驗之西  
中三門裏門南吳生畫龍及刷天王鬚筆  
蹟如鐵有執爐天女竊眸欲語 吳畫聯

句 慘淡十堵內吳生縱狂跡風雲將逼  
人神鬼如脫壁 柯其中龍最恠張目方汗  
栗黑雲夜窅率烏知不霹靂 繼此際忽仙  
子獵獵衣舄奕妙瞬乍疑生參差奪人龜  
夢徃徃乘猛虎衝梁聳奇石蒼峭束高泉  
角膝警欺側 初冥獄不可視毛戴腋流液  
苟能水成河刹那沈火宅  
通政坊寶應寺韓幹藍田人少時常為酒家  
送酒王右丞兄弟未遇每貰酒漫遊幹常



徵債於王家戲畫地為人馬右丞精忍丹  
青竒其意趣乃歲與錢二萬令學畫十餘  
年今寺中釋梵天女悉齊公妓小小等寫  
真也寺有韓幹畫下生彌勒衣紫袈裟右  
邊仰面菩薩及二獅子尤入神又有舊鐵  
石及齊公喪一歲子漆之如羅喉羅每盆  
供日出之寺中彌勒殿齊公寢堂也東廊  
北面楊岫之畫鬼神齊公媿其筆蹟不工  
平康坊菩薩寺佛殿東西障日及諸柱上圖

畫是東廊跡舊鄭法也畫開元中因屋壞  
移入大佛殿內北壁食堂前東壁上吳道  
玄畫智度論色偈變偈是吳自題筆跡道  
勁如碟鬼神毛髮次堵畫禮佛仙人天衣  
飛揚滿壁風動佛殿內後壁吳道玄畫消  
灾經事樹石古嶮元和中上欲令移之慮  
其摧壞乃下詔擇畫手寫進佛殿內槽壁  
維摩變舍利佛角膝而轉元和末俗講僧  
文淑裝之筆蹟盡矣故興元鄭公尚書題



北壁僧院詩曰但慮絲色汚無虞壁脾肥  
置寺碑陰彫飾竒巧相傳鄭法士所起

初會覺上人以利施起宅十餘畝上畢  
釀酒百石列餅甕於兩廊下引吳道玄觀  
之因謂曰檀越為我畫以是賞之吳生嗜  
酒且利其賞欣然而許予以蹤跡似不及  
景公寺畫中三門內東門神善繼云是吳  
生弟子王耐兒之手也

翊善坊保壽寺本高力士宅天寶九載捨為

寺初鑄鐘成力士設齋慶之舉朝畢至一  
擊百千有規其意連擊二十杵經藏閣規  
創危巧二塔火珠受十餘斛河陽從事李  
恣性好竒古與僧智增善嘗俱至此寺觀  
庫中舊物忽於破甕中得物如被幅裂汚  
空觸而塵起涿徐視之乃畫也因以州縣  
圖王及繇三十獲之令家人裝治之大十  
餘幅訪於常侍柳公權方知張萱所畫石  
橋圖也玄宗賜力士因留寺中後為齋畫



人宗教言於左軍尋有小使領軍卒數十人至宅宣勅取之即日進入先帝好古見之大悅命張於雲韶院寺見有先天菩薩真本起成都妙積寺開元初有尼魏八師者常念大悲咒雙流縣百姓劉乙意兒年十一自欲事魏尼尼遣之不去常與室立禪嘗白魏云先天菩薩見身此地篩灰於庭一夕有跡巨數尺輪理成就因謁畫工隨意設色悉不如意有僧楊法成自言

能畫意兒常合掌瞻仰然後指授之以近十稔工方就後塑先天菩薩凡二百四十一首首如塔勢分臂如意蔓其膀子有一百四十日鳥樹一鳳四翅水牯樹所題深恠不可詳悉畫樣凡十五卷柳七師者崔寧之甥分三卷往上都流行時魏奉古為長史進之後因四月八日賜高力士今成都者是其次本

崇仁坊資聖寺淨土院門外相傳吳生一夕



東燭醉畫就中執手視之惡駭院門裏盧  
稜伽常學吳勢吳亦授以手訣乃畫總持  
三門寺方半吳大賞之謂人曰稜伽不得  
心訣用思大苦其能久乎畫畢而卒中門  
殿間吳畫高僧韋述贊李嚴書中三門外  
兩面上層不知何人畫人物頗類閻令寺  
西廊北隅楊怛畫迎塔天文明睇將瞬團  
塔院北堂有鐵觀音長三丈餘觀音院兩  
廊四十二賢聖韓幹畫元中書贊東廊北

頭散馬不群見者如將嘶蹠聖僧中龍樹  
商那和修絕妙團塔上菩薩李真畫四面  
花鳥邊鸞畫藥師菩薩頂上莪葵尤佳塔  
中藏千部妙法蓮華經

成式字柯古文昌之子博學強記多奇篇祕  
籍常於私第鑿池得片鐵命尺周量之笑  
而不言真之密室時窺之則有金書小字  
報十二時也其博物類此終太常少卿  
酉陽雜俎云一夕予坐客以遍送聯句為煩



乃命工取細班竹以白金鍍首如茶夾次  
邊聯名之予在城時常與客聯句初無虛  
日小酌求押或窮韻相角或押惡韻或煎  
茗一椀為八韻詩謂之雜聯若志於不朽  
則汰棟穩韻無所得輒已謂之苦聯聯共  
押平聲好韻不僻者出於竹簡謂之韻牒  
出城悉攜行坐密句換韻牒之語必為好  
事者所傳矣因說故相牛公揚州賞秀才  
蒯希逸詩云蟾蜍醉裏破蛺蝶夢中殘每

坐吟之予因請坐客各吟近日為詩者佳  
句有吟賈島舊國別多日故人無少年馬  
戴猿啼洞庭樹人在木蘭舟又骨銷金鏃  
在有吟僧無可河來當塞斷一曰山岸一曰  
遠與沙平又開門落葉深有吟張祐河流  
側讓關山一曰又泉聲到池盡有吟僧靈準  
詩晴看漢水廣秋覺峴山高有吟米景玄  
塞鴻先秋去邊草入夏生予吟上都僧元  
礎寺隔殘潮去又採藥過泉聲又林塘秋



半宿風雨夜深來予識蜀中客龐季子每  
云寒雲生易滿秋草長難高

韋蟾

蟾庶問鄂州罷賓僚祖錢蟾曾書文選句云  
悲莫悲方生別離登山臨水送將歸以牋  
毫授賓從請續其句逡巡有妓泫然起曰  
某不才不敢染翰欲口占兩句韋大驚異  
令隨念云武昌無限新栽柳不見楊花撲  
面飛坐客無不嘉嘆韋令唱作楊柳枝詞

蟾字隱桂下杜人大中七年進士登第初  
為徐商掌書記終尚書左丞

贈商山僧云商嶺東西路欲分兩間茅屋一  
溪雲師言耳重知師意人是人非不欲聞

李敬方

天台閑望云天台十二旬一片雨中春林果  
垂秋盡山苗半夏新暘鳥曉展翅陰晷夜  
飛輪坐冀無雲物分明見北辰勸酒云不  
向花前醉花應解笑人只憂連夜雨又過



一年春

汴河直進船云汴水通淮利最多生人為害亦相和東南四十三州地取盡脂膏是此河

敬方字中虔登長慶進士第大和中為歙州刺史大中時顧陶集唐詩類選云李欽州敬方才力周備興比之間獨與前輩相近家集千百首簡擇律韻八篇而已雖前後夔絕或畏多言而典刑具存非敢避棄

李郢

奉陪裴相公重陽日遊安樂池亭云絳霄輕  
靄翊三台嵇阮情懷管樂才蓮沼昔為王  
儉府菊籬今作孟嘉盃寧知北闕元勳在  
漢賜蕭何等  
北闕大第却引東山舊客來自笑吐茵  
還醑酌日斜空從錦衣迴

贈羽林將軍云虬髯顛顛羽林郎曾入甘泉  
侍武皇鵬沒夜雲知御苑馬隨仙仗識天  
香五湖歸去孤舟月六國平來兩鬢霜惟



有桓伊江上笛臥吹三弄送殘陽郢字楚  
望大中進士終於御史

杜牧之湖商正初招郢云行樂及時時已晚  
對酒當歌歌不成千里暮雲重疊翠一溪  
寒水淺深清高人以飲為忙事浮世除詩  
盡強名看着白蘋牙欲吐雪舟相訪勝閑  
行

李洞

上崇賢曹郎中云閑坊宅枕穿宮水聽水分

衾盡蜀僧藥杵聲中搗殘夢茶鐙影裏煮  
孤燈刑曹樹蔭千年井華岳樓開萬里冰  
詩句變風官漸紫夜濤春盡海邊藤

洞唐諸王孫也常遊西川慕賈浪仙為詩鑄  
銅像其儀事之如神洞為終南山詩二十  
韻句有殘陽高照蜀敗葉遠浮涇復日斲  
竹煙嵐凍偷淚雨霽腥遠平丹鳳闕冷射  
五侯廳贈司空侍節云馬飢餐落葉鶴病  
曬殘陽又曰卷箔清谿月敲松紫閣書又



送僧云越講迎騎象蕃齋懺射鵬上高僕  
射曰征南破虜漢功臣提劍歸來萬里身  
閑倚凌煙金柱看形容消瘦老於真復曰  
藥杵聲中搗殘夢茶鐺影裏煮孤燈送人  
歸東南云島嶼分諸國星河共一天時人  
但諳其僻澁而不能貴其竒峭唯吳子華  
深知之子華才力浩大八面受敵以韻著  
稱遊刃頗攻騷雅嘗以百篇示洞洞曰大  
兄所示百篇中有一聯絕唱西昌新亭曰

暖漾魚遺子晴遊鹿引麝子華不怨所鄙  
而喜所許洞三榜裴公第二榜策夜簾前  
獻詩云公道此時如不得昭陵慟哭一生  
休尋卒蜀中裴公無子人謂孤洞所致裴  
公贄也洞慕賈島鑄其像頂戴常念賈島  
佛

送僧遊南海云春往海南邊秋聞半路蟬鯨  
吞洗鉢水犀觸點燈船島嶼分諸國星河  
共一天長空却歸日松偃舊房前



長孫翺

長孫翺朱慶餘各有宮詞翺詞曰一道甘泉  
接御溝上皇行處不曾秋誰言水是无情  
物也到宮前咽不流朱曰寂寂花時閉院  
門美人相對泣瓊軒含情欲說宮中事鸚  
鵡前頭不敢言

崔櫓

華清宮詩云銀河漾漾月輝輝樓礙星邊織  
女機橫鴈叫雲清似水滿空霜逐一聲飛

門橫金鎖悄無人落日秋聲渭水濱紅葉下  
山寒寂寂濕雲如夢雨如塵

岸梅云含情含怨一枝垂斜壓漁家短短籬  
惹袖尚餘香半日向人如訴雨多時初開  
偏稱離梁畫未落先愁玉笛吹行客見來  
無去意解帆煙浦為題詩

高蟾

鄭谷贈詩云張生故國三千里知者惟應杜  
紫微君有君恩秋後葉可能更羨謝玄暉



蓋蟾有宮詞云君恩秋後葉日日向人疎  
蟾初落第詩云天上碧桃和露種日邊紅杏  
倚雲栽芙蓉生在秋江上莫向春風怨未  
開胡曾亦有下第詩云翰苑何時休嫁女  
文昌早晚罷生兒上林新桂年年發不許  
平人折一枝時謂蟾無躁競心後登第乾  
符中為中丞

全唐詩話卷之中 畢



全唐詩話目錄

卷下

于武陵

李頻

劉魯風

褚載

汪遵

盧渥

滕倪

費冠卿

李廓

薛能

曹鄴

聶夷中

張林

崔塗



章碣

方干

衛準

司空圖

秦韜玉

高駢

翁承贊

皮日休

盧延遜

裴說

張為

韓偓

曹松

杜荀鶴

鄭綮

錢珝

嚴憚

王渙

張曙

翁綬

袁皓

李濤

王祝

韋莊

吳融

公乘億

羅鄴

羅隱

許棠

張蠙

鄭谷

溫憲

李昌符

李山甫

鍾離權

張道古



胡曾

七  
八

韓定辭

同谷子

沈彬

周朴

孫勳

王易簡

范攄之子

鄭雲叟

僧子蘭

僧靈澈

僧靈一

僧清江

僧廣宣

僧法振

僧皎然

僧文秀

僧棲白

僧懷濬

僧可朋

僧雲表

僧貫林

僧齋已

僧西蟾

僧清塞

僧文益

僧脩睦

僧景雲

僧可止

僧卿雲

僧處默

僧澹交

僧若虛

僧曇域

魚暖浦



僧慕幽

何向顏

開元宮人

崔氏

劉氏

薛媛

李季蘭

如意中女子

魚玄機

僖宗宮人

張建封妓

女郎宋若照

女郎張窈窕

女郎劉媛

鶯鶯

不知名

權龍褒

目錄終

全唐詩話卷之下

于武陵

孤雲詩云南北各萬里。有雲心更閑。因風離海上。伴月到人間。洛浦少高樹。長安無舊山。徘徊不可住。漠漠又東還。

客中云楚人歌竹枝。游子淚沾衣。異國久為客。寒宵頻夢歸。一封書未返。千樹葉皆飛。南渡洞庭水。更應消息稀。

李頎



過四皓廟云。西帝比心高跡自相親。天下  
色歸漢。山中猶避秦。龍樓曾作客。鶴氅不  
為臣。獨有千年後。青青廟木春。

劉魯風

魯風江南投謁所知頗為典客所阻因賦一  
絕曰萬卷書生劉魯風。烟波萬里謁文翁。  
無錢乞與韓知客。名紙毛生不肯通。

自正元後唐文甚振以文學科第為一時之  
榮及其弊也士子豪氣罵物遊諸侯門諸

侯望而畏之如劉魯風姚崇傑柳棠胡曾  
之徒其文皆不足取余故載之者以見當  
時諸侯爭取譽於文士此蓋外重內輕之  
牙孽如李益者一時文宗猶曰感恩知有  
地不上望京樓其後如李山甫輩以一名  
一第之失至挾方鎮劫宰輔則又有甚焉  
者矣一篇一韻初若虛文而治亂之萌係  
焉余以是知此不可忽也

褚載



雲詩云盡日看雲首不迴無心都大似無亦  
可憐光彩一片玉萬里青天河處來賀趙  
觀文重試及第云一枝仙桂兩回春始覺  
文章可致身已把色絲要上第又將綵筆  
冠羣倫龍泉再淬方知利火浣重燒轉更  
新今日街頭看御榜大能榮耀苦心人  
陸威為郎官載以文投獻數字况其家諱威  
因矍然載尋以牋致謝曰曹興之圖書雖  
精終慙誤筆殷浩之矜持太過翻達空函

載字厚之登乾寧進士第

汪遵

遵幼為吏許棠應二十餘舉遵猶在胥徒善  
為絕句詩而深晦鎮密一旦辭役就貢會  
棠送客至灞澨間遇遵於途訊曰何事至  
京遵曰就貢棠怒曰小吏無禮後遵成名  
五年棠始登第

秦築長城比鐵牢蕃戎不敢過臨洮雖然萬  
里連雲際三及堯階三尺高遵長城詩也



得名於時

導宣城人登咸通七年進士第許棠其鄉人也平泉花木好高樹嵩少縱橫滿目前惆悵人間不平事今朝身在海南邊導題李太尉平泉莊詩也

盧渥

渥字子章軒冕之盛近代無比伯仲四人咸居顯列乾符初母憂服闋渥自前中書舍人拜陝府觀察使弟沼前長安令除給事

中弟沅自前集賢校理除左拾遺第沼自畿尉遷監察御史詔書疊至士族榮之文赴任陝郊自居守分司朝臣已下牙設祖筵洛城為之一空都人聳觀亘數十里渥題嘉祥驛詩曰交親榮賤洛城空秉鉞戎裝上將同星使自天丹詔下雕鞍照地數程中馬嘶靜谷聲偏響旆映晴山色更紅別後定知人易老滿街棠樹有遺風渥在舉場甚有時稱曾於渥水逆旅遇宣宗



微行意其貴人歛身避之帝呼與相見乃  
自稱進士盧涇帝請詩卷袖之而去他日  
對宰臣語及涇令主司擢第宰臣問涇與  
主上有何階緣涇具陳其由時亦不以為  
忝

### 滕倪

滕倪苦心為新詩嘉聲早播遠之吉州謁宗  
人太守郎中邁邁每吟其句云白髮不能  
容相國也同閑客滿頭生又題鷺鷥障子

云映水有深意見人無懼心邁曰魏文惜  
陳思之學潘岳袁王叔之文貴集一家之  
盛如此倪逼秋試捧笈告遊留詩為別悵  
然曰是必不祥倪至秋卒於商於館舍聞  
者莫不傷焉倪詩曰秋初江上別旌旗故  
國無家淡欲垂千里未知投足處前程便  
是聽猿時誤攻文字身空老却返樵漁計  
已遲羽翼凋令飛不得丹霄無路接羊池

### 費冠卿



冠卿字子軍。沁州人。久居京師。感懷詩云。螢  
燭不為苦。求名始辛酸。上國無交親。請謁  
多少難。九月風到面。羞汗成冰片。求名俟  
公道。名與公道遠。力盡得一名。他喜我且  
輕。家書十年絕。歸去知誰榮。馬嘶渭橋柳。  
特地起愁聲。登元和二年第。母卒既葬。而  
歸。歎曰。干祿養親耳。得祿而親喪。何以祿  
為。遂隱池州九華山。長慶中。殿院李行修  
舉其孝節。拜右拾遺。制曰。前進士費冠卿。

嘗預計。俯以文中第。祿不及於榮。養恨每  
積於永懷。遂乃屏身立園。絕跡仕進。守其  
志性。十有五年。峻節無用。清飈自遠。夫旌  
孝行。舉逸人。所以厚風俗。而敦名教也。宜  
承高獎。以儆薄夫。擢參近侍之榮。載佇移  
忠之効。冠卿竟不應命。杜荀鶴有詩。弔其  
墓曰。凡弔先生者。多傷荆棘間。不知三尺  
墓。高却九華山。天地有何外。子孫無亦閑。  
當時若徵起。未必得身還。冠卿以拾遺召。



不起賦詩云君親同是先王道何如骨肉  
一處老也知丘子合佐時自古榮華誰  
保。

### 李廓

廓李程之子也登元和進士第大中中拜武  
寧節度使不能治軍補關鄭魯言新麥未  
登徐必亂既而軍亂果逐廓按舊史廓有  
詩名大中末累官至潁州刺史再為觀察  
使子晝亦登進士第

廓落第詩云榜前潛拭淚衆裏自嫌身氣味  
如中酒情懷似別人暖風張樂席晴日看  
花塵盡是添愁客深居乞過春

### 薛能

能字大拙汾州人會昌六年進士大中八年  
書判入等補藍屋尉辟太原陝蒲河陽從  
事李福鎮滑州表觀察判官歷侍御史都  
官刑部員外郎福徙西川取為節度副使  
咸通中攝嘉州刺史歸朝遷主客度支刑



部郎中。俄判同州。京兆尹溫璋貶命權知  
尹事。出領感化節度。入授工書。復節度。徐  
州徙忠武。廣明元年。徐兵赴潞。水經許。能  
以前帥徐軍吏懷恩。館之州內。許軍懼徐  
人見襲。大將周岌因衆怒。逐能。自稱留後。  
能全家遇害。

獻僕射相公云。清如冰玉重如山。百辟嚴趨  
禮絕攀。強虜外聞。應破膽。平人相見。盡開  
顏。朝廷有道。青春好。門館無私。白日閑。致

却垂衣更何事。幾多詩句詠關關。  
青春背我堂堂去。白髮催人故故生。此能詩  
也。然無子美大雅之度。

秋有旅舍寓懷云。庭鎖荒蕪。獨夜吟。西風吹  
動故園心。三秋水落。半年客滿。地月明何  
處。砧。漁唱亂。沿汀鷺。合。鴈聲寒。咽隴雲深。  
平生只有松堪對。露浥霜欺不受侵。

曹鄴

鄴字業之。大中進士也。唐末以祠部郎中知



澤州老圃堂詩云邵平瓜地接吾廬。穀雨  
乾時手自鋤。昨日春風欺不在。就來山落  
讀殘書。

聶夷中

夷中有公子行云種花滿西園。花發青樓道。  
花下一禾生。去之為惡草。又詠田家詩云  
父耕原上田。子斲山下荒。六月禾未秀。官  
家已修倉。又云二月賣新絲。五月糶新穀。  
得得眼前瘡。剜却心頭肉。我願君王心。化

作光明燭。不照綺羅筵。徧照逃亡屋。所謂  
言近意遠。合三百篇之旨也。咸通十二年  
高湜知舉。榜內孤寒者。夷中公乘億許。棠  
夷中字坦之。尤貧苦。精古詩。咸通中為華  
陰尉。

張林

林擢進士第。官至御史。為詩小巧。名採景於  
園林。亭沼云。菱葉乍翻。人採後。芰荷初沒。  
舸行。時亦佳句也。林言毀佛寺。時御史有



蘇監宮者檢天下廢寺見銀佛一尺以下者多袖而歸時彌蘇捏佛溫庭筠遽曰好對蜜陀僧。

崔塗

春夜旅懷云水流花謝兩無情。送盡東風過楚城。蝴蝶夢中家萬里。杜鵑枝上月三更。故園書動經年別。華髮春惟兩鬢生。自是不歸歸便得。五湖烟景有誰爭。蜀城春云天涯憔悴身。一望一露巾。在處有芳草。滿

城無故人。懷才皆得路。失計自傷春。清鏡不堪照鬢毛。愁更新。塗字禮山。光啓進士也。

章碣

焚書坑詩云竹帛烟銷帝業虛。關河空鎖祖龍居。坑灰未冷山東亂。劉項原來不讀書。碣孝標之子。登乾符進士第。

方干

越州使院竹云莫見凌雲飄粉籜。須知礙石



作盤根細看枝上蟬遊處猶是笋時虫食  
痕月送綠陰斜上砌露凝寒色濕透門列  
仙終日逍遙地鳥雀潛來不敢喧  
世人如不容吾自縱天慵落葉憑風掃香粳  
倩水香花朝連郭霧雪夜隔湖鐘身在能  
無事願宜白此峰干為詩如鶴盤遠勢  
投孤嶼蟬曳殘聲過別枝齊梁以來未有  
之句也又貽天目中峰客有柘井夜聞鄰  
米落廢巢寒見別禽來之句

衛準

莫言閑話是閑話往往事從閑話來又何必  
剃頭為弟子無家便是出家人準大曆五  
年登進士第

司空圖

愚幼嘗自負既久而愈覺缺然得於春早則  
有草嫩侵沙長冰輕著雨消又人家寒食  
月花影午時天又雨微吟思足花落夢無  
聊得於山中則有坡暖冬生笋松涼夏健



人又川明虹照雨樹密鳥衝人得於江南  
則戍鼓和潮暗船燈照島幽又曲塘春盡  
雨方響夜深船又夜短猿悲減風和鵲喜  
靈得於寒下則有馬色經寒慘鵬聲帶晚  
飢得於喪亂則有驂騑思故第鷓鴣失佳  
人又鯨鯢入海涸魑魅棘林幽得於道宮  
則有碁聲花院閉幡影石壇高得於夏景  
則有地涼清鶴夢林靜肅僧儀得於佛寺  
則有松日明金像苔龕響木魚又解吟僧

亦俗愛群鶴終早得於郊園則有遠坡春  
早慘猶有水禽飛得於樂府則有晚粧留  
拜月春睡更生香得於寂寥則有客來當  
意愜花發遇歌成雖屢幾不濱於淺澗亦  
未廢作者之譏訶也七言云逃難人多分  
隙地放生鹿大出寒林又得劔卞如添健  
僕亡書久似憶良朋又孤嶼池痕春漲滿  
小欄花韻午甬初又故國春歸未有涯小  
欄高檻別人家五更惆悵迴孤枕猶自殘



燈照落菀又甲子今重數生涯只自憐殷  
勤元昨日旁午又明年皆不拘一槩也蓋  
絕句之作本於諧極於千變萬狀不知所  
以神而自神也豈容易哉今足下之詩時  
輩固有難及儻復以全美為上即知味外  
旨矣

王禹偁五代史闕文云圖字表聖自言蒲州  
人有後才咸通中登進士第雅好為文躁  
於進取頗自矜伐端士鄙之從事使府洎

登朝驟歷清顯巢賊之亂車駕播遷圖有  
先人舊業在中條山極林泉之美圖自禮  
部員外郎避地為日以詩酒自娛屬天下  
板蕩士人多徃依之互相推獎由是聲名  
籍甚昭宗反正以戶部侍郎召至京師圖  
既負才慢世謂已當為宰輔時人惡之稍  
抑其銳圖憤憤謝病復歸中條與人書疏  
不名官位但誦知非子又稱耐辱君上其  
所居在巖巖之上結茅屋命曰休休亭嘗自



為亭記云云

已上集  
史舊文

謹按圖河中虞鄉人

少有文采未為鄉里所稱會王凝自尚書  
即出為絳州刺史圖以文謁之大為凝知  
入知制誥遷書舍人知貢舉擢圖上第頃  
之疑出為宣州觀察使辟圖為從事既渡  
江御史府奏圖監察下詔追之圖感凝知  
已之恩不忍輕離幕府滿百日不赴闕為  
臺司所劾遂以本官分司久之召拜禮部  
員外郎俄知制誥故集中有文曰戀恩稽

命黜繫洛師于今十年方泰繪閣此豈躁  
于進取者耶舊史不詳一至于此圖見唐  
政多僻知天下必亂即棄官歸中條山尋  
以中書舍人召拜禮部戶部侍郎皆不起  
及昭宗播遷華下圖以密邇乘輿即時奔  
問復歸還山故其詩曰多病形容五十三  
誰憐借笏趨朝參此豈有意于相位耶河  
中節度使王重榮請圖撰碑得絹數千疋  
圖置于虞鄉市中恣鄉人所取一日而盡



是時盜賊充斥獨不入王官谷河中士人  
依圖避難獲免者甚衆昭宗東遷又以兵  
部侍郎召至洛下為柳璨所沮一謝而退  
梁祖授禪以禮部尚書召辭以老病卒時  
年八十餘又按梁室大臣乃至有如敬翔  
李振杜晚楊涉等皆唐朝舊族本以忠義  
立身重侯累將二百餘年一旦委質朱梁  
其甚者贊成弒逆唯圖以清直避世終身  
不仕梁祖故梁史拾圖小瑕以泯大節者

其有以六題休休亭之楹曰出若休休休  
莫莫矣伎倆雖多性靈惡賴是長教閑處  
著休休休莫莫莫一局碁一爐藥天意特  
情可料度白日偏催快活人黃金難買堪  
騎鶴若曰爾何能答云耐辱莫柳璨為相  
臣僚多被放逐圖為監察御史尤加畏慎  
昭宗郊禮畢上章懇乞致仕曰察臣本意  
非為官榮可驗衰羸庶全名節上特賜歸  
山其詔畧曰既養高以傲世類移山以釣



名心惟樂於激流仕非顯於食祿匪夷匪  
惠特忘反正之朝載省載思當徇遯栖之  
志宜放歸中條山詔辭乃璨之文也時多  
以四皓二疏譽之惟僧虛中云道裝訂鶴  
識春醉野人扶言其操履檢身非傲世者  
也又云有時看御札特地掛朝衣言其尊  
戴存誠非邀君也

華下云日多旱雲裂迸為千道血天地涕一  
以竣竟自烹妖孽堯湯遇災數災數還中

何事奸與邪古來難撲滅

僧舍貽友人云笑破人間事吾徒莫自欺  
解吟僧亦俗愛舞鶴終年竹上題幽夢溪邊  
約敵基舊山歸有阻不是故遲遲

下方云昏旦松軒下怡然對一瓢雨微吟思  
足花落夢無聊細事當某遣衰容喜鏡鏡  
溪僧有深趣書至又相邀

秦韜玉

貧女云蒼門未識綺羅香擬托良媒益自傷



誰愛風流高格調共憐時世儉梳粧改將  
十指諄織巧不把雙眉關畫長每恨年年  
厚針線為他人作嫁衣裳

韜玉字仲明京兆人父為左軍將韜玉出入  
田令孜之門又與劉曄李崑士姜垵蔡銍  
之徒交游中貴各將兩軍書尺僥求魏升  
時謂對軍解頭偕宗華蜀韜玉以工部侍  
郎為令孜神策判官及歸公主文韜玉准  
勅及第仍編入榜中韜玉以書謝新人呼

同年曰三條燭下雖阻門闌數仞墻邊幸  
同恩地

### 高駢

駢鎮蜀日以南詔侵暴築羅城四十里朝廷  
雖加恩賞亦疑其固護忽一日聞奏樂聲  
響知有改移乃題風箏寄意日夜靜絃聲  
響碧空宮商信任往來風依稀似曲才堪  
聽又被移將別調中旬日報到移鎮滑宮  
又二妃顯云帝舜南巡去不還二妃幽怨水



雲間當時珠淚知多少。直到如今竹尚斑。  
步虛詞云清溪道士人不識。上天下天鶴一  
隻。洞門深鎖碧函寒。滴露研珠點周易。  
聞河中王鐸加都統云煉汞燒鉛四十年。至  
今猶在藥爐前。不知子晉緣何事。只學吹  
簫便得仙。其驕傲不如此

翁承贊

承贊乾寧進士也。唐語云槐花黃舉子忙。承  
贊有詩云雨中粧點望中黃。勾引蟬聲送

夕陽。憶得當年隨計吏。馬蹄終日為君忙。

皮日休

日休賦龜詩嘲歸氏子曰硬骨殘形知幾秋。  
屍骸終是不風流。頑皮死後鑽須遍。都為  
平生不出頭。歸氏子以姓嘲日休云八片  
尖斜砌作愁。火中燻了水中標。一團閑氣  
如常在。惹踢招拳卒未休。

盧延遜

延遜吟詩多著尋常容易語。如送周太保赴



浙西云臂鷹健卒懸毡帽騎馬佳人裁畫  
初文寄友人云每過秘第邀看鶴長著公  
裳送上驢然於數篇見意尤妙育松寺云  
山寺取涼當夏夜共僧蹲坐石背前兩三  
條電欲為雨七八箇星猶在天衣汗稍停  
床上氣茶香時發澗中泉通宵聽論蓮華  
義不藉松因一覺眠又苦吟云莫話詩中  
事詩中難更無吟安一箇字樵斷數莖鬚  
浚北天應悶狂波海亦枯不同文賦易為

著者之子

裴說

唐舉子先投所業於公卿之門謂之行卷說  
只行五言十九首至來年秋賦復行舊卷  
人有譏之者說曰只此十九首苦吟尚未  
有人見知何假別行卷哉識者以為知言  
天復六年登甲第其詩以苦吟難得為工  
且拘格律嘗有詩曰苦吟僧入定得句將  
成功又贈僧貫休云總無方是法難得始



為詩又云是事精皆勿唯詩會却難遭亂  
故宦不達

洛中作云莫恠苦吟遲詩成鬢亦絲  
鬢絲猶可染詩病却難醫山暝雲橫處  
星沉月側時冥搜不易得一句至公知

綦云十九條平路言平又峻  
人心無筭處國手有輸時  
勢迫流星遠聲乾下窞遲  
臨軒終一局寒日又西垂

張為

為唐末江南詩人與周朴齊名如到處即閉  
戶逢君方展眉最有詩稱

杜光庭載毛仙翁事名干字鴻漸元和間劉  
禹錫李紳白樂天輩皆贈詩至大中戊寅  
五十餘年矣是歲張為薄遊長沙不及汲  
隨計獲女奴於岳麓下惑之歲餘成羸疾  
仙翁一見曰子妖氣邪光泆遍肌骨苟不相  
值殞於旦夕也以一粒授為於香爐焚之  
郁烈之氣聞百步魁妾一號而斃乃木偶



人也。又吞以丹砂如黍者三疾遂瘳。為作詩別之曰：羸形感神藥，削骨生豐肌。蘭炷飄靈烟，妖在立誅夷。重覩日月光，何報父母慈。黃河濁衮衮，別淚流淅淅。黃河清有時，別淚無收期。為後入釣臺山訪道而去。

韓偓

苑中云上苑離宮處處迷，相風高與露盤齊。金階罇出後，猊立玉柱雕成翡翠啼。外使

調鷹初得按

五方外按按鷹以鷹集初調習始能禽獲之得案中官

過馬不教嘶

上東馬命官中官韃以建謂之過馬

笙歌錦繡

雲霄裡獨許詞臣醉似泥

醉著云萬里清江萬里天，一村桑柘一村烟。

漁翁醉著無人喚，過午醒來雪滿船。

即事云書牆暗記移花日，洗瓮先知醒酒期。

須信閑人有忙事，早來衝雨覓漁師。

香奩集和魯公之詞也。惟其艷麗，故貴後嫁。

其名於偓，凝平生著述分為演綸游藝孝

弟疑獄香奩羸金六集自為游藝集序云



予有香奩籠金集不行於世疑在政府避  
議論諱其名又欲後人知故游藝集序實  
之此凝之意也沈存中云

曹松

李肇國史補云曲江大會比為下第舉人邇  
來漸侈靡比為上列所占向之下第舉人  
不復預矣所以通大會則先牒教坊請奏  
上御紫雲樓垂簾觀焉時或擬作樂則為  
之移日故曹松詩云追遊昔遇三清樂行

從應妨一日春勅下後人置皮袋例次圖  
障酒器錢給實其中逢花即飲故張籍詩  
云無人不惜花園宿。到處皆攜酒器行其  
皮袋狀元錄事同點檢關一則罰金曲江  
之宴行市羅列闐闐為之半空公卿家率  
少是日揀罷東床車馬闐塞莫可殫述  
松及第勅下宴中獻座主杜侍郎詩云得召  
丘璠淚却頻。若無公道也無因。門前送勅  
朱衣吏。席上銜盃碧落人。半夜笙歌教洗



那酬恩未殺身  
那酬恩未殺身

春日長安書事云浩浩看花晨六街揚遠塵

城中一丈草誰是晏眠人御柳舞著水野

鶯啼破春徒云還楚客猶自惜離秦

晨起云曉色教不睡垂簾清氣中林殘數枝

月髮冷一梳風並鳥聞鐘語欲荷隔霧空

莫徒營白日道路本無窮

松有詩云憇君莫話封侯事一將功成萬骨

杜荀鶴謂諸世故矣

杜荀鶴

荀鶴有詩名號九華山人大順初擢第授翰

林學士主客外郎知制誥序其文為唐文

集或曰荀鶴牧之微子也牧之會昌來自

齊安移守汝浦時年四十四所謂使君四

十四兩佩左銅魚者也時妾有姪出嫁長

林鄉正杜筠而生荀鶴擢第年四十六矣

溪興云山雨溪風卷釣絲瓦甌蓬底獨斟時



醉來睡著無人喚。流下前溪也不知。

春宮怨云。早被嬋娟誤。欲粧臨鏡。憐承恩不在貌。教妾若為容。風暖鳥聲碎。日高花影重。年年越溪女。相憶採芙蓉。

### 鄭繁

古今詩話曰。相國蔡善詩有題老僧詩云。日照西山雪。老僧門未開。凍瓶黏柱礎。宿火陷爐灰。童子病歸去。鹿麕寒入來。常云此詩屬對。可以衡秤。言輕重不偏也。或曰。相

國近為新詩。否對曰。詩思在灞橋風雪中。驢子上。此何以得之。蓋言平生苦心也。

蔡刺廬江將去。別都人云。唯有兩行公辭淚。一時灑向渡頭風。其滑稽類此。

### 錢翊

翊字瑞文。吏部尚書徽之子。善文辭。宰相王溥薦。知制誥。進中書舍人。溥得罪。翊貶撫州司馬。

永巷頻聞小苑遊。舊恩如淚亦難收。君前願



報新顏色團扇須防白露秋

嚴憚

皮日休傷嚴子重序云余為童在鄉校時簡  
上林杜舍人牧之集見有與進士嚴憚詩  
後至吳一日有客曰嚴某余忘其名久矣  
遽懷文見造於是樂甚觀其所為文工於  
七字往往有清便柔媚時可軼駿於常軌  
其佳者曰春光冉冉歸何處更向花前把  
一盃盡日問花花不語為誰零落為誰開

余羨之諷誦未嘗忘生舉進士亦十餘計  
借余力寬之謂終有得於時也未幾歸吳  
興後兩暮咸通十年也嘗入至云生以疾  
亡於所居矣噫生徒以詞聞於士大夫竟  
不名而逝豈止此而埋沒耶江湖間多羨  
材士君子苟樂退而有文者死無不為時  
惜可勝言耶於是哭而為詩魯望生之友  
也嘗為我作詩云十哭都門榜上塵蓋棺  
終是五湖人生前有敵唯丹桂沒後無家



抵白蘋若不斬新醒處月江南依舊詠來

春知君精爽倦無盡必在鄴都頌帝晨

成鄴都宮頌曰  
紂絕標帝異

### 王渙

大順中王渙自左史拜考功員外同年李德鄰自右史拜小戎趙光胤自補衮拜小儀王極自小板拜小勳渙首囑長句感恩上裴公曰青衿七十榜三年建禮含香次第遷珠影下連星錯落桂花曾對月嬋娟玉

經磨琢多成器劍拔深埋更倚天應念御恩最深者春來為壽拜樽前裴公荅曰謬待文柄得時賢粉署清華次第遷昔歲策名皆健筆今朝稱職並同年各懷器業寧推讓俱上青霄肯後先何事老夫猶賦詠欲將酬和意流傳渙字群吉大順二年侍郎裴贄下登第德鄰極光胤皆同年也七夕瓊筵往事陳蓼花蓮蒂共傷神蜀王殿裏三更月不見驪山私語人



夢裏分明入漢宮。覺來燈背錦屏空。紫臺月  
落關山曉腸斷。君恩信盡不

張曙

張曙崔昭緯中和初同舉相與詣日者問命  
曙時自負才名籍甚以為將來狀元崔亦  
分居其下日者殊不顧曙第白崔曰將來  
萬全高第曙有愠色日者曰郎君亦及第  
然須待崔拜相當此時過堂既而曙果不  
終場昭緯首冠曙以篇什刺之云千里江

山陪驥尾五更風水失龍鱗昨夜浣花溪  
上雨綠揚芳草為何人後七年昭緯為相  
曙方登第果於昭緯下過堂杜荀鶴同年  
生也酬曙詩云天上書名天下傳引來齊  
到玉皇前大仙錄後頭無雪至藥成來竈  
絕烟笑躡紫雲金作關夢拋塵世鐵為船  
九華山叟教馬凡骨同到蓬萊豈偶然

翁綬

詠酒云逃暑迎春復一秋無非綠蟻滿盃浮



百年莫惜千回醉一盞能消萬古愁幾為  
芳菲眠細草曾同雨雪上高樓平生名利  
關身者不識狂歌到白頭綬登咸通進士第

袁皓

皓宜春人咸通進士龍紀集賢殿圖書使自  
稱碧池處士初登第過岳陽悅妓藥珠以  
詩寄嚴使君曰得意東歸過岳陽桂枝香  
惹藥珠香也知暮雨生巫峽爭柰朝雲屬  
楚王萬恨只憑期尅手寸心唯繫別離腸

南亭宴罷笙歌散回首烟波路渺茫嚴君  
以妓贈之

李濤

李濤長沙人也篇詠甚著如水聲長在耳山  
色不離門又掃地樹留影拂床琴有聲又  
落日長安道秋槐滿地花膾炙人口溫飛  
卿任太學博士主秋試濤與衛丹張郃等  
詩賦皆勝於都堂

王祝



會昌時有題三鄉者曰余本若耶溪東與同志者二三紉蘭佩蕙每貪幽閑之境翫花光於松月之亭竟晝綿宵徃徃忘倦泊乎初筭至于五換星霜矣自後不得已從良人西入函關寓居晉昌里第其居迥絕巖塵花木叢翠東西鄰二佛宮皆上國勝遊之最伺其閑寂因游覽焉亦不辜一時之風月也不意良人已矣邈然無依帝里芳春光景東邁涉滻水歷渭川背終南陟太

華經號畧抵陝郊楫嘉祥之清流面女兒之蒼翠凡經過之所皆曩昔譙笑之地銜冤興嘆舉目覓銷雖殘骸尚存而精爽都失假使潘岳復生無以悼其幽思也遂命筆聊題終不能滌其懷抱絕筆慟哭而東時會昌壬戌歲仲春十九日詩曰昔逐良人西入關良人身歿妻空還謝娘衛女不相待為雨為雲歸舊山和者十人祝和三鄉詩云女兒山前嵐氣低佳人留恨此中



題亦知雲雨歸何處空使王孫見即迷祝  
字不耀名家子唐末為給事中

韋莊

長安清明云早是傷春夢雨天可堪芳草更  
芊芊內官初賜清明火上相閑分白打錢  
紫陌亂嘶紅叱撥綠楊高映畫鞦韆遊人  
記得承平事暗喜春光似昔年

感懷詩云長安方悟少年非人道新詩勝舊  
詩十畝野塘留客釣一軒春雨對僧碁花

間醉任黃鶯語亭上吟從白鷺窺大道不  
將爐冶去有心重築太平基或謂此詩包  
括生成果為台輔

莊字端已杜陵人見素之後曾祖少微宣宗  
中書舍人莊躋曠不拘小節李詢為西川  
宣諭和協使辟為判官以中原多故潛欲  
依王建建辟為掌書記尋召為起居舍人  
建表留之後相建為偽平章事

吳融



漁陽烽火照函關，玉輦怱怱下此山。一曲霓裳聽不盡，至今遺恨水潺潺。融字子華，越州人。昭宗特為翰林學士。

公乘億

億字壽仙，魏人。與李山甫皆為魏博樂彥禎幕府。億以詞賦著名，咸通十三年別家十餘年矣。嘗大病，鄉人傳以死，其妻自河北迎喪會億，送客馬上見婦人，寵懷類其妻也。睇睨不已，妻亦如之。詰之，則是也。相持

而哭，路人異之。後旬日登第，億嘗有詩云：十上十年皆落第，一家一半已成塵。可知其屈矣。

羅鄴

牡丹云落盡，春紅始見花。花時比屋事豪奢，買栽池館恐無地。看到子孫能幾家。門倚長衢，橫綉氈，幄籠輕日。護香霞，歌鍾到此爭歡賞。豈信流年鬢有華。

賞春云芳草和烟暖，更青閑門要路一時生。



年年點檢人間事，唯有春風不世情。鄴餘  
杭人，父則為益鐵小吏，有二子，俱以文學  
干進。鄴尤長七言詩。

羅隱

隱字昭諫，餘杭人。隱池之梅根浦，自號江東  
生。為唐相鄭畋、李蔚所知。畋女覽隱詩，諷  
誦不已，畋疑有慕才意，隱貌寢陋，女一日  
簾窺之，自此絕不詠其詩。廣明中，池守竇  
滔營墅居之。光啓中，錢鏐辟為從事，節度

判官副使。梁祖以諫議召，不行。開平中，魏  
溥羅紹威推為叔父，表授給事中。年八十

餘，終餘杭。

有子  
實翁。

鍾陵妓雲英，隱舊見之。一日，譏隱猶未第，隱  
嘲之曰：鍾陵醉別十餘春，重見雲英掌上  
身。我未成名君未嫁，可能俱是不如人。

牡丹云：似共東風別有因，絳羅高捲不勝春。  
若教解語應傾國，任是无情也動人。芍藥  
與君為近侍，芙蓉何處避芳塵。可憐韓令



功成後辜負襮華過此身

蜂云不論平地與山尖無限風光盡被沾採  
得百花成蜜後不知辛苦為誰甜

許棠

棠洞庭詩有口顧疑無地中流忽有山之句  
人以題扇過洞庭云驚波常不定半日鬢  
堪斑四顧疑無地中流忽有山鳥飛應畏  
墮帆遠却如閑漁父時相引行歌浩渺間

張蠩

送友人赴涇州幕云杏園沈飲散榮別就佳  
招日月相期盡山川獨去選府樓明蜀雪  
關積轉胡鵬縱有烟塵動應隨上策銷

蠩字象文唐末登第尉櫟陽避亂入蜀蜀王  
時為金堂公然後遊大慈寺見壁間題云  
墻頭細雨垂纖草水面回風聚落花問寺  
僧僧以蠩對乃賜霞光牋公寫詩以進蠩  
進二百首衍善之召為知制誥宋光嗣以  
蠩輕忽傲物遂止卒於官蠩生穎秀幼有



單于臺詩曰白日地中出黃河天外來為  
世所稱

鄭谷

谷字若愚袁州人故永州刺史之子幼年司  
空圖與刺史同院見而竒之曰曾吟得交  
夫詩否曰吟得莫有病否曰丈夫曲江晚  
望斷篇云村南斜日開回首一對鴛鴦落  
淚頭即深意矣司空嘆惜撫背曰當為一  
代風騷主乾寧中為都官郎中卒于家谷

自叙云故許昌薛尚書熊為都官郎中後  
數年建州李負外頗自憲府內彈拜都官  
負外皆一時騷雅宗師都官之曹振盛於  
此余早受知今忝此官復是正秩何以相  
繼前賢邪

濃淡方春滿蜀鄉半隨風雨斷鶯腸浣花溪  
上堪惆悵了美無情為發揚谷蜀中海棠  
詩也

相看臨遠水獨自上孤舟句潮平無別浦木



落見他山句情多最恨花無語愁破方知  
酒有權句關東多事日天未未歸心句捲  
卷斜陽裏句山落木中句兩浙尋山獨孤  
舟帶鶴歸句長安一夜殘春雨右省三年  
老拾遺句功趨黃道急殿揖紫宸深句  
題杭州樟亭云故國江天外登臨返照間潮  
平無別浦木落見他山沙鳥晴飛遠漁人  
夜唱閑歲窮歸未得心逐片帆還  
感興云未黍不陽艷競栽桃李春翻令力耕

者半作賞范人

十日菊云節去蜂愁蝶不知曉庭還繞折殘  
枝自綠今日人心別未必秋香一夜寒  
偶題云一卷踈蕪一百篇名成未敢便忘筌  
何如海日生殘夜一句能令萬古傳

溫憲

溫憲負外庭筠子也僖昭之間就試於有司  
值鄭相延昌掌邦貢以其父文多刺時復  
傲毀朝士抑而不錄既不第遂題一絕於



崇慶寺壁後滎陽公登大用因國忌行香  
見之憫然動容暮歸宅已除趙崇知舉即  
召之謂曰其項主文衡以溫憲庭筠之子  
深怒嫉之今日見一絕令人惻然幸勿遺  
也於是成名詩曰十口溝隍待一身半身  
千里絕音塵鬢毛如雪心如死猶作長安  
下第人

李昌符

秋晚歸故君云馬省曾行處連嘶渡晚河忽

驚鄉樹出漸識路人多細徑穿禾黍頽垣  
壓薜蘿乍歸猶似客鄰叟亦相過

傷春云酒醒鄉關遠迢迢聽漏終曙分林影  
外春盡雨聲中鳥思江村路花殘野岸風  
十年成底事羸馬倦西東昌符字品臺登  
咸通四年進士第歷尚書郎

北夢瑣言云咸通中前進士李昌符有詩各  
久不登第常歲卷軸急於裝修因出一奇  
乃作婢僕詩五十首於公卿間行之其間



有詩云春娘愛上酒家樓不怕歸遲總不  
憂報道那家娘子卧且留教住待梳頭又  
云不論秋菊與春花箇箇能噀空肚茶無  
事莫教頻入庫一名閑物要晏晏諸篇皆  
中婢僕之諱決旬京城盛傳是年登第與  
夫挑杖盛靴事雖不同用奇即無異也

李山甫

咸通中數舉進士被黜依魏府樂彦禎幕府  
因樂禍且怨中朝大臣導考禎子從訓伏

兵殺王鐸劫其家嘗有詩云勸君莫用誇  
頭角夢裡輸贏總未真譏執政也巢寇之  
亂翰林待詔王遨者北游在鄴山甫遇於  
道觀謂曰幽蘭綠水可得聞乎遨應命奏  
之曲終潛然曰憶在咸通玉亭秋夜供奉  
至尊不意流離至此也山甫賦詩曰幽蘭  
綠水耿清音嘆惜先生枉用心世上幾時  
曾好古人前何必獨霑襟句未成山甫亦  
自黯然悲其不遇也一本云情知此事少



知音自是先生在，用心世上幾時曾。好古  
人前何必更需襟，致身不似笙簧巧悅耳。  
寧如鄭衛法，三尺絲桐七條線。子期師曠  
兩沉沉。

貧女云平生不識綺羅裳，閑把荆簪益自傷。  
鏡裏祇應諳素兒，人間多是重紅粧。當年  
未嫁還憂老，終日求媒卽道狂。兩意定知  
無處說，暗垂珠淚滴。蚕筐國初高英秀者，  
與賚寧為師友，辯捷滑稽嘗譏古人詩病。

云山甫覽漢史王莽弄來，曾半破曹公將  
去便平沉。是破船詩李羣玉詠鷓鴣方穿  
詰曲崎嶇路，又聽鈎輶格磔聲。是梵語詩  
羅隱曰雲中鷄犬劉安過月裡笙歌煬帝  
歸，是見鬼詩杜荀鶴今日偶題題似著不  
知題後更誰題。此衛子詩也不然安有四  
蹄。

鍾離權

刑州開元寺有唐鍾離權處士二詩其一云



得道高僧不易逢。幾時歸去願相從。自言  
住處連滄海。別是蓬萊第一峯。其二云。莫  
厭追歡笑語頻。尋思離亂可傷神。閑來屈  
指從頭數。得到清平有幾人。

張道古

昭宗時拾遺張道古貢五危二亂表。黜居于  
蜀。後聞駕走西岐。又遷東洛。皆契五危之  
事。悉歸二亂之源。因吟一章上蜀王。詩曰  
封章才達冕旒前。黜詔俄離玉座端。二亂

豈由明主用。五危終被佞臣彈。西巡鳳府  
非為固。東播鑿與卒未安。諫疏至今如尚  
在。誰能更與讀。來看道古臨淄人。景福中  
進士。釋褐為著作。即遷右拾遺。播遷之後  
方鎮阻兵。道古上危亂疏云。只今劉備孫  
權已生於世矣。謫施州司戶參軍。後入蜀。  
王氏聞而憾之。乃變姓名賣卜導江青城。  
市中建開國召為武部郎中。至玉壘關。謂  
所親曰。吾唐室諫臣終不絕。拳跼與雞犬



同食雖召必再賤於死之。葬我於關東  
不毛之地題曰唐佐輔補闕張道古墓後  
遇害妻亦繼亡蜀主憫之俾拊葬焉鄭雲  
叟在華聞之有詩哭之曰曾陳章躡忤昭  
皇撲落西帝事可傷豈使諫臣終屈辱直  
疑天道惡忠良生前賣卜君三蜀死後馳  
名遍大唐誰是後來修史者言君力死正

顏綱

胡曾



王衍五年宴飲無度衍自唱韓琮柳枝詞曰  
桑苑隋堤事已空萬條猶舞舊春風子如  
思想千年事惟見楊花入漢宮內侍宋光  
溥詠曾詩曰吳王恃霸棄雄才貪向姑蘇  
醉綠醅不覺錢塘江上月一宵西送越兵  
來衍怒罷宴曾有詠史詩百篇行於世

伍唐珪

寒食日獻郡守云入門堪笑復堪憐三徑苔  
荒一釣船慙愧四鄰教斷人不知晉裏本



無烟唐珪唐末進士也

韓定辭

定辭為鎮州王鎔書記聘燕帥劉仁恭舍  
賓館命幕客馬彧延接馬有詩贈韓二燧  
林芳草綿綿思盡日相攜陟麗譙別後  
嵯嵯山上望羨君時復見王喬彧詩清秀然  
意在試其學問韓於座酬之曰崇霞臺上  
神仙客學辨癡龍藝最多盛德好將銀筆  
述麗詞堪與雪兒歌座賓廢不欽訝然亦

疑銀筆之僻也他日或持燕帥之命荅聘  
常山亦命定辭接於公館彧從容問韓以  
雪兒銀筆之事韓曰昔梁元帝為湘東王  
時好學著書常紀忠臣義士及文章之美  
者筆有三品或以金銀雕飾或用班竹為  
管忠孝全者用金管書之德行清粹者  
銀筆書之文章贍麗者以班竹書之故湘  
東之譽振於江表雪兒者李密之愛姬能  
歌舞每見賓僚文章有奇麗入意者



雪兒叶音律以歌之又問癡龍出自  
定辭曰洛下有洞穴曾有人誤墮於穴  
因行數里漸見明曠見有宮殿人物凡  
處又見有大羊羊鼻有珠人取而食之不  
知何所後出以問張華華曰此地仙九館  
也大羊者名曰癡龍耳定辭復問或巖壑  
山當在何處或曰此隨郡之故事何謙光  
而下問由是兩相悅服結交而去

同谷子

昭宗播岐何后用事有同谷子者詠五子之  
歌何后潛令秦王誅之事未行而奔去詩  
曰邦惟固本自安寧臨下常須馭朽驚何  
事一旬遊不返禍胎從此召殷兵酒色聲  
禽號四荒那堪峻宇又雕墻靜思今古為  
君者未或因茲不滅亡惟彼陶唐有冀方  
少年都不解思量如今筭得當年事者為  
盤遊亂紀綱明明我祖萬邦君典則貽將  
示子孫惆悵大康荒墜後垂後宗絕祀成廿



門仇讐萬姓遂無依顏季河曾解恠恠一  
子既歌邦已失一場前事悔難追

沈彬

彬字子文高安人也天性狂逸好神仙之事  
少孤西遊以三舉為約常夢著錦衣貼月  
而飛識者言雖有虛名不入月矣洪州解  
至長安初舉納省卷夢仙謠云玉殿大開  
從容入金桃爛熟没人偷鳳驚寶扇頻翻  
翅龍悟金鞭忽轉頭第二舉憶仙謠云白

榆風颯九天秋王母朝迴宴玉樓日月漸  
長雙鳳睡桑田欲變六龍愁雲翻簫管相  
隨去星觸旌幢各自流詩酒近來狂不得  
騎龍却憶上清游第三舉納省卷贈劉象  
為首云曾慙大中天子四朝風月鬢蕭  
疎不隨世祖重携劍却為文皇再讀書十  
載戰塵銷舊業滿城春雨壞貧居一枝何  
事於君惜仙桂年年幸有餘時劉象孤寒  
三十舉無成主司覽彬詩六年特效象及



第彬乾符中值駕遷三峰四方多事南遷  
嶺表二十餘年回吳中江南僞命吏部郎  
中致仕

彬詩有九衢冠蓋暗爭路四海干戈多異心  
之句

周朴

朴唐末詩人寓於閩中僧寺假丈室以居不  
飲酒茹葷塊然獨處諸僧晨粥卯食朴亦  
攜巾盂與諸僧下畢飯而退率以為常郡

中豪貴設供率施僧錢朴即巡行拱手各  
丐一錢有以三數錢與者朴止受其一耳  
得千錢以備茶藥之費行盡復然僧徒亦  
未常厭也性喜吟詩尤尚苦澁每遇景物  
搜竒抉思日旰忘返苟得一聯一句則忻  
然自快嘗野逢一負薪者忽持之且厲聲  
曰我得之矣樵夫矍然驚駭掣臂棄薪而  
走遇游徼卒疑樵者為偷兒執而訊之朴  
徐往告卒曰適見負薪因得句耳卒乃釋



之其句云子孫何處開為客松栢被八人  
作薪彼有一士人以朴僻於詩句欲戲之  
一日跨驢於路遇朴在傍士人乃敬帽掩  
頭吟朴詩云禹力不到處河聲流向東朴  
聞之怒遽隨其後且行士但從驢而去畧  
不回首行數里追及朴告之曰僕詩河聲  
流向西何得言流向東士人頷之而已閩  
中傳以為笑或曰曉來山鳥關雨過杏花  
稀亦朴詩也古陵寒雨絕高鳥夕陽明句

高情千里外長嘯一聲初句

黃巢至福州求得朴問曰能從我乎荅曰我  
尚不仕天子句從賊巢怒斬之

孫魴

潤州金山寺非孫魴留詩為第一篇山居  
大江中迥然孤秀詩意難盡羅隱云老僧  
齋罷關門睡不管波濤四面生孫生句云  
結宇孤峯上安禪巨浪間又曰萬古波心  
寺金山名曰新天多剩得石地少不生塵



過櫓妨僧定，警濤濺佛身。謠言張處士，題  
後更無人。魴夜坐，句云：劃多及漸冷，坐久  
席成痕。沈彬曰：此田舍翁火爐頭之作。爾  
魴，南昌人。唐末，鄭谷避亂歸宜春，魴往依  
之，頗為誘掖。後有能詩，聲終於南唐。魴父  
畫工也。王微為中書舍人，草魴誥詞云：李  
陵橋上，不吟取次之詩。顧凱筆頭，豈畫尋  
常之物。魴終身恨之。

王易簡

易簡，唐末進士。梁乾化中，及第，名居榜尾。不  
看榜，却歸華山，尋就山釋褐，授華州幕職。  
後召入拜左拾遺，及辭官歸隱，留詩一絕：  
日汨沒朝班，愧不才誰能低折向塵埃。青  
山得去且歸去，官職有來還自來。及再召  
為郎，遷諫垣臺閣三十年，歸華山十年而  
終。

范攄之子

吳人范攄，處士之子。七歲能詩，贈隱者云：掃



葉隨風便澆花趁日陰方平曰此子他年  
必成名又吟夏日云閑雲生不雨病葉落  
非秋干曰惜哉必不享壽果十歲卒

鄭雲叟

鄭徵君為詩皆祛淫靡迥絕罽塵如富貴曲  
云美人梳洗時滿頭間珠翠豈知兩片雲  
戴却數鄉稅有詠西施云素面已云妖更  
著花鈿飾臉橫一寸波浸破吳王國又七  
言傷時云帆力劈開滄海浪馬蹄踏破亂  
聽松飯過時荷竿尋水釣背局上崑碁祭  
廟人來說中原正亂離

僧子蘭

太平里尋兵部裴郎中云不語淒涼無限情  
荒堦行盡又重行昔年住此人何在空見  
槐花秋草生

僧靈澈

生於會稽本湯氏字澄源與吳興詩僧皎然  
遊然薦之包吉李紆以是上人之名由二



公而颺正元中遊京師緇流嫉之造飛語  
激動中貴人侵誣得罪徙汀州後歸會稽  
元和十一年終于宣州劉夢得曰詩僧多  
出江右靈一導其源護國襲之清江揚其  
波法振沿之如么絃孤韻瞥入人耳非大  
音之樂獨吳興畫公能備衆體澈公承之  
至如芙蓉園新寺詩曰經來白馬寺僧到  
赤烏年謫汀州云青蠅為吊客黃犬寄家  
書可曾入作者閩域豈獨雄於詩僧間耶

山青淨名淨利過於酒醉得人心死不醒  
又題霍山秦尊師云老鶴玄猿伴採芝有  
時長嘯獨移時翠娥紅粉嬋娟劒殺盡世  
人人不知又偶題似鶴如雲一箇身不憂  
家國不憂貧擬將枕上日高睡賣與世間  
富貴人又思山詠因賣丹砂下白雲鹿裘  
怕惹九衢塵不如將爾入山去萬是千非  
愁殺人又景福中作云悶見戈鋌匝四溟  
恨無竒策救生靈如何飲酒得長醉直到



太平時節醒又招友人游春云難把長繩  
繫日烏芳時偷取醉工夫任堆金壁磨星  
斗買得花枝不老無又山居云閑見有人  
尋移庵更入深落花流澗水明月照松林  
醉勸頭陀酒閑教孺子吟身同雲外鶴斷  
得世塵侵又詩云冥心栖木室散髮浸流  
泉採栢時逢麝看雲忽見山夏狂衝雨戲  
春醉戴花眠絕頂登雲望東都一點烟又  
詩不求朝野知臥見歲華移採藥歸侵夜

九日和于使君思上京親故云清晨有高會  
賓從出東方楚俗風烟古汀州草木涼山  
情來遠思菊意在重陽心憶華池上從容  
鴛鴦行

僧靈一

新泉詩云泉源新湧出洞澈映纖雲稍落芙蓉  
沼初淹苔蘚文了將空色淨素與衆流  
分若對清宵月冷然夢裡聞

劉長卿和云東林一泉水復與遠公期石淺



寒流處山空夜落時  
夢闌聞細響慮澹向  
清漪動靜皆無意  
唯應道者知

高仲武云自齊梁以來  
道人為文者多矣少  
有入其流一公乃能  
尅意精妙與士大夫  
更唱迤和不其偉歟  
泉湧壻前地雲生戶  
外峯則遺猷寶月曾  
何及此靈一大曆正  
元間僧也

酬皇甫冉西陵見寄  
云西陵渡信滿島嶼沒  
中流越客依風水相  
思南渡頭寒光生極  
浦落日映滄洲何事  
揚帆去空驚海上鷗  
溪行即事云近液山  
更碧入林溪轉清不  
知伏午地潭洞何縱  
橫曲岸烟初合平湖  
月未生孤舟屢失道  
但聽秋泉聲

重還宜豐寺云載過  
招隱寺重會息心期  
樵客問歸日山僧記  
別時野雲陰遠甸秋  
水漲前陂勿謂頻來  
此吾今不好竒

三章姚合取  
為極文集

酬皇甫冉將赴無錫雲門寄別云  
湖南通古



寺來徃意無涯欲識雲門路千峯向若耶  
春山子建宅古木謝敷家自是長俱隱那  
云相去賒

宿天柱觀詩云石室初投宿仙翁幸見容花  
源隨水遠洞府過山逢泉湧堦前地雲生  
戶外峯中宵自入定非是欲降龍

僧清江

病起云身世足堪悲空房卧病時捲簾槐雨  
滴掃室竹陰移三覺生如夢那堪壽不知

未能通法性詎可見支離

僧廣宣

王起於會昌中放第二榜宣以詩寄賀曰從  
辭鳳閣掌絲綸便向青雲領貢賓再闢文  
場無在路兩開金榜絕堯人眼者龍化門  
前水手放鶯飛谷口春明日定歸台席去  
鵲鷓原上共陶鈞起和云延英面奉入春  
闈亦選工夫亦選奇在冶只求金不耗用  
心空學秤無私龍門變化人皆望鶯谷飛



鳴自有時獨喜向公誰是證彌天上六與  
新詩時劉夢得元微之皆和之宣與夢得  
最善

退之有廣宣上人頻見過詩云三百六句長  
擾擾不衝風雨即塵埃久慙朝士無裨補  
空愧高僧數往來學道窮年何所得吟詩  
竟日未能迴天寒古寺遊人少紅葉窓前  
有幾堆

僧法振

趙使君生子粹日詩云毛骨貴天生肌膚玉  
雪明見人空解笑弄物不知名國器嗟猶  
小風姿望亦清抱來芳樹下時聽鳳凰聲

僧皎然

僧皎然一日嘗於舟中抒思作古體十數篇  
求合常蘇州常大不喜明日獻其贍製乃  
極稱賞云何不但以所工見投而猥希老  
夫之意人各有所得非卒能致書大服其  
鑒裁之精



同裴錄事樓上望云退食高樓上湖山向晚  
晴桐花落萬井月影出重城水竹涼風起  
簾幃暑氣清蕭蕭獨無事因見蒞人情

皎然詩式著偷語詩例云如陳后主詩日月  
光天德取傳長虞日月光太清上三字語  
同下二字義同偷意詩例云如沈佺期詩  
小池殘暑退高樹早涼歸取柳渾太液滄  
波起長揚高樹秋偷勢詩例云如王昌齡  
詩手携雙鯉魚自送千里鴈悟彼飛有適

嗟此羅夏患取稽康目送歸鴻手揮五絃  
俯仰自得遊心太玄詩式云詩有跌宕格  
二品一曰越俗其道如黃鶴臨風貌逸神  
蕩杳不可羈郭景純遊仙詩左把浮丘袖  
右拍洪崖肩鮑明遠詩舉頭四顧望但見  
松栢繁荆棘鬱叢叢中有一鳥名杜鵑言  
是古時蜀帝魂聲音哀苦鳴不息羽毛憔悴  
似人髮飛走樹間啄蟲蠹豈知往日天子  
尊念茲變化非常理中間惻隱不能言



二曰駭俗其道如楚有接輿曾有原壤外  
示驚俗之貌內藏達人之度郭景純遊仙  
詩嫦娥揚妙音洪崖領其願王梵志道情  
詩我昔未生時冥冥無所知天公長生我  
生我復何為無衣使我寒無食使我飢還  
你天公我還我未生時賀知章放達詩云  
落花真好些一醉一月顛盧照鄰漫作云  
城狐尾獨速山鬼面參覃澹沒格一品曰  
澹俗此道如夏姬當爐似蕩而貞采吳楚

之風雖俗而正古歌曰華陰山頭百尺井  
下有流泉撒骨冷可憐女子來照影不照  
其餘照斜領調笑格一品曰戲俗漢書云  
匡昺來解人願蓋說詩也此一品非雅作  
足以為談笑之資矣李白狂詠女媧弄黃  
土搏作愚下人散在六合間濛濛若埃塵  
賦得啼猿送客三峽云萬里巴江外三聲月  
峽深何年有此路幾客共霑襟斷臂分重  
影流泉入苦吟淒淒離別後聞此更傷心



僧文秀

端午詩云節分端午自誰言萬古傳名為屈  
原堪笑楚江空浩浩不能洗得直臣冤

秀唐末詩僧也鄭谷喜秀上人相訪詩他夜  
松堂宿論詩更入微之句又次韻秀上人  
長安寺居言懷云舊齋松老別多年香社  
人稀喪亂間出寺只知趨內殿閉門長似  
在深山又重訪秀上人云展盡長懷吳寺  
殿宜茶偏賞雪溪泉又寄題詩僧秀公云

靈一心傳清塞心可公吟後楚公吟近來  
雅道相親少惟仰吾師所得深好句未停  
無暇日舊山歸老有東林吟曹孤宦其寥  
落多謝攜筇數訪尋秀南僧也而居長安  
以文章應制故谷送遊五臺詩云內殿評  
詩切身迴心未迴

僧棲白

中秋夜月云尋常三五夕不是不嬋娟及到  
中秋滿還勝別夜圓清光凝有露皓色爽



無烟自古人皆翫年來更一年

哭劉德仁云為愛詩名吟到此風魂雪魄去  
難招直教桂子落墳上生得一枝冤始銷  
冬日寄僧友云斂屨入寒竹安禪過漏聲高  
杉殘葉落深井凍痕生罷磬松枝動懸燈  
雪屋明何當招我友乘月上方行

秋夜宿西林寄賈島云啼虫喧暮色默思坐  
西林聽雨寒更盡開門落葉深昔因京邑  
病併起洞庭心亦是吾兄事遲迴直至今

秋日寄厲元云楊柳起秋色故人猶未還別  
離何自苦少壯豈能閑連雨吟殘燭秋城  
憶遠山何當同一見語默此林間

廬山寺云千峰盤磴盡林寺昔年名步步入  
山影房房聞水聲多年人跡絕殘月石陰  
清更可求居止安閑過此生

金州別姚合云日日西亭上春留到夏殘言  
之離別易允矣道途難山出一千里溪行  
三百灘松間樓月裏秋入五陵寒



姚合送無可往越州云清晨相訪門前六麻  
屨方袍一少年懶讀經文求作佛願攻詩  
句覓成仙芳春山影花連寺觸夜潮聲月  
滿船今日送行偏惜別共師文字有因緣

### 僧懷溈

姪歸郡僧懷溈不知何所人乾寧初知來識  
往皆有神驗刺史于公以其感衆繫而詰  
之乃以詩代通狀云家在閩山西復西其  
中歲歲有鶯啼如今不在鶯啼處然向在舊

時啼處啞文詰之復有詩云家在閩山東  
復東其中歲歲有花紅而今不在花紅處  
花在舊時紅處紅守異而釋之詳其詩意  
似在海中得非杯渡之流乎出北夢  
瑣言

### 僧可朋

可朋丹稜人少與盧延讓為風雅之交有詩  
千餘篇號玉壘集會題洞庭詩曰水涵天  
影濶山拔地形高贈友人曰來多不似客  
坐久却垂簾歐陽炯以此比孟郊賈島言



其好飲酒貧無以償酒債故時賙之可朋  
自號醉髡贈方干詩云月裏豈無攀桂分  
湖中空賞釣魚休杜甫舊居云傷心盡日  
有啼鳥獨步殘春空落花寄齊已云雖陪  
北楚三千客多話東林十八賢劉公詩話  
云有詩僧讀洪州滕王閣詩謂守者詩總  
不佳何不除却守曰僧能佳乎即吟曰洪  
州太白方積翠滿空蒼萬古遮新月半江  
無夕陽守異之然南方浮屠能詩者多矣

予嘗見丁朋詩云虹收千嶂雨潮弄半江  
天又云詩因試客分題僻素為饒人下著  
低不減古人

僧雲表

寒食詩云寒食時看郭外春野人無處不傷  
神平原察察添新塚半是去年來哭人

僧貫休

姓姜氏字德隱婺州蘭溪人錢鏐自稱吳越  
國王休以詩投之曰貴逼身來不自由幾



年勤苦踏林丘滿堂花醉三千客一劍霜  
寒十四州萊子衣裳宮錦窄謝公篇詠綺  
霞羞他年名上凌烟閣豈羨當時萬戶侯  
鏐諭改為四十州乃可相見曰州亦難添  
詩亦難改然閑雲孤鶴何天而不可飛遂  
入蜀以詩投王建曰河北河南處處災惟  
聞全蜀少塵埃一甌一鉢垂垂老千水千  
山得得來秦苑幽棲多勝景巴歛陳貢愧  
非才自顛林藪龍鍾者亦得親登郭隗臺

建遇之甚厚建二年春令誦近詩時貴戚  
皆坐休欲諷之乃稱公子行云錦衣鮮華  
手擎鷗閑行氣貌多輕忽稼穡艱難總不  
知五帝三皇是何物建稱善貴倖皆怨之  
休與齊已齊各有西岳集十卷吳融為之  
序卒死于蜀

赤旃檀塔六七級白齒蕩花三四枝禪客相  
逢只彈指此心能有幾人知石霜問云如  
何是此心休不能答石霜云汝問我答休



即問之霜云能有幾人知

春山行云重疊太古色濛濛花雨時好山行  
恐盡流水語相隨黑壤生紅木黃猿領白  
兒因思石橋月曾與道人期

晚泊湘江懷古云烟浪漾秋色高吟似得鄰  
一林湘渚月千古獨醒人岸濕穿花遠風  
香禱廟頻只應諛佞者到此不傷神

天台老僧云獨住無人處松龕嶽雪侵僧中  
九十臘雲外一生心白髮垂不剃青眸笑

更深猶能指孤月為我暫開襟

寒思廬山賈生云山深詩癖甚寒夜更何為  
覓句如頑坐嚴霜打不知石膏黏木屨崖  
栗落冰池近見禪僧說生涯勝往時

題嶧桐律師院云律中麟角者高竄出塵埃  
芳草不曾觸幾生如此交登風吹磬斷杉  
露滴花開如結林中社余願一陪

言詩云經天緯地物動必是他才竟日覓不  
得有時還自來真風含爽髮秋色入靈臺



吟向霜蟾下終須神鬼哀

休糧僧云不食更何求自由中自由身輕嫌  
衲重天旱為民愁供器誰將去坐臺蟻不  
遊會須傳此術歸去老林丘

詎是言休即便休清吟孤坐碧溪頭三間茅  
屋無人到十里松門獨自遊明月清風宗  
炳社夕陽秋色庾公樓脩心未到無心地  
萬種千般逐水流

心心不住希夷石室巉巖白髮垂惜竹不  
除當路筍愛松留得碍人枝焚香開卷雲  
生砌捲箔真心月在他無限故人頭盡白  
不知頭白又何之

自古浮華能幾何逝波今日去滔滔漢王廢  
苑生秋草吳王荒宮入夜濤滿屋黃金機  
不息一頭白髮氣猶高豈知物外金仙子  
耳露天香滴毳袍

古意云乾坤有清氣散入詩人脾聖賢遺清  
風不在惡木枝千人萬人中一人兩人知



意在東溪日花開葉落時幾擬以黃金鑄  
作鍾子期

僧齊已

戊辰歲湖中寄鄭谷郎中云白髮久慵簪常  
聞病亦吟瘦應成鶴骨閑想似禪心上國  
揚花亂浴洲荻笋深不堪思翠華西望獨  
沾襟

山寺喜進士至云聞年春過後山寺始花開  
還有無心有閑尋此境來鳥幽聲忽斷茶

好味重廻知在南嶺公冥心坐綠苔

登祝融峯云獲鳥共不到我來身欲浮四邊  
空碧落絕頂正清秋宇宙知何極葉弄見  
細流壘西獨立夕斜日轉神州

宿簡寂觀云萬壑雲霞影千峯松桂聲如何  
教下士容易信長生月共虛無白香和沆  
瀣清閑尋古廊畫記得列仙名

僧西塲

短歌行云塔光堪自笑浮世懶思量身得幾



時活眼看終日忙，千金無壽藥。一鏡有愁霜，早向塵埃外。光陰任短長。

### 僧清塞

贈王道士云：藥力資蒼鬢，應非舊日身。一為嵩岳客，幾葬洛陽人。冰縫瓢探水，雲根斧斲薪。關西往來熟，誰得水銀銀。

贈幻羣法師云：北京從別後，南越幾聽砧。住久白髭出，講長黃葉深。香連鄰舍，係磬徹遠。巢禽寒冥，應關道。何人見此心。

送耿逸人南歸云：南行心越，僧舊葉一池菱。兩鬢已如雪，五湖歸掛罾。夜濤鳴柁鎖，寒葦露船燈。此去應無事，却來期未能。

早秋過郭勁書齋云：暑消尚舍清閑坐，有餘情。石水出茶味，松風減扇聲。遠雲收海雨，靜角掩山城。此地清吟苦，時來逸菊行。

送康沼歸建業云：南朝秋色滿歸去，思如何。帝業空城在，民耕壞塚多。月明臺獨上，栗紈寺頻過。籬下西江闊，初思見白波。



贈百嵩禪師云野寺絕依念空山曾徧行老  
來披衲重病起讀經生乞食嫌村遠尋溪  
愛路平多年百嵩主不記百嵩名

贈胡僧云瘦形無血色草履著從穿閑語似  
持呪不眠同坐禪背經來漢地袒膊過冬  
天情性人難會遊方應信緣

贈絕粒僧云一齋難過日况復更休糧養力  
時行道聞鐘不上堂唯留煨藥火不寫化  
金方舊有山厨在從僧請作房

晚秋江館云病寄泗州二帶城傍門高柳一  
蟬鳴澄江月上見魚擲荒徑葉乾聞大行  
越嶠夜無侵閣色寺鐘涼有隔原聲故園  
賣盡休歸云湖水秋來空自平

贈李道士云布褐高眠石竇春迸泉多濺黑  
紗巾昂頭說易當閑客落手圍碁對俗人  
自筭天年窮甲子誰同兩夜守庚申擬歸  
太華何時去他日相逢乞藥銀

秋日同朱慶餘懷少室舊隱云曾居少室黃



河畔秋夢長懸未得迴。病十年離水石。  
思歸一夜隔風雷。荒齋幾度僧眠起。晚菊  
類經塵路來。燈下此心誰共說。傍松幽徑  
已多苔。

師東洛人。姓周氏。少從浮圖法。遇姚合而返。  
乃易名賀。初與賈長江無可齊。各賀笑百  
崑師云。林逋西風急。松枝構秋餘。凍鬢亡  
夜剝遺偈。疾時書地燦。焚身後堂空。卧影  
初。此時類下濬。曾省到吾廬。特爲亦有詩。

云苔覆石床。新師曾心幾。春寫留行道影。  
焚却坐禪身。塔院關松雪。經房鎖隙塵。自  
嫌雙淚下。不是解空人。時謂相伴云。兩鬢  
已垂雪。五湖歸釣魚。送人句夜濤鳴柵鎖。

寒葦露船燈。句石水生茶味。林風滅扇聲。  
句磬徹遠巢禽。句伊流背行客。岳響答清

猿。句

唐有周賀詩。即清塞也。秋宿洞庭云。洞庭初  
葉下。旅客不勝愁。明月天涯夜。青山江上



秋一官成白首萬里寄滄州  
只被浮名繫寧無愧海鷗

巴陵秋思云揚柳已寒色  
楚田方刈禾歸心  
病起切敗葉夜來多  
細雨城蟬噪殘陽  
客過故鄉餘業在  
杏隔洞庭波

岳陽樓云平楚起寒色  
秋秋猶未還世情何  
處淡湘水向人閑  
空翠隱高鳥夕陽歸遠  
山孤舟萬里外  
惆悵洞庭間

三詩并周賀

僧文益

看牡丹云雖毳對芳叢  
來趣不同髮從今  
日白花是去年紅  
艷色隨朝露馨香  
逐晚風何須待零落  
然後始知空

僧脩睦

秋日閑居云是事不相閑  
誰人似此閑捲簾  
當白晝移榻對青山  
野鶴眠松上秋苔長  
雨間發僧頗有信  
昨日得書還

睡起作云長空秋雨歇  
睡起覺清神看水看  
山坐無名無利身  
偈吟詩祖意茶碾去年



春此外誰相識孤雲到尚嬾

題東林云欲去不忍去徘徊吟遶柳水先秋  
澹蕩僧好語尋常碑古苔文壘山晴鍾韻  
長翻思南嶽上欠此白蓮香

僧景雲

畫松云畫松一似真松樹且待尋思記得無  
曾在天合山上見石橋南畔第三株

僧可止

哭賈島云燕生松雪地死葬山根可僻降

今古官卑誤子孫塚園寒月色人天苦吟  
魂暮雨滴碑字年年添蘚痕

僧卿雲

長安言懷寄沈彬侍郎云故園梨嶺下歸路  
接天涯生作長安草勝為邊地花鴈南飛  
不到書北寄來賒堪羨神仙客青雲早致家  
舊國里云舊居梨嶺下風景近炎方地暖生  
春早家貧覺歲長石房雲過濕松徑雨餘  
香日以竟無事詩書聊自彊



僧處默

題聖果寺云路自中峯上盤迴出薜蘿到江  
吳地畫隔岸越山多古木叢青靄遙天浸  
白波下方城郭近鐘磬接笙歌

螢云熠熠與娟娟池塘竹樹邊亂飛如拽火  
成聚却無烟微雨灑不滅輕風吹欲燃昔  
時書案上頗把作囊懸

遠烟云靄靄前山上凝光滿薜蘿高風吹不  
盡遠樹得偏多翠與晴雲合輕將浩氣和

正堪流野目休問意如何

織婦云蓬鬢蓬門積恨多夜闌燈下不停梭  
成繡猶自陪錢納未上青樓一曲歌

僧澹公

病後作云未得身亡法此身終未安病腸猶  
可洗瘦骨不禁寒藥少心神解經無氣力  
看悠悠片雲質獨坐夕陽殘

寫真云圖形期自見自見却傷神已是夢中  
夢更逢身外身水花凝幻質墨彩聚空塵



堪笑余蕪爾俱為未了人

僧若虛

古鏡云軒后洪爐獨鑄成  
蘚痕磨落月輪呈  
萬般物像皆能鑒  
一箇人心不可明  
匣內乍開鸞鳳活  
臺前高掛鬼神驚  
百年肝膽堪將比  
只怕頻看素髮生

僧曇域

贈島雲禪師云遠庵枯葉滿  
羣鹿亦相隨  
頂骨生新髮  
庭松長舊枝  
禪高太白月  
行出

祖師碑亂後潛來此  
高人總不知

僧懷浦

初冬旅舍早懷云枕上角聲微  
離情未息機  
夢回三楚寺  
寒入五更衣  
月沒栖禽動  
霜晴凍葉飛  
自慙于役早  
深與道相違

僧慕幽

燈云鐘斷危樓鳥不飛  
熒熒何處最相宜  
香燃水寺僧開卷  
筆寫春闈客著詩  
忽爾思多穿壁處  
偶然心盡斷纒時  
孫康勤苦誰



留念少減餘光借與伊

僧尚顏

寄陳陶處士云鍾陵城外住喻似玉沉泥道  
直貧嫌殺神清語亦低雪深加酒債春盡  
減詩題記得曾遊宿山茶又更檣

開元宮人

開元中賜邊軍纈衣製於宮中有女士於短  
袍中得詩曰沙場征戍客寒苦若為眠戰  
袍經手作知落阿誰一匣蓄意多添線含情

更著綿今生已過也重結後生緣兵士以  
詩白帥帥進呈玄宗以詩遍示宮中曰作  
者勿隱不汝罪也有一宮人自言萬死上  
深憫之遂以嫁得詩者謂曰吾與汝結今  
生緣邊入感泣

崔氏

盧綽書年暮娶崔氏結褵之後為詩曰不怨  
盧郎年紀太不怨盧郎官職卑自恨妾身  
生較晚不及盧郎年少時



劉氏

杜羔不第將至家其妻劉氏先寄詩云良人  
端如有奇才何事年年被放迴如今妾面  
羞君面君到來時近夜來羔即迴尋登第  
又寄詩云長安此去無多地鬱鬱葱葱佳  
氣浮良人得意正年少今夜醉眠何處樓

或云  
趙氏

薛媛

濠梁南楚材旅遊陳穎受穎牧之卷無返舊

意其妻薛媛寫真寄之曰之下冊書筆先  
拈寶鏡端已驚顏索寞漸覺鬢凋殘淚眼  
猶將易愁腸寫出難恐君渾忘却時展畫  
圖看夫婦遂偕老焉特入嘲之曰當時婦  
棄夫今日夫棄婦若不逞丹青空房應獨

守

雲漢  
友議

李季蘭

寄韓校書云無事烏程縣蹉跎歲月餘不知  
芸閣吏寂寞意何如遠水浮仙棹寒星伴



使車因過大雷岸莫忘八分書

李蘭五六歲其父抱於庭蘭作詩詠善薇云  
經時未架却心緒亂縱橫父恚曰此必為  
失行婦也後竟如其言

高仲武云士有百行女有一德李蘭則不然  
形器既雌詩意亦蕩自鮑暉以下罕有其  
倫如遠水浮仙棹寒星伴使車此五言之  
嘉境也上方班婕妤好則不足下比韓英則  
有餘不以遲暮亦一俊異劉長卿韻李蘭

為女中詩豪

如意中女子

如意中女子年九歲能吟詩則天試之皆應  
聲而就其兄辭去則天令作詩送兄遂賦  
云別路雲初起離亭葉正飛所嗟人異鴈  
不作一行歸

魚玄機

玄機咸通中西京咸宜觀女道士也字幼微  
善屬文其詩有綺陌春望遠瑤徽秋興多



又殷勤不得語紅淚一雙流又焚香啓玉  
壇端簡禮金闕又雲情自鬱爭同夢仙貌  
長芳又勝花後以笞殺女童綠翹事下獄  
獄中有詩云易求無價寶難得有情夫又  
云明月照幽隙清風開短襟

僖宗宮人

唐僖宗自內出袍千領賜塞外吏士神策軍  
馬真於袍中得金鎖一枚詩一首云玉燭  
製袍夜金刀可手裁鎖寄千里客鎖心終

不開真就市貨鎖為人所告主將得其詩  
奏聞僖宗令赴闕以宮人妻真後僖宗幸  
蜀真晝夜不解衣前後捍禦

張建封妓

樂天有和燕子樓詩其序云徐州張尚書亦  
有愛妓盼盼善歌舞雅多風態為校書郎  
時遊淮泗間張尚書宴子酒酣出盼盼以  
佐歡予因贈詩落句云醉嬌勝不得風嫋  
牡丹花一歡而去爾後絕不復知茲一紀



矣。昨日司勳負外郎張仲素繪之。訪余因吟詩有燕子樓詩三首，辭甚婉麗，詰其由，乃盼盼所作也。繪之從事武寧軍，累年頗知盼盼始末。云張尚書旣歿，彭城有張氏舊第，中有小樓名燕子，盼盼念舊愛而不嫁，居是樓十餘年。于今尚在。盼盼詩云：樓上殘燈伴曉霜，獨眠人起合歡床。相思一夜情多少，地角天涯不是長。又云：北邙松柏鎖愁烟，燕子樓人思悄然。自埋劍履歌

塵散，紅袖香銷一十年。又云：適看鴻鴈岳陽迴，又覩玄禽逼社來。瑤瑟玉簫無意緒，任從蛛網任從灰。余嘗愛其新作，乃和之云：滿窓明月滿簾霜，被冷燈殘拂卧床。燕子樓中寒月夜，秋來祗爲一人長。鈿帶羅衫色似烟，幾回欲起即潛然。自從不舞霓裳曲，疊在空箱十二年。及今春有客洛陽，迴曾到尚書墓。上來見說白楊堪作柱，爭教紅粉不成灰。又贈之絕句：黃金不惜買



蛾眉揀得如花四五枝歌舞教成心力盡  
一朝身去不相隨後仲素以余詩示盼盼  
乃反覆讀之泣曰自公薨肯妾非不能死  
恐百載之後以我公重色有從死之妾是  
玷我公清範也所以淪生耳乃和白公詩  
云自守空棲歛恨眉形同春後牡丹枝舍  
人不會人深意訝道泉臺不去隨盼盼得  
詩後快快旬日不食而卒但吟云兒童不  
識冲天物謾把青泥汗雪臺出長慶集

女郎宋若昭

若昭長州人父廷芬生五女皆警慧善屬文  
長若幸次若照若倫若憲若荀若昭尤高  
若性素潔鄙薰澤靚粧不願歸人欲以學  
名家家亦不欲與寒鄉凡裔為姻對正元  
中昭義節度使李抱真表其才德宗詔入  
禁中試文章并問經史大義帝咨美悉留  
宮中帝能詩每與侍臣賡和五人者皆預  
又高其風標不以妾侍命之呼學士自正



元七年祕祭圖籍詔若華總領元和末卒  
後穆宗拜若照尚宮嗣其秩歷穆敬文三  
朝皆呼先生若憲文宗時以讒死倫苟早  
卒廷芬男獨愚不可教為民終身

女郎張窈窕

寄故人云澹澹春風花落時不堪愁望更相  
思無金可買長門賦有恨空吟團扇詩

女郎劉媛

學畫蛾眉獨出羣當時人道便承恩經年不

見君王面花落黃昏空掩門

鶯鶯

鶯鶯姓崔氏有張生者託其婢紅娘以春詞  
二篇誘之崔荅曰待月西窗下迎風戶半  
開拂牆花影動疑是故<sub>耳</sub>人來張喜其意既  
遇而別崔命琴鼓霓裳羽衣之曲張文戰  
不利崔貽書以廣其意又有竹茶碾亂絲  
之贈曰淚痕在竹愁緒縈絲因物達情求  
以為好楊巨源元稹善張生見其意歎賞



之巨源賦崔娘一篇云清潤潘郎玉不如  
中庭蕙草雪銷初風流才子多春思腸斷  
蕭娘一紙書元禎亦續生會真詩三十韻  
張後以為妖於身也絕之既而崔託其所  
親潛寄一詩云自從消瘦減容光萬轉千  
回懶下床不為傍人羞不起因即憔悴却  
羞郎張將行賦一章以絕之云棄置今何  
道當時且自親還將舊來意憐取眼前人  
自是遂絕

不知名

江陵有士子遊交廣五年未還愛姬為太守  
所取納於高麗坊邸及歸寄詩曰陰雲幕  
幕下陽臺惹著襄王更不回五度看花空  
有淚一心如結不曾開織羅自合依芳樹  
覆水寧思返舊杯惆悵高麗坊邸宅春光  
無復下山來守遂遣還有為御史分務洛  
京者其愛姬為李逢吉一閱遂不復出明  
日以詩投之云三山不見海沉沉豈有仙



蹤尚可尋青鳥去時雲路斷端娥歸處月  
宮深紗窗暗想春相憶書幌誰憐夜獨吟  
料得此時天上月只應偏照兩人心李得  
詩含笑曰大好詩遂絕

唐人及第後或遇舊題名處即加前字故詩

曰曾題名處添前字送出城人乞舊詩

姚合

及第後詩云新銜添一字舊衣讓前途

長安木塔院有進士

房曾題名處有人題詩曰姚家新塔是房  
即未解芳顏意欲狂見說正調穿羽箭莫

教穿破寺家墻丹陽焦山瘞鶴銘小碣刻  
詩云江外水不凍今年寒苦遲三山在何  
處欲到引風歸後題云丹陽掾王瓚作後  
復題少石云縱步不知遠夕陽猶未回好  
花隨意發流水逐人來不知誰為之忽聞  
天子訪沉淪萬里懷書西入秦早知不用  
無謀客恨別江南楊柳春

奇鯤南詔大酋之心替也僖宗時來朝高駢  
自淮海飛章曰蠻首用事惟奇鯤等數人



請止而鴉之帝用其策奇鯤有詞藻途中  
詩云風裏浪花吹又白雨中峯影洗還青  
沙鷗聚處窓前見林狖啼時枕上聽出北夢  
瑣言  
雜調云勸君莫惜金縷衣勸君須惜少年時  
有花堪折直須折莫待無花空折枝  
空賜羅衣不賜恩一燻香後一銷魂雖然舞  
袖何曾舞長對春風裛淚痕  
取想心思夢裏驚無人知我此時情不如池  
上鴛鴦鳥雙宿雙飛過一生

鶯啼露冷酒初醒罨畫樓西曉角鳴翠羽帳  
中人夢覺寶釵斜墜枕函聲

兩心不語暗知情燈下裁縫月下行行到階  
前知未睡夜深聞放剪刀聲

乾符末有客訪僧僧却之題門而去云龕龍  
去東海時日隱西斜敬文今不在碎石入  
流沙忽一僧曰大罵我曹乃合寺苟卒四  
字

權龍褒



景龍中為左武衛將軍好賦詩而不知聲律  
中宗與學士賦詩輒自預焉帝戲呼為權  
學士初以親累遠貶洎歸獻詩云龍褒有  
何罪之恩放領南勅知無罪過追來與將  
軍上大笑常吟夏日詩嚴霜白皓皓明月  
赤團團或曰豈是夏景荅曰趣韻而已通  
天中刺滄州初到呈同官曰遙看滄州城  
楊柳鬱青青中央一羣漢聚坐打杯角諸  
公辭曰公有逸才曰不敢趣韻而已當作

秋日詠懷詩曰簷前飛七百雪白後園僵  
飽食房裏側家糞集野娘參軍不曉問之  
權曰鷄子簾前飛直七百洗衫掛後園白  
如雪飽食房中側卧家裏便轉集得野澤  
蟻娘聞者笑之始賦夏日嚴霜明月之句  
乃皇太子宴賦詩太子援筆譏之龍褒才  
子秦州人氏明月晝耀嚴霜夏起如此詩  
章趣韻而已

龍褒為瀛州刺史歲暮京中人附書云改年



多感乃將書呈判司以下云有司改年為  
多感元年一日謂府吏何名私忌對曰父  
母亡日請假偶房中靜坐有青狗突入大  
怒曰衝破我忌日更牒改到明日好作忌  
日談者笑之

全唐詩

跋重刊全唐詩話

詩莫盛於李唐而詩體之變亦至  
是極矣蓋唐科目一以聲律為進  
取故士習專焉專則工工則盛盛  
極而變數歟非耶近世梓行有詩  
林廣記有嚴滄浪詩談有李西涯



麓堂詩話並為吟壇指南然槩論  
古今題詠不專於唐作此集獨取  
唐代君臣才俊以及宮闈方外之  
流亦附焉故曰全唐詩話尤文簡  
公當宋咸淳中以詩鳴于時故其  
采集精嚴如此關西近有刊本東

南未及流布都知太監尚公景元  
天資英敏冲年嘗學詩字於子厥  
後大進舉筆皆夏出人表今督海  
舶于吾閩雅好詩文見茲悅之重  
繡諸梓用廣其傳漫題數語以志  
歲月其詳已具于侍御胡公士寧



首簡傑作奚庸贅哉

正德十一年歲在丙子仲冬長至  
日


賜進士資政大夫南京叅贊機務兵  
部尚書致仕前吏部尚書國子祭  
酒春坊左諭德燕

經筵講官同脩

國史續通鑑綱目三山八十三翁林

瀚跋





國家圖書館, NATIONAL CENTRAL LIBRARY, TAIWAN, R.O.C.